

وإنهم لقادمون

رواية وإنهم لقادموت
فريال الفخرافي الكاتبة
مصطفى النجار الغلاف
نهى بكير التدقيق اللغوي
المكتب الفني للمطبوعات التنسيق
2022-5243 رقم الإيداع
978-977-6922-40-2 الترميم الدولي

جميع الحقوق محفوظة ©

وأى اقتباس، أو تقليد، أو إعادة طبع
أو نشر دون موافقة كتابية يعرض
صاحبه للمساءلة القانونية.

والآراء، والأفكار، والمادة الواردة
وحقوق الملكية الفكرية بالكتاب خاصة
بالكاتب فقط، دون أدنى مسؤولية
قانونية على الدار .



نصنع الفارق بالحروف
ونطارد حلمك كأننا نراه



المؤسسة للنشر والتوزيع



01000 976 876



contact@almossasa.com



www.almossasa.com



المدير العام: مصطفى النجار



ميامي، سيدي بشر- الإسكندرية

فريال الفخراي



وانهم لقادمون

رواية



المؤسسة للنشر والتوزيع
Almassasa Publishing House

٢٤ إهداء



إلى كلِّ من أمسك بيدي وأمن بي، وساعدني على الوصول.
وإلى كلِّ من ألقى عليّ كلمة أسعدت قلبي، وجعلتني أبدأ بحماس من
جديد.

إلى كلِّ من وقف بجاني حتى النهاية.. أحبكم من أعماق قلبي.

شكرًا لكم

فريال الفخراي



الحكايات المرة دي مختلفة عن أي حكايات قرأتها قبل كدا...علشان حكايات العالم الثالث والأرواح اللي بتبقى متعلقة في الدنيا حقيقة ، ومش بعيد تكون قاعد دلوقتي وفي روح منهم حوالياك وبتراقبك، وبالذات لما مسكت الكتاب دا. بين إيديك أكثر من قصة لأشخاص مختلفين حكوا تجاربهم والمواقف اللي حصلت لهم مع العالم الثالث ، في أرواح قضينا عليها ومش هتعرف ترجع العالم بتاعنا بسهولة ، وفي لسه موجودة وبتحوم حواليا من وقت للتاني وبتستنى أي فرصة ترجع فيها لقوتها زي الأول، وإنت بنفسك هتحس ببعض منهم حوالياك وإنت بتقرأ حكايتهم.. مش هطول عليك في المقدمة، بس نصيحة مني.. وإنت بتقرأ حاول متعدهش لوحدهك ، وماتقرأش في الضلعة وبذات بليل ... بتمنالك قراءة ممتعة.

۱- کمین

من فترة اتنقلت لمكان جديد في الشغل، وبقيت أقف في الوردية الليلية.. المكان هنا هادي ومش بيعدي عليه عربيات كثير، علشان كذا الظباط اللي في الكمين كان عددهم قليل عن المعتاد، وقبل ماستلم شغلي في الكمين جالي ظباط قديم كان شغال فيه.. عمري ما هنسى نظرتة ليا وال كان فيها نوع من البرود واللامبالاة وفضل يقولي ماتركزش مع كل حاجة تحصل قدامك، ساعتها مافهمتش هو قصده ايه، ولما دخلت الأوضة اللي عند الكمين لقيت ٢ ظباط بس، ومن أول ما عينهم جت عليا شفت ضحكة صفرا على وشهم، فبعدت عنهم وخذت مكاني اللي هقف فيه.. وعدت أيام وكان الوضع عادي جدا، لحد ما جه حد منهم وقعد جنبي وبدأ الكلام..

- إنت حظك حلو، المكان عمره ما كان هادي كذا يوم قبل كذا.

= قصدك ايه؟

- أنا شعلان، وإنت؟

= هيثم.. أنا من ساعة ما جيت وأنا شايفكوا مخبيين عليا حاجة، ممكن أعرف في ايه؟

خبط على ضهري وقال وهو بيقوم يقعد جنب الظابط الثاني..

- ماتستعجلش ماتستعجلش، هتشوف كل حاجة بنفسك.

كنت مستغرب ليه حطين كمين في المكان دا، مع إن مافيش عربيات بتعدي من هنا أصلاً، ولو عربية جت بيوقفوها ومش بيخلوها تعدي، وفي يوم كنت واقف لقيت طفل صغير مش عارف ظهر منين وبيعيط جامد وبيقولي الحق ماما واقعة جوا وديها المستشفى، قمت من على الكرسي بسرعة وكنت هروح معاه فلقيت شعلان مسكني من كتفي جامد وقال للواد روح واحنا هنيجي وراك، وفعلاً الواد مشي وشعلان راح قعد

مكانه بكل هدوء.. بقيت واقف مش فاهم حاجة، فروحت أسأل
شعلان..

- ليه ماروحناش ساعدنا الطفل وأمه؟

= مش هتلاقيهم أصلاً.. اقعد اقعد، شكل الليلة دي هتبقى ثقيلة.

- ثقيلة ازاي مش فاهم؟

= ماتصدعنيش مش عايز أسئلة كثير، لو شفت حد ماتروحش معاه، ورد
عليه بحاضر واسكت، فاهم ولا لا؟

كنت متضايق فمردتش عليه وروحت قعدت بعيد عنه، وكنا أنا وهو
بس في الوردية النهاردا.. بعدها بشوية سمعت صرخ جاي من الزرع ال
جانبي، كان صوت واحدة بتصرخ وطفل بيعيط.. بصيت لشعلان
وفضلت قاعد مكاني، لحد ما لقيت خشبة كبيرة اتحدفت عليا بس
ماصابتنيش؛ فقمتم مخضوض وانا بدور على شعلان بس مالمقيتهوش..
وابتديت أحس بحركة حواليا، وأصوات عياط من ناس أنا مش شايفهم،
فأخذت العربية بتاعتي ومشيت من المكان، وأنا سايق بصيت في المرايا
لقيت الطفل قاعد على الكرسي الي ورايا، إتخضبت وماعرفتش أسيطر
على العربية فاتخبطت في شجرة وفقدت الوعي، ومافقتش غير وانا في
المستشفى وصحابي حواليا...

- سلامتك يا هيثم بيه، شكلك اتحسدت ولا ايه!

ماكنتش قادر أتكلم، مش عشان تعبان لاء، عشان شايف الولد الصغير
واقف في ركن الأوضة ويبصلي بكل غضب وبيعيط.. كنت حاسس إن
في حد مكتفني بس مش شايفه، ولما الولد اختفى عرفت أحرك جسمي
وبدأت أتكلم..

= شفتوه؟

- شفنا ايه؟

= الواد.. الواد اللي واقف في الأوضة معنا هنا.. أنا شفته، كان واقف واختفى..

- يظهر إن الخبطة أثرت على دماغك جامد..

في اللحظة دي دخل الدكتور وصحابي حكوله على اللي حصل فقالهم تهيؤات أثر الحادثة وكام يوم وهبقي كويس، وطلب منهم يخرجوا من الأوضة علشان يكشف عليا، وفعلا خرجوا وسابوني لوحدي معاه، ومن أول ما قفلوا الباب لقيت الدكتور بيبصلي جامد وابتدا يتسم بطريقة مرعبة، وخذ المشروط وعورني في دراعي.. ابتديت أصرخ وأنده على صحابي عشان يلحقوني، ولما دخلوا كانوا مستغربين جدا، بصيت للدكتور لقيته واقف جنبهم على الباب وخايف مني وبعدين خرج بسرعة وخرج صحابي محمود وراه، وصاحبي الثاني مينا جه وقف جنبي.. فقلته إن الدكتور كان عايز يموتني وإنه جرحني في دراعي، ووريته الجرح، مينا كان واقف مستغرب ومش فاهم مني حاجة بس هداني وقال إنه هيتصرف معاه، وبعد شوية محمود جه ونده على مينا وسابني وخرج.. فضلت قاعد على السرير مكاني وحاسس بصداع فظيع ومش فاهم اللي بيحصل حواليا، ولما محمود ومينا دخلوا تاني كانوا بيبصولي باستغراب، وكل واحد مستني الثاني يتكلم، لحد ما محمود قال..

= الدكتور بيقول إن من أول ما احنا خرجنا صوتك اتغير وابتديت تقول كلام غريب هو مش فاهمه، وبعدين طلعت كاتر من جيبيك وجرحت دراعك وفضلت تصرخ..

كنت فاكرهم بيهزروا معايا...

- أنا ما عملتش كدا هو اللي كان عايز يقتلني، أنا شفته وهو بيتسلمي.. أنا شفته.

كانوا يحاولوا يهدوني بس معروفوش ، فنادوا على الممرضة وحت إدتني
حقنة مهدئة وروحت في نوم عميق

صحيت تاني يوم طبيعي جدا، ماكنش عندى صداع زي امبارح وحاسس
نفسي أحسن كثير.. جه دكتور غير اللي كشف عليا امبارح وقال إني
كويس وأقدر أروح البيت، وفعلاً أخذت حاجتي وروحت وقررت إني
أنسى اللي حصل ومااروحش الكمين دا تاني . فضلت ٣ أيام قاعد في
البيت مش بروح ورديتي في الكمين، بس كان بيحصلني حاجات غريبة في
الشقة.. مرة كنت نايم وسمعت صوت خبط في المطبخ وحد بينده على
والده، مع العلم إني قاعد لوحدي ومعنديش أطفال ، ولما دخلت
المطبخ لقيت حاجات كتير واقعة في الأرض والدنيا مكركبة أكن حد
دخل المكان . تاني يوم لما صحيت لقيت لعب وهدموم طفل جنبي على
السرير، مسكتهم وفضلت مستغرب ازاى جم هنا، ولما قمت دورت في
الشقة مالقتش حد وإتأكدت إن ترباس الشقة كان مقفول ، ولما رجعت
تاني الأوضة مالقتش الحاجة .

واليوم ٣ لقيت شعلان بيتصل بيا ويزعق جامد إني سبت الكمين
ومشيت فجأة ، حاولت أشرحله بس هو كان عنيف جدا، وهددني بالجزا
والتحقيق لو ماجتش الشغل تاني؛ فاضطريت أنزل وأنا مش مطمئن ومش
عايز أروح المكان دا تاني . وأنا ماشي بالعربية لاقيت ست عجوزة واقفة
ومش عايزة تتحرك من الطريق ، فنزلت من العربية أشوف مالها وطلعت
الست اللي كنت قابلتها من شهرين، وقتها جت وقفت قدامي فجأة وأنا
ماشي في الشارع، وابتسمت بخبث ورشت عليا مياه؛ زقتها على الأرض
وضربتها برجلي وشتمتها، ومشيت وأنا بمسح المياه من على وشي
وهدومي.. النهاردا ظهرت تاني وواقفة قدامي بنفس الطريقة ونفس
الابتسامة ، حسيت إن قلبي هيتخلع من مكانه لما مسكتني من راسي
جامد وقعدتني على الأرض بالعافية وأكلتني حاجة طعمها مر جدا ، كانت

قوية أكنها ٣ رجالة في بعض مش ست عجوزة أبدًا ! وأنا ماكنتش قادر أفاومها.. وبعد ماأكلتني اللي هي ماسكاه فضلت قافلة بقي لحد ما بلعته، بعدها ابتسمت ومانطقتش بكلمة وسابتي ومشيت.. ولما استوعبت اللي حصل فضلت أدور عليها على الطريق المالقيتهاش، كنت قرعان جدا وبحاول أستفرغ اللي أكلته بس ماعرفتش ، وبعد محاولات من الفشل ركبت العربية تاني ورحت على مكان الكمين، ومن أول ما وصلت لقيت شعلان متضايق إني اتأخرت، حاولت أحكيه اللي حصل لكن رفض إنه يسمع أي مبررات، فسبته ورحت أقعد مكاني بس ماكنتش مرتاح وحاسس إني تعبان ومش قادر أقعد.. فدورت على شعلان علشان أقوله إني هروح ملقتهوش مع إني متأكد إنه كان واقف هنا ، وحسيت إني مش قادر آخذ نفسي فقلت أقوم أتمشى عقبال ما يرجع . ماكنتش مركز وقتها أنا ماشي ازاي ومافقتش غير وأنا في وسط الزرع... اتخضيت وفضلت أبص حواليا مش شايف غير زرع وشجر عالي أكني في غابة، وفجأة ظهر الطفل تاني وهو يببصلي بغضب، وظهرت جنبه واحدة ست شعرها مغطي وشها، وهدومها كلها دم.. فضلت واقف مش عارف أتحرك، لحد ما الست رفعت راسها وقدرت أشوف وشها.. دي راندا! راندا حبيبي القديمة؟ ايه اللي جابها هنا وليه شكلها كدا! ماكنتش فاهم حاجة ومن الخوف ابتديت أجري ، كنت بحاول أخرج من المكان بس أكني في متاهة أو بلف في دايرة مقفولة ! وكل مااروح حته كنت بشوفها قدامي هي والطفل، لحد ما لقيتها واقفة قدامي بالظبط ووشها قريب من وشي، كانت بتبصلي بحقد وغضب وفجأة طلعت سكينه وغرزتها في صدري جامد.. كانت بتشيل السكينه وتطعني بيها أكثر من مرة وهي بتصرخ، وأنا شايف دي بيطلع من جسمي وحاسس بكل طعنة طعنتها لي لحد ما وقعت على الأرض وماكنتش قادر آخذ نفسي...

صحيت وأنا في المستشفى، مش عارف مين جابني هنا ووصلت ازاي..
كان جسمي واجعني جدا وعندي صداع شديد، افكرت اللي حصل في
الكمين فبصيت مكان الطعنة مالمقيتش حاجة.. أنا متأكد إن راندا طعنتني
أكثر من طعنة في قلبي وحسيت بالوجع وشفيت الدم قدامي بس مش
لاقي أي أثر للجرح ولا للخياطة! شوية ولاقيت ممرضة داخله الأوضة..
= حمد لله على السلامة.

- أنا جيت هنا ازاي؟

= واحد لاقاك مرمي في نص الطريق جابك هنا.. هنعمل تحاليل سكر
عشان نضمن على حضرتك ونعرف سبب الإغماء.

ماهتمتش لكلامها وروحت على مكان الكمين عشان أقابل شعلان وأفهم
اللي حصل بس مالمقتش الكمين ولا لقيت شعلان، أكن مافيش كمين
اتعمل في المكان ده أصلاً! بقيت واقف مش فاهم حاجة، وحاسس إني
هاتجنن.. ليه راندا ظهرت دلوقتي؟ وليه شكلها كدا! روحت البيت وأنا
تعبان وحاسس إن دماغي هتنفجر، وابتديت أفكر اللي حصل بيني وبين
راندا زمان..

من ٨ سنين قابلت بنت عادية جدا مافيهش أي ميزة شدتني ليها، كل
اللي خلاني أقرب منها إنها كانت سامحالي أعمل معاها أي حاجة أنا
عايزها، لدرجة إني كنت باخد منها فلوس كتير ومش برجعلها حاجة..
حبها ليا كان عاميها عن شخصيتي البشعة والوحش اللي ساكن جوايا،
وأنا كنت استغلالي ليها لأبعد الحدود واتجوزتها، مش هنسى اليوم اللي
جت فيه وهي منكسرة وشكلها تعبان وبتقولي أنها حامل.. ساعتها طلبت
منها تنزل الجنين، بس قالتلي إن نفسها تكون أم دا غير إنه كبر وماينفعش
ينزل، ساعتها اتعصبت عليها وفضلت أضرب فيها لحد ما فقدت الوعي
وسبتها ومشيت، ومن ساعتها معرفش عنها حاجة ولا حاولت أدور
عليها ونسيتها أصلاً. وأنا قاعد في الشقة بفكر لقيت الكهرباء فرقعت

وحصل ماس كهربى والنار طلعت فجأة ومسكت في العفش، حاولت أطفئها بس ماعرفتتش، وفي ثواني النار كانت محاطة المكان وفضلت أحاول أخرج لحد ما النار مسكت في جسمي، كنت حاسس بالحرق حقيقي وشايف النار وهي ماسكة فيا وجلدي ابتدا يسبح.. أقسملك إني كنت بموت بالبطنىء وحاسس بالنار وهي بتخلص أكل في جلدي وداخله على العضم.. وهنا ظهر الطفل ورائدا واقفة جنبه والنار حوالهم، كانوا يببصولي بكل غضب.. ودي آخر حاجة فاكرها عشان كنت فقدت الوعي وقتها، ولما صحيت لقيت نفسي في سريري عادي والدنيا كويسة حواليا! أنا متأكد إنه مش حلم؛ أنا كنت عايش وحاسس بالوجع وشايف رائدا قدامي.. بصيت على جسمي لقيت جلدي شكله غريب وفي حرق في جزء من دراعي، ومكان الطعنات اللي رائدا طعنتها لي قبل كدا ابتدا يوجعني جامد أكن في جرح بس مش شايفه.. نزلت من الشقة بسرعة ورحت على قسم الشرطة، وادتهم اسم رائدا بالكامل، وطلبت منهم مايسبوش حته في البلد غير لما يدوروا عليها فيها ويجيبولي كل المعلومات عنها..

عدا ٣ أيام ومافيش أي أخبار عن رائدا، وآخر معلومات ليها كانت من سنة وساعتها اختفت وماحدش عرف يوصلها تاني . في الفترة دي كنت بعيش أسوأ ٣ أيام في حياتي، كنت بشوفها في كل أحلامي هي والطفل اللي معاها وببفضلوا بيضريوني جامد، وبصحى من النوم من شدة الوجع، وألاقي كدمات على جسمي، كنت بشوفها في مرايات الشقة، وعلى شاشة الموبايل، وفي كل مكان بروحه.. وفي يوم جه مينا قعد جنبي، وكان شكلي تعبان ومرهق جدا، فسألني مالك وحكىتله كل اللي حصل لي وكل اللي بشوفه وبحس بيه.. وأول صدمة ليا لما قال أنه مافيش أي كمين في المنطقة اللي بحكي عنها ، وإنها حته مقطوعة مافيش حد بيعدي منها، وبعد إصرار مني إن في كمين فعلاً وإن في راجل هناك اسمه شعلان، راح معايا عشان يتأكد، ولما وصلنا مالقيناش أي حاجة والمكان كان فاضي

جدا ومهجور.. كنت واقف ومش فاهم اللي بيحصل .. أنا جيت هنا كثير،
وكان في كمين هنا وواحد اسمه شعلان بيشتغل معايا !

أخذني مينا ورحنا على قسم الشرطة، وبعد بحث في الملفات عرفنا إنه
زمان كان في كمين هنا فعلا، وكان في واحد اسمه شعلان شغال هناك،
وأفراد الكمين كلهم ماتوا نتيجة لعملية إرهاب، ومن ساعتها الطريق
اتقفل ومافيش كمين وقف في المكان دا تاني، ولما شفت صورة الرجل
اللي في الملف لقبته هو شعلان نفسه اللي كان بيوقف معايا في الكمين،
بس برضو مافهمتتش ايه علاقة الكمين براندا.. قعدت على الكرسي وأنا
ماسك دماغى ومش عارف ايه اللي بيحصل، لحد ما مينا أخذني وراح
الكنيسة، ومن أول ما الأسيس شافني طردني براء، وقالي ماتجيش هنا تاني
ولا تلمس الأرض دي.. كنت خايف ومش عارف أعمل ايه، وفضلت
قاعد في البيت يومين لا باكل ولا بشرب، وراندا كانت بتظهر دايمًا
وتضريني هي والطفل اللي معاها.. لحد مالقيت محمود ومينا جايين
ومعاهم شيخ، ومن أول ما شافني ملامح وشه اتغيرت وفضل باصصلي
كثير وساكت، وبعد صمت طويل قال...

= إنت معمولك سحر أسود قوي مش أي حد هيعرف يفكه.. دا لو لقيت
حد بالقوة اللي تسمحله إنه يفكه أصلاً، بإختصار علشان اللي معايا
مستعجلين ومش هينفع نقعد هنا أكثر من كدا.. إنت اترش عليك
حاجة، وفي حد أكلك السحر كمان، ومعمولك بهدف إنك تعيش لحظات
أكنك بتموت فيها وتحس بكل الأوجاع بس ماتموتش، يعني تعيش كل
لحظات الموت الصعبة، وتحس بيه، وتحس بروحك وهي بتطلع، بس
ماتموتش، وتكتشف إنه وهم وتعيش متأثر بوجع كل موتة إنت عشتها..
دا كل اللي عرفت أوصله.

قال الكلمتين دول وخرج على طول من الشقة من غير ما يزود كلمة..
صحاي بصولي ومش عارفين يقولوا حاجة ومحمود نزل ورا الشيخ، ومينا

فضل معايا.. بصتله ولأول مرة أعيط في حياتي، وفضلت أسأله أنا عملت ايه لكل دا؟ ليه يحصل فيا كدا! فضل يهدي فيا، بس كنت بعيط بهستيريا، لحد ما عيني راحت في النوم..

كنت واقف في نفس مكان الكمين اللي أول مرة أشوف فيه راندا والطفل، لقيتها ظهرت وهي شايلة الولد وبعدين بتنزله على الأرض وبتقوله "روح سلم على بابا يا حبيبي".. كنت مفزوع والطفل بيجري ناحيتي ورجله معكوسة وأنا مش عارف أتحرك من مكاني وهو بيقرّب مني وبيحضني من رجلي جامد، بس دي ماكنتش قوة طفل أبداً! حسيت إن عضم رجلي اتكسر من قوة الحضن ، بعدين سابني ورجع جنب أمه اللي فضلّت واقفة وباصالي، وفي الآخر قعدت مكانها، وخذت الطفل على رجلها، وابتدت تحكي...

= أنا مش هحكي عشان أريحك لا.. عشان تعرف بس إنك هتفضل عايش تتعذب زي ما عذبتني.. من سنة لما الدنيا ضاقت بيا، ومابقاش معايا حتى تمن رغيف العيش، قررت إني أموت ابني وأموت معاها أحسن من العيشة دي.. بس قبل ما عمل كدا روحت لواحدة بتعمل سحر وأعمال، أكيد عارفها، وطلبت منها تعملك سحر زي ما الشيخ قالك بالظبط بس ماكنش معايا فلوس وقتها؛ وعشان كدا في المقابل قدمتها روجي أنا وابني ، واديننا جسمنا قربان للشيطان.. روحنا المزرة اللي جنب الكمين القديم ونفذنا كل حاجة واتقتلت أنا وابني هناك وتم السحر زي ما أنا عايزة.. ولما ظهرت الست قدامك رمته عليك وكان في المياه، وابتديت تشوف كل حاجة أنا عايزاك تشوفها.. الكمين اللي كنت فيه مش موجود، بس بسببي خيلتك تشوفه وتشوف الناس اللي كانوا واقفين فيه قبل ما يموتوا، وبسببي الست ظهرت مرة ثانية وأكلتك السحر.. الطعنات اللي أنا اديتها لك كانت كل وجع حسيت بيه بسببك.. والنار اللي مسكت فيك كانت جزء من النار اللي سببتها في قلبي وحسرتي على نفسي وابني واحنا مرميين في الشوارع بنموت من الجوع بعد ما خدت كل فلوسي وسببتني

ومشيت.. مهما حاولت تنتحر يا هيثم مش هتعرف، وهتفضل تموت كل مرة بطرق مختلفة في عقلك، وتحس بألم كل موتة، وبرضو روحك مش هترتاح، ولا أنا هسيبك.

كنت مرعوب وجسمي كله بيترعش وأنا شايف شكلها بيتغير قدامي وبتتحول لكائن ضخم ومرعب.. الطفل إبتدا يعيط وهي بتقرب ناحيتي، وفجأة مسكت جسمي وبدأت تاكل فيه، كنت حاسس بلحمي وهو بيتشد أكنه حقيقة.. قمت من النوم مفزوع، وجسمي كله مياه أكني كنت في بحر، ومش قادر آخذ نفسي.. من ساعتها وأنا عايش لوحدي في الشقة، مش بيحصلي أي حاجة غير إني أموت بطرق بشعة ومختلفة وأعيش تاني.. النهاردا عدا ١٠٠ يوم على وضعي كدا، والنهاردا المرة ١٠٠ اللي أحاول أنتحر فيها ومابعرفش.. أنا قاعد دلوقتي بكتب قصتي، وفي إيدي مسدس.. وبدعي من قلبي إني أعرف أموت حقيقي المرة دي، وأرتاح من العذاب دا..

تمت.

DARK -۲

أنا حكايتي غريبة ومخيفة جدا.. كان نفسي أقولك لو بتخاف ونفسيك بتتعب بسرعة بلاش تقرأ، بس للأسف إنت مجبر إنك تقرأ وتكمل قصتي للآخر، لإنك لو ما عملت كدا احتمال كبير جدا تقع في نفس الفخ اللي أنا وقعت فيه.. وعلى فكرة هو مش بعيد عنك واعي فتفكر إنك في أمان لا، أنا دلوقتي متراقب وإنت متراقب ما فيش حد عايش على الأرض ومش متراقب، واعذرني لو هختصر وأشيل تفاصيل كثير من القصة، ممكن ماتبقاش فاهم حاجة، بس صدقني أنا ما عرفش هقدر أكمل كتابة ولا لا، والدقايق اللي جاية هكون عايش ولا ميت، ولو عشت هكون لوحدي ولا لا..

الحكاية بدأت لما كنت فاتح فيس عادي جدا وبقلب في التايم لاين، لحد ما لقيت بوست غريب من واحدة في جروب ما وبتقول فيه إن أجمل شعور حسته في حياتها لما عملت cutting وشافت الدم بيخرج من إيدها وإنها بتحس بعدها إن ما فيش أي حاجة تقدر تقف في طريقها بعد كدا، وحياتها بقت أسهل لإنها بقت أقوى من الأول، واللي يخليها تتخلى عن دمها يخليها تقدر تتخلى عن أي حاجة تانية بسهولة ، وبتنصح البنات والشباب إنهم يعملوا زيها.. البوست كان مقرف جدا، والطريقة اللي بتشرح فيها إحساسها كانت مريبة، وبتدل على اضطرابها نفسيا، وعلى الرغم إن البوست كان من ١٠ سطور بس، إلا إنها شرحت فيهم كل اللي هي عايزاه وقدرت توصل شعورها بدقة للقارئ. ولما دخلت في الكومنتات لقيت في بنات صغيرين كثير جدا أيدوا الفكرة وقالوا إنهم هيجربوها ، وزبي زي أي حد بيرفض العنف وتعذيب الجسد، كتبت كومنت بلومها فيه عن فكرها وعرض آرائها المؤذية للمجتمع، وبعد كام دقيقة عملت لاف على الكومنت وماردتش رغم إن كلامي فيه كان انتقادي جدا.. فضلت فاتح شوية وبعدين قفلت ونمت، واليوم خلص على كدا، وتاني يوم لما فتحت لقيت ماسدج منها على ather، وكان الحوار كالتالي...

- كلام حضرتك كان صح جدا، وأنا حسيت فعلاً بالذنب، بالذات لما لقيت بنوتة صغيرة داخله تسألني عن طريقة توقف بيها النزيف، وإنها عملت اللي قلت عليه بالظبط بس الجرح كان عميق.

=طب وجاية تقولي لي الكلام دا ليه! ربنا يهديكي..

- عشان حسيت إنك إنسان حساس وفاهم..

وأكيد هتساعدني إني أتخلص من الصفة دي.

= أساعدك ازاي يعني؟

- أنا اللي جاية أسأل حضرتك..

أنا بحب أشوف شكل الدم وهو خارج من إيدي..

شكله بيريح أعصابي، وبيخليني أعرف أتعامل مع الناس تاني..

كانت بتكتب وتبعث الماسدجات بنفس الترتيب اللي أنا كاتبهم فوق كدا، كنت متضايق جدا من كلامها ومش عايز أكمل الحوار المقرف دا، بس هي كانت مصممة تكمل كلام، دا غير إنها قالتلي إنها وحيدة وما عندهاش حد ينصحها، وإنها عايشة لوحدها وحكتلي قصة حياتها، وبدأت تستدرجني عاطفيا عشان تعصب عليا وأتكم معاها، وفعلا دا اللي حصل من غير ماخذ بالي، وفي وسط الكلام نصحتها تروح لطبيب نفسي عشان تتخلص من الحالة اللي هي فيها، وإنها إنسانة كويسة بس الظروف كانت أقوى منها، وإني مش هسيبها لحد ما تتعالج وتتخلص من مرضها، وهي وعدتني إنها هتاخذ الخطوة ومش هتتجاهل الموضوع تاني، وخلص الحوار على كدا وقفلت وروحت شغلي.. ولما روحت وفتحت تاني، لقيتها باعثة ماسدجات كتير بتحكي فيهم عن أكثر الحاجات اللي بتخوفها واللي بتخليها مش عارفة تمارس نشاطات يومها بشكل عادي، وإنها دايمًا قاعدة في البيت وبتخاف تخرج وتقابل الناس برا رغم إنها

عدت العشرين.. طريقتها في الكلام كانت حزينة ، واستعطافية لأعلى درجة، وشاطرة جدا إنها تخليك تتعاطف معاها وتضطر تكلمها ، رغم إني ما كنتش مرتاح ليها ومستغرب ازاى تتكلم عن كل الخصوصيات دي لحد ماتعرفهوش، بس كنت بيرر دا بإنها دايمًا لوحدها ومش لاقية حد يواسيها.. وعدت الأيام وبقت هاجر جزء أساسي من اليوم.. أنا ما كنتش بحبها ولا منجذب ليها إطلاقًا، لكن كنت مكمل معاها كشفقة مش أكثر، وإني كنت هحس بالذنب لو سبتها في وضعها دا، دا غير إن هي اللي كانت بتبدأ الحوار دايمًا وتدخل تظمن عليا. فضلنا على الحال دا أسبوع بالظبط، وفي اليوم التامن لقيتها باعثة لينك وبتسألني الدكتور دا حلو ولا لا.. طبيعي وبدون أي تفكير دخلت على اللينك على طول، ومن هنا حياتي اتشقلبت ١٨٠ درجة.. من أول ما دست على اللينك ظهر ملفات وحاجات غريبة مش فاهمها والموبايل هنج جامد وفضل معلق لحد ما فصل خالص، بعد كدا فتح لوحده بس الشاشة ما كنتش عادية.. ظهر شكل الكرة الأرضية وهي بتلف، بعد كدا التصوير بينزل على الأرض بالتدريج، لحد ما لقيت صورة شارعنا، بعد كدا بيتنا من فوق، بعد كدا.. بعد كدا ظهر وشي! كنت مخضوض ومش فاهم حاجة.. ابتديت أحرك الموبايل يمين وشمال، وأحرك وشي عشان أتأكد إن الصورة صح.. كنت بقنع نفسي إن الموبايل بيهنج والكاميرا هي اللي فتحت لوحدها ، فضلت أحاول أخرج بس الموبايل كان معلق ومش عارف أتحكم فيه أكنه مابقاش ملكي خلاص.. حظيته على السرير قدامي وفضلت باصصله وبعد ثواني الصورة اختفت، والموبايل رجع طبيعي تاني.. من أول ما مسكت الموبايل دخلت على الشات بتاع هاجر عشان أفهم حصل ايه بس مالمقتش الشات.. كل حاجة موجودة إلا الشات بتاعها، ولما دخلت الفيس ودورت على الأكونت مالمقيتهوش أكنه مش موجود.. كنت خايف ومش فاهم حاجة، وفي نفس الوقت كنت فاتح اللاب جنبي عشان بخلص عليه شغل، وفجأة طلع صوت صفير شديد من الجهاز والشاشة اسودت واشتغلت تاني، بس برضو ماكنش شكلها عادي.. وابتدا يظهر

أيقونات غريبة على الشاشة أكفي انا اللي بثبتها، وبعد كدا ظهر صفحات ولينك تاني، فضل يعمل كدا وأنا أحاول أسيطر عليه ومش فاهم فيه حاجة، وفضل يدخل في لينكات وبيان إني بضغط على أزرار الموافقة، لحد ما لقيت ماسدج في نص الشاشة، مكتوبة باللون الأحمر وخط عريض..

(تم تسجيل دخولك، مرحبًا بك في الدارك ويب)

أنا شفت الماسدج قلبي اتقبض، وفهمت إن اللاب اتهكر، بس ازاي! قفلت الراوتر خالص، وفضلت قاعد مكاني بحاول أستوعب اللي حصل.. قبل ما أكمل القصة خليني أوضحلك ايه الفرق بين الديب ويب والدارك ويب..

مبدأياً احنا مش بنستخدم غير ٥% من حجم الشبكة العالمية، وهي جوجل وياهو وبقية المواقع الأخرى المعروفة، وال ٩٥% الباقية هي الديب ويب، وجزء منها دارك ويب. الديب ويب دا عليه كل البيانات والمواقع الخاصة بالجهات العامة، ومعلومات عن الأشخاص في العالم كله، وما فيش حد بيعرف يوصلها بسهولة؛ لإن زي ما قلتك عليها معلومات خاصة، للمستشفيات مثلاً، وأجهزة المخبرات، حتى معلوماتك إنت الشخصية، من رقم البطاقة، وكارت الائتمان بتاعك، ورقم عريبتك، ومعلوماتك الحساسة دي كلها موجودة على الديب ويب، ومش سهل حد يدخل عليه، وماينفعش أصلاً تدخل عليه من مواقع التصفح العادية، زي جوجل وياهو.. أما الخطر الحقيقي بقي هو الدارك ويب، ودا الجزء المظلم من الانترنت، وأي نشاط إجرامي هتلاقه هناك، ومباح فيه كل حاجة وأي حاجة تتخيلها وماتتخيلهاش كمان، من عمليات سرقة، وقتل، وتجارة أعضاء بشرية، وآكلين لحوم البشر، وحاجات ماينفعش أقولها لك هنا.. وفي مواقع من الدارك ويب محرم استخدامها دولياً، من كتر الخطورة اللي فيها.. من غير دخول في تفاصيل،

أنا كذا فهمتكم الفرق بين الاثنين، نرجع ثاني لقصتي، وبسرعة عشان مابقاش عندي وقت كثير..

بعد ما قفلت اللاب فضلت قاعد في الأوضة بجمع أفكار عشان أفهم حصل ايه وهتصرف ازاي.. فتحت الموبايل واتصلت على أيمن صاحبي عشان يبجي ويتصرف؛ هو دارس تكنولوجيا ومعلومات، ولما جه وحكتله، أول حاجة عملها إنه قفل موبايله، وخدني ودخلنا أوضة مافيهاش أجهزة حديثة، وقال إن كل الأجهزة اللي في البيت اتهكرت، حتى لو معاك ساعة سمارت، أو تكييف حديث، أو تلاجة حديثة بتاعت الأيام دي، كل دا اتهكر.. ماكنتش فاهم حاجة، لحد ما ابتدا يشرحلي إن اللينك اللي دخلت عليه دا جاي من الدارك ويب، وإن هاجر كانت قاصدة تبعتهولي، وإن بمجرد ما دخلت عليه كل بياناتي ومعلوماتي راحت لعندهم وموبايلي اتهكر، ودا نظام اختراق عالي جدا ومش أي حد يعمله، وإنهم جمعوا معلومات عني وحددوا موقعي زي ما ظهر في شاشة الموبايل، لدرجة إنهم سيطروا على جميع التكنولوجيا اللي في البيت وكل حاجة بقت تحت سيطرتهم، وإن أكيد احنا متراقبين دلوقتي من كاميرا اللاب أو الموبايل وكلامنا كله هيتسجل بعد كذا.. كنت خايف ومش عارف أفكر ولا عارف هعمل ايه، وليه هي عملت فيا كذا، أنا ما اعرفهاش ولا أدتها في حاجة...

= طب أعمل ايه دلوقتي؟

- والله يابني ماعرف بجدا، المشكلة إننا بنتعامل مع حاجة كبيرة جدا، حتى معلوماتي وخبرتي مش هعرف أعمل بيها حاجة.

=

- هما هيبندوا يبعثوك طلبات، وإن لازم تنفذها عشان يسبوك عايش.

= طلبات! طلبات زي ايه؟

سكت شوية وبعدين جاوب...

- تقتل حد، تسرق حاجات معينة، في حاجات كتير ممكن يطلبوها منك.

= ولو ما عملتش اللي هما عايزينه؟

فضل باصص في عينيا وساكت، وأنا فهمت رده.. كنا قاعدين بنفكر لحد ما سمعنا صوت صريخ جاي من الصالة فخرجنا بسرعة لقينا اللاب شغال على فيديو جاي من الدارك، لمجموعة من ٥ أشخاص لابسين لبس دمي، وواقفين حوالين بنت وييرقصوا بطريقة غريبة ومرعبة، بعد كذا دبجوها. الفيديو كان قصير بس مرعب، وصوت الموسيقى متعبة نفسيا.. رocht بسرعة ناحية اللاب وقفلته خالص وشلت البطارية منه وغطيت الكاميرا، وقعدت على الكنبة ماسك دماغي.. جه أيمن قعد جنبي...

- إنت لازم تعزل من هنا، وقبل ما تمشي تكون مكسر كل الأجهزة دي.

= أنا خايف أوي.. هما ممكن يوصلوا لأهلي في البلد؟

-

رديت وأنا بزقق...

= هيوصلولهم صح؟ رد عليا يا أيمن.. أهلي وإخواني ممكن يجرالهم حاجة بسببي؟

- مااعرفش يا هارون.. مااعرفش مااعرفش.. احنا بنتعامل مع حاجة كبيرة وصعب بل مستحيل نلاقي حد يساعدنا فيها، احنا لازم نهذا ونفكر كويس قبل أي خطوة، وأكد هيتواصلوا معنا، أو على الأقل البنت اللي اسمها هاجر دي تكلمك تاني وساعتها هنشوف.. ربنا يستر.

قفلنا الموبايلات وفضلنا قاعدين أنا وأيمن لحد بليل ، بعدين استأذن
عشان يروح وقالي إنه هيجي بكرة تاني .. وبعد ممشي مكنتش عارف أنا
، وبالذات بعد ما جالي فضول أفتح اللاب تاني وأشوف هيحصل ايه ،
وبعد ما فتحته بكام دقيقة لقيتهم بعثوا فيديو، ولما فتحته ما قدرتش
أمسك أعصابي ودموعي في نفس الوقت.. كان في واحد قاعد على كرسي
ومغطيين وشه، وحواليه ٣ أشخاص لابسين أبيض، ولازقين على
جسمهم ريش كثير، ومركبين جناحات في ضهرهم.. الراجل اللي كان قاعد
على الكرسي شكله مرهق وتعبان، ومن أول ما شالوا الغطا من على وشه
ما بقتش مصدق.. دا سمير صاحبي! ايه اللي جابه عندهم! وفي نفس
الثانية افتكرت إن سمير مات من ٣ سنين لما كنا مع بعض في البحر..
ساعتها جت موجة عالية وشديدة وأنا ما عرفتش أنقذه وغرق.. بس ازاي
رجع معاهم واحنا دافينيه أصلا! ما كنتش فاهم حاجة وخايف، وفجأة
فكوا الحبل من حواليه، ودخلوه جوا صندوق أزاز كبير، وفتحوا عليه
المياه لحد ما المياه غطته.. كنت شايفه وهو بيخبط على الازاز عشان
يخرجه، بس هما كانوا واقفين يضحكوا ويهزروا أكن ما فيش حاجة..
لحد ما جسمه سكن، وقطع النفس، والفيديو خلص وكانت دموعي
مغرقة وشي.. فاتصلت بأيمن وأنا منهار..

- سمير مات.. سمير كان عايش وهما موتوه..

= اهدا بس، سمير مين اللي مات؟

- سمير صاحبنا يا أيمن.. أنا شفتهم وهما بيغرقوه، كان عايش يا أيمن كان
عايش..

هداني وقالي إن مسافة السكة وهيكون عندي، وبعد شوية جه وأنا كنت
منهار جدا.. كان بيحاول يهديني ويفهم مني، لحد ما هديت شوية
وحكته اللي شفته...

= هارون.. سمير مات من ٣ سنين واحنا دافنينه بنفسنا، اللي في الفيديو دا مش سمير، دا واحد تاني وهما ملبسينه قناع لوش سمير أو فوتوشوب وبعته ليك، هما عارفين إن سمير مات وإنك زعلان عليه وبتلوم نفسك كل يوم على موته، وعارفين إنك بقيت تخاف من البحر، وللأسف عارفين كل مخاوفك، علشان كذا هيبتدوا يستخدموها ضدك ويتعبوك نفسيا.. الفيديو مش حقيقي يا هارون واللي فيه دا مش صاحبنا، إهدي وبلاش تأنب نفسك على اللي حصل، دا قضاء ربنا وإنك حاولت تنقذه بس البحر شده مننا.. هارون.. هارون إنك سامعني؟

كنت قاعد مع أيمن بس مش سامع كلامه خالص و مركز على شاشة اللاب اللي صورتي أنا وأيمن ظاهرة عليه، كنا بنتصور فيديو بس حصل حاجة غريبة.. في الشاشة شفت واحد واقف في المطبخ وبيضحكي، ولما بصيت ورايا مالمقيتش حد! الراجل كان بيقترب مني بخطوات بطيئة وثابتة في الفيديو، بس أنا ماكنتش شايف حد معايا في المكان.. لحد ما بقي ورايا بالظبط، وطلع سكينه كبيرة ودبحني.. قمت مفزوع من مكاني وأنا بشاور لأيمن على اللاب، ولما بص لقيت الراجل بيتجه ناحية أيمن وبيعمل معاه زي ما عمل معايا والفيديو خلص.. ماكنتش فاهم ازاي دخلوا الشخص دا في البث المباشر ليا أنا وأيمن؛ لإنهم كانوا بيصورونا حصري بس تركيب الشخص من عندهم..

أتمنى تكون فاهم أنا عايز أوصلك ايه وتفهم اللي مررت بيه.. كنت حاسس إن الموت حواليا في كل مكان، وما زال حواليا، حتى وأنا بكتبلك الرسالة دي.

نرجع لقصتنا.. بعد ما شفنا الفيديو حالي كانت صعبة جدا، وأيمن لما شافني كدة مارضاش يسبيني لوحدي ويمشي وبات معايا اليوم دا، ولما صحينا ماكانش عارفين هنعمل ايه ولا هنوصل لهاجر ازاي، وأيمن كان لازم يمشي عشان يروح الشغل، وأنا فضلت قاعد لوحدي، وكنت

ابتديت أهدا شوية لحد ماجتلي رسالة بيطلبوا مني أفتح لايف، وأعور نفسي وإلا هتعاقب.. طنشت الرسالة وفضلت قاعد، وبعد ساعتين لاقتهم باعتين فيديو، ولما فتحته لاقيت فيه أختي وشخص مصورها وهي ماشية في الشارع، وبيصور يومها وتحركاتها لحد ما دخلت البيت، والفيديو خلص.. قلبي اتخلع من مكانه وساعتها اتأكدت إن هما وصلوا لعيلتي فعلا وإن الموضوع مش لعبة، وعشان أتجنب أي خطر يمس أهلي قررت أنفذ كل طلباتهم اللي جاية.. جبت سكينه وحتيت اللاب على الطراييزة قدامي ودخلت الدارك ويب وهما دخلوني من نفسهم في لينك، ولما فتح لاقيت ناس كتير قاعدة وبصالي ومستنيين إني أبدأ، وظهر على الشاشة فوق عد تنازلي من ٦٠ ثانية، وبعثوا رسالة مطلوب مني إني أعمل ٣٠ جرح في جسمي قبل ٦٠ ث ما يخلصوا وإلا هخسر التحدي وأتعاقب، وإن كان ممكن عدد الجروح يبقى أقل لو أنا كنت نفذت طلبهم من أول ما بعته.. كنت بترعش وجسمي ساقع من كتر الخوف، وابتدا العد التنازلي.. ٥٩.. ٥٨.. ٥٧.. وأنا لسه مابدأتش، لحد ما لقيت الناس اللي في البث ابتدوا يتضايقوا ويضربوا الكاميرا بإيدهم ويشتموني عشان أبدأ.. وبالفعل ابتديت، أول جرح.. الثاني.. الثالث.. مش قادر أكمل بس مجبر.. الرابع.. الخامس.. كنت كل ما بجرح نفسي ألاقهم مبسوطين وبيصرخوا من كتر الفرحة، فضلت أعمل في إيدي ورجلي خطوط عشوائية، بس برضو ماجيش جنب عرق أو وريد، لحد ما وصلت للجرح رقم ٢٠، وكان فاضل ٢٠ ثانية والوقت ينتهي.. وبسرعة فضلت أجرح نفسي لحد ما وصلت للجرح ٣٠ والوقت خلص، وأنا اترميت على الأرض من التعب والدم مالي جسمي وفقدت الوعي..

صحيت على صوت أيمن وهو مخضوض عليا وبيفوقني، ماكنتش قادر أتكلم ولا أتحرك ومش حاسس غير بوجع وبس.. أخذني على المستشفى، وطبعاً الكل كان مستغرب من شكلي، واياه اللي عمل فيا كدا.. بعد ما خيطة الجروح روحنا على البيت، وحكيته اللي حصل بالتفصيل...

= كذا مش هينفع.. احنا لازم نتصرف.

رديت وأنا معنديش طاقة حتى للكلام وابتديت أعيط...

- أعمل ايه؟ أنا ما عملتش حاجة في حياتي عشان أتعذب عليها كذا! أنا كل اللي عملته إني كنت بحاول أساعدها.. اشمعني أنا.. اشمعني؟

= استغفر ربك يا هارون، أكيد ربنا مش هيسيبنا لوحدا، إن شاء الله هنلاقي حل.

- أنا خايف على أمي وإخواتي، دول عرفوا كل حاجه عنهم، مش عارف أعمل ايه.. أنا تعبان أوي يا أيمن..

فضلنا قاعدين مش بنتكلم، الهدوء مالي المكان، وكل واحد دماغه مشغولة باللي جاي بعد كذا.. قاطع تفكيرنا اتصال من رقم غريب، ولما أيمن رد لاقاها واحدة ست ففتح الاسبيكر عشان أسمع...

- ها.. ايه رأيك في الكاتنج؟ ممتع مش كذا؟

عرفت إنها هاجر، ولما سمعت صوتها فضلت أشتمها وأقولها إني لو عرفت هي مين هندمها على اليوم اللي كلمتني فيه وإني هموتها.. فضلت تضحك وماهتمتش لكلامي، لحد ما قالتلي إننا هنتقابل قريب وقفلت السكة.. انهرت أكثر ومسكت دماغي وبقيت أعيط جامد وأنا حاسس بالعجز ومش عارف أعمل حاجة.. وقتها جه رسالة على موبايلي بتقول...

"مع كل انهيار نفسي وألم تشعر به، وكل ندبة وجرح يظهران في جسدك، تعترينا السعادة، ونشعر بنشوة الانتصار.. استمر في تنفيذ طلباتنا إن كنت تريد الحصول على المال لمعالجة والدتك المريضة"

من أول ما قرأت الرسالة بصيت قدامي على اللابتوب بغضب، وقمت كسرتة؛ كنت بطلع كل غضبي في التكسير، لحد ما أيمن مسكني وهداني عشان الجروح اللي في جسمي ماتفتحش ثاني، ولما هديت جت فكرة في

دماغي، بس ماكنش ينفع أقولها وأنا في الشقة، فطلبت من أيمن إننا نخرج نتمشى شوية عشان أهدا وماكنش موافق.. بس فضلت باصصله لحد ما فهم إني عايز أقول حاجة، سبنا الموبايلات في البيت وروحنا كافي هادي، وابتديت أتكلم...

= فإكر زياد صاحبنا؟ هو ظابط دلوقتي وممكن يساعدنا نوصل للناس دي، أو على الأقل ينهي الحوار دا.

- أعتقد مش هيفيدنا بحاجة، حتى مش معانا دليل نقدر نثبت بيه اللي بيحصلنا.

= طب نجرب، ما أنا مش هفضل كدا من غير ما اتصرف، على الأقل أكون حاولت.. أيمن الموضوع في ضرر لأهلي، وأنا خايف ليحصلهم حاجة.

- خلاص ماشي، كلمه، وإن شاء الله هيعرف يتصرف.

تاني يوم سبت موبايلي في البيت وأي حاجة يعرفوا يوصلولي بيها، وروحت القسم لزياد وحكيتله كل حاجة...

- موضوعك صعب يا هارون، وأنا مش متخصص فيه بس هحاول أساعدك.

= بالله عليك يا زياد ماتسيبني لوحدي، أنا مش عارف أعمل ايه، وخايف ليعملوا لأهلي حاجة.

- ماتخافش.. أنا هكلم ناس متخصصين في الموضوع دا وهنتصرف، اهدا إنت بس وماتفتحش نت خالص الفترة دي، وغير الموبايل والشريحة وأي حاجة ليها علاقة بالتكنولوجيا الحديثة أوي إكسرهما، وهما إن شاء الله مش هيعرفوا يوصلوك.

= حاضر.. ربنا يستر.

عدا ٤ ايام على مقابلتي لزياد وكان بيتصل بيا كل يوم يطمني إن أهلي بخير، وإنهم تحت المراقبة وماحدث هيقدر يوصلهم، والشرطة اللي متخصصة بالانترنت مش هتسيبني، وإنه معايا لحد ما يخرجني من الموضوع على خير .. كنت ممتن ليه جدا وبالذات إنه ماوصلنيش أي رسالة أو حاجة منهم خلال الأيام دي، ويعتبر ماكنتش بنام أصلا من القلق، لحد ما جاتلي مكالمة من زياد بيطمني فيها إن الموضوع قرب يخلص، وإنهم وصلوا لمواقع حساسة وقربوا يعرفوا مين اللي بيعمل فيا كدا.. كنت عارف إنه بيضحك عليا عشان يطمني مش أكثر؛ لإن مستحيل يعرفوا يوصلوا ليهم بالسرعة دي، بس بسبب بنبرة الخوف والقلق اللي كانت في صوتي، كان بيحاول يقول أي حاجة تقدر تطمني، وحاولت أقنع نفسي بكلامه حتى لو من جوايا عارف إنه كدبة.. والأيام اللي فاتت ماكنتش بنام غير كام ساعة، وكنت مرهق وتعبان جدا، وبعد ما زياد طمني شوية استسلمت للنوم، مش فاكّر نمت قد ايه، بس صحيت على صوت الباب وهو بيخبط جامد، ولما فتحت لقيته أيمن.. كان شكله خايف والقلق باين عليه، دخل قعد على الكنبه وهو ساكت، وبعد شوية قال...

- أنا آسف يا هارون، مش هقدر أكمل معاك في الحوار دا، النهاردا جاتلي رسالة على الموبايل فيها تهديد بطريقة غير مباشرة، واللي بيدخل السكة دي صعب يعيش.. أنا هاخذ مراتي وأعزل من المنطقة، وكسرت كل خطوطنا وأي معلومات عني وهمشي.. أرجوك ماتحاولش تتواصل معايا ثاني أنا مش مستعد أخسر ابني أو مراتي، أو حتى أخسر حياتي بالطريقة دي.. أنا آسف.

سابني وخرج وماستنأش حتى أقوله أي حاجة ومشني على طول.. شوية ولقيت فيديو اتبعت على الموبايل، ولما فتحت لقيته عن أي وهي

خارجة من البيت وبتشتري الطلبات، زي فيديو أختي بالظبط، ومع الفيديو رسالة مطلوب مني إني أروح مكان محدد عشان أشوف واحد يعرفني المهمة الجاية، واللي هتكون قتل شخص معين، ولازم بعد ١٠ دقائق أكون في المكان المطلوب.. قفلت الموبايل وقعدت أفكر هتصرف ازاى، وكان بقالي كذا يوم ماكلتش كويس وماعنديش أكل فقررت أخرج أجيب أي حاجة من الشارع، فتحت الباب عشان أنزل لقيت صندوق محطوط قدام باب شقتي بالظبط، ولما فتحته لقيته لابتوب جديد بدل اللي كسرتة.. بصيت على السلم مالقيتش أي حد فدخلت اللاب الشقة ونزلت أجيب أكل من الشارع، ولما طلعت وحطيت المفتاح في الباب ماكنش عايز يفتح، فضلت أحاول كتير بس الباب زي ما يكون مقفول بالقفل من الداخل! وبعد ثواني سمعت خطوات رجلين جوا الشقة وصوت الترباس بيتفتح، والخطوات اختفت تاني.. كنت واقف مكاني مش عارف أتحرك، وخايف أدخل وخايف أنزل في نفس الوقت.. بعد دقائق لفيت المفتاح والباب فتح.. الدنيا كانت هادية جدا ومافيش أي صوت.. خطواتي كانت بطيئة، وكنت حذر جدا وببص حواليا.. لحد ما لقيت حد لابس إسود بفرو كتير خارج من الأوضة وبيجري ناحيتي بسرعة وهو بيرقص، وظهر كام واحد من ورا الكرسي والستارة لابسين زيه وبيضحكوا بطريقة مرعبة، وفضلوا يقربوا مني، وكل ما يلمسوني أتكهرب.. لحد ما ظهرت بنت مش عارف جت منين وماسكة كاميرا وبتصورني وبتضحك وبتقولهم كفاية.. كانت ضربات قلبي سريعة جدا ومش قادر آخذ نفسي ومش فاهم هما دخلوا ازاى الشقة، البنات قعدت على الكنبه وابتدت تتفرج على الفيديو اللي كانت بتصوره وتضحك عليا .. بعد كذا بصتلي وأنا قاعد على الأرض، وطلعت سيجارة وابتدت تدخن...

= أدائك مش عاجبني يا هارون، ماينفعش تتعبنا معاك كذا كل شوية، احنا بنخسر بسببك.

- إنتي مين؟

= الحقيقة مش فاكرة أنا استخدمت أنهي اسم معاك، أصل هما كثير جدا.. بس رؤية الدم بتريح نفسيا مش كدا؟

كانت هاجر البنت اللي كلمتها على الفيس، أو الاسم اللي هي حبت تعرفهولي.. اتعصبت جدا ولسه هقوم أضربها، لقيت ٣ أشخاص اللي لابسين إسود هجموا عليا وكهربوني لحد ما وقعت على الأرض ومقدرتش أتحرك.. سألتها وأنا بجمع كل طاقتي علشان أتكلم.. ليه؟ وبعد سكوت قالت...

= ليه؟ الحقيقة إن أنا ذات نفسي مش عارفة ليه، بس الفلوس تخليك تعمل أي حاجة وكل حاجة.. في ناس بتدخل المنصات والمواقع بتاعتنا وبتدفع مبالغ كبيرة جدا في مقابل إنها تتفرج على حد بيتعذب، أو بيموت، أو بيواجه أصعب مخاوفه.. مهمتي في الأول هي إني أختار الضحية بأي طريقة، فيس بقي، أروح كافيه، أعمل أي حاجة، المهم إني أرجع بالطلب.. بوست الكاتنج كان الهدف منه إني أشوف أكثر بني آدم حساس وعنده قلب ومشاعر زيك كدا وآخده.. احنا بنحب النوعية اللي زي دي، لما بنواجههم بالفوبيا اللي عندهم يبقي شكلهم ممتع جدا، كل ما الخوف والفزع بيزيد في عيونكم كل ما الفلوس تزيد لينا أكثر وموقعنا بيكبر واللي وصلناله دا بعد سنين كتيرة من التعب والسهر..

جت قعدت جنبي ولعبت في شعري وقالت بهدوء...

= اسمع الكلام يا هارون، اسمع الكلام عشان ماتأذيش ماما.. اسمع الكلام عشان ماتموتش أختك.

شالت السيجارة من بقها وحطتها على وشي...

= واسمع الكلام وماتروحش ناحية الشرطة تاني، الشرطة وحشة يا حبيبي، ماشي؟

وسابتني وخرجت هي واللي معاها..وانا فضلت مرعي في الأرض مكاني مش عارف أتحرك وابتديت أفقد الوعي لحد ما سمعت ضرب نار قريب مني، وبعد شوية لاقيت زياد طالع وبيحاول يفوقني.. ولما فقت قالي إنه كان حاطني تحت المراقبة ، وإنهم لما لاقوا ناس مش من العمارة طالعين طلعا وراهم، ولاقوهم دخلوا شقتي، ولما نزلوا جم يقبضوا عليهم الرجالة هربت، بس هاجر هي اللي الرصاصة جت فيها وماتت.. ولما عرفت إن هاجر ماتت ارتحت وقلت إن الدنيا هترجع طبيعية تاني.. وفعلا عدا أسبوعين وكانت كل حاجة طبيعية جدا، وخليت أمي وأختي يعزلوا من المكان خالص، وغيرنا كل الخطوط والموبايلات، وابتديت حياتي من جديد.

وفي يوم لقيت ماسدج على موبايلي، ولما فتحتها لقيت فيها صورة الطابط زياد وهو مدبوح، وحواليه ٣ رجالة لابسين فرو لونه إسود.. قلبي اتقبض لما شفت الصورة وفضلت أتصل بزياد بس ماكنش بيرد ، ولما اتصلت بواحد زميلنا في القسم عشان أتأكد قالي إنهم لاقوه مدبوح في بيته ومش عارفين القاتل، قفلت الموبايل وإيدي كانت بتترعش من الرعب ، وفضلت قاعد مكاني لحد ما جتلي رسالة مكتوب فيها...

"انتقاما لأختنا... أنت القادم"

أنا سامع خطوات ماشية فوق السطوح وحد بيفتح الباب.. أنا خايف..

تمت.

٣- غرفة (٧٧٧)

حكايتي بدأت لما حصلتلنا ضائقة مالية كبيرة، واضطرينا نبيع البيت بتاعنا، ونشتري بيت أصغر بسعر قليل جدا في حته بعيدة عن السكان شوية.. عايز أقولك إني حتى وأنا قاعد بكتب، وحواليا التمايم والتعاويد، بس برضو خايف ليكسروها ويدخلوا ياخدوني في أي وقت.. مش هطول عليك عشان أنا كمان عايز أخلص حكي بسرعة وأخرج من هنا، بس لو جيت البيت في يوم وشففت رسالتي، أرجوك اخرج بسرعة.

في يوم والدي قرر إننا لازم نبيع بيتنا اللي عايشين فيه، ونروح بيت جديد بسعر أقل بسبب الخسائر الفادحة اللي حصلتلها في الشغل، ولو ماسدده الفلوس لأصحابها هيتسجن، وفي يوم ١ في الشهر خرجنا من بيتنا أنا والدي والدي وأخويا رامي وروحنا البيت الجديد واللي كان شكله قديم جدا، والحيطان من جوا متشققة، وفي منها متكسر كمان.. ومن أول ما دخلنا أمي حطت إيدها على قلبها وبصت لبابا...

= قلبي اتقبض.

- لا ماتقلقيش، عشان المكان جديد عليكي بس، وأضيق من بيتنا القديم.

مشيت بعيني في البيت وأنا واقف لسه على الباب، كان بيت عادي زي أي بيت.. دخلنا وابتديت أتمشي فيه وأتفرج عليه، كان في ٣ أوض وبدروم كبير، فاخترت أوضة، وابتديت أوضبها وأرص فيها حاجتي....

عدا ٤ أيام وكل حاجة كانت طبيعية خالص، رغم إن أمي من أول ما دخلت البيت قالت إنها مش مرتاحة وعايزة تغيره، بس أبويا رفض، وكان معاه حق لإن مافيش أي سبب مقنع إننا نمشي من هنا.. وفي يوم كنت بيتدي أنام لقيت رامي داخل أوضتي وقعد جنبي على السرير، وفضل ساكت شوية وبعد كذا اتكلم...

= ينفع أنام معاك؟

استغربت من سؤاله لأن راми طول عمره شجاع.. بصنتله من غير ماتكلم،
ووسعتله مكان عشان ينام جنبي...

= يوسف.. أنا وحشني بيتنا وجيرانا وصحابنا أوي، مش عايز أعيش هنا.
- وأنا كمان يا راми والله، بس هنعمل ايه، ماكنش ينفع نسيب بابا
يتسجن.

دخل تحت الغطا جنبي، وحضني جامد ونام.. بس أنا ماكنتش مطمئن
لحركاته، وبالذات إنه أول مرة يبجي ينام جنبي.. ولما جه الصبح كان
بيتصرف طبيعي جدا، وأنا ماعلقتش علي تصرفاته لإني ماكنتش حاطط
في دماغي أي حاجة وقتها، فسبته في الأوضة ورحت أشوف ماما وكانت
بتحضر الفطار. جه راми وقعد جمبي على السفرة وفضلنا ماسكين
الموبايل.. لحد مأمي جت فجأة ورزعت الأكل جامد على السفرة لدرجة
إننا اتخطينا وفضلنا باصين ليها بس هي مااهتمتش، وابتدت تاكل
بطريقة وحشة وبأيديها الاتنين وتحط شطة كثيرعلى الأكل لحد
مخلصت الشطة كلها اللي في البرطمان، وبعد مخلصت طبقها أكلت
الأكل اللي قدامنا كمان.. فضلنا باصينها أنا ورامي ومستغرين من
الموقف، وبعد ما خلصت الأكل شالت الأطباق وغسلتها، ودخلت
أوضتها من غير متقول ولا كلمة.. كل دا واحنا قاعدين مكانا ماتكلمناش..
بصيت لرامي وبحاول أفهم منه اللي حصل لقيته مش موجود، فقممت
مفزوع من مكاني وأنا مش فاهم ايه اللي بيحصل، وبسرعة دخلت أوضة
أمي بس برضه مالمقتهاش مع إنها لسه داخلة قدامي، ومش لاقيهم في
البيت كله.. وأنا بدور عليهم لقيت ماما وبابا ورامي داخلين من باب البيت
وشايلين بقيت عفش وحاجات من البيت القديم، فضلت واقف قدامهم
مش مستوعب اللي حصل...

= خد شيل من إيدي يا يوسف بدل ما إنت متتح كدا...

- كنتوا فين يا ماما؟

= أنا مش قلتلك امبارح إننا رايعين البيت نجيب بقيت الحاجة، وبالمرّة
نבص على عمّتك.

- امتي دا!

رد أبويا: يوسف مش عايز استهبال، خد البطيخة دي اغسلها وقطعها.
أخذت البطيخة ودخلت المطبخ أغسلها، وكل شوية أتلفت أشوفهم..
كانوا قاعدين عادي وبيتكلموا، وأمي بتحكي مع أبويا بشكل طبيعي ..
فأخذت رامي على جنب وكلمته...

= إنتو برا من امتي؟

بصلي باستغراب وجاوب..

- من امبارح العصر يا يوسف، مش إحنا سألناك يا بني تيجي تبات معانا
عند عمّتك وقلت لا هقعدهنا.

= والله ما حصل، ولا حد جه سألني منكم.. يا بني إنت نايم جنبي طول
الليل!

بصلي وضحك وكمل..

- يوسف أنا مقدر إنك عايز تمشي من هنا زي ماما، بس مش لدرجة إنك
تخوفنا يعني، إنت عارف لو أمك سمعت منك الكلام دا هتخرج دلوقتي،
اسكت بالله عليك هي قلقانة أصلا، واحنا بنهديها بالعافية.

سابني وراح أوضته، وفضلت أنا أفكر في اللي حصل، ولما جه الليل
ابتديت أحس بحركة تحت في البدروم وأسمع صوت حد بيتكلم..
فروحت أصحي رامي بس كان نايم ومش راضي يقوم معايا ، فولعت
كشاف الموبايل ونزلت أنا لوحدي.. كان ضلمة وهادي جدا ومافيش أي
حاجة من اللي كنت سامعها وأنا فوق.. البدروم كان بطول البيت كله

ومفتوح على بعض، ما عدا المكان اللي تحت أوضتي كان مبني فيه أوضه وبابها مقفول بقفل ، ومنقوش عليه بآلة حادة رقم (٧٧٧).. حاولت أكسر القفل بس ماعرفتش، وأنا واقف قدام الباب شفت نور جاي من ورايا فبصيت بسرعة وأنا مخضوض مالقيتش حاجة.. وقتها خفت وماكملتش تفتيش وطلعت أوضتي بسرعة .

عدا أسبوع على الموقف دا وكل حاجة كانت طبيعية جدا، حاولت أنسى اللي حصل وأقنع نفسي إن دي كانت مجرد تهيؤات بس ماعرفتش ،لأن كل مرة تحصل حاجة تثبتلي إن أنا كنت صح . وفي يوم كنت قاعد في أوضتي بالليل لقيت حد غريب لابس إسود وهدومه واسعة جدا داخل عليا الأوضة بسرعة رهيبة وبيخنقني.. فضل دايس على رقبتي جامد وكنت هموت بين ايده لحد ما أمي دخلت عليا فجأة وحضنتني، والراجل اختفى أكنه مش موجود.. كان وقتها وشي أزرق وباخد نفسي بصعوبة، فبصتلي أمي ومسحت العرق اللي على وشي...

= كنت نايمة فجأة قلبي اتقبض، وحاجة بتقولي قومي شو في ابنك.. مالك يا ضنايا؟

ماكنتش قادر أتكلم وماسك رقبتي، فأمی شالت إيدي لقت رقبتي حمرا، والصواب معلمة عليها.. أخذتني في حضنها وهي ساكئة ونمنا...

تاني يوم صحيت وقومت أدورعليها علطول فلقيتها قاعده على السفرة ومش بتعمل حاجة، قعدت جنبها وفضلنا ساكتين شوية وبعدين اتكلمت ...

= ايه اللي حصل امبارح؟

- ماعرفش يا يوسف.. ماعرفش، اقنع أبوك إننا نمشي من هنا أنا مش هستحمل العيشة كدا.

وسابتني وقامت، ساعتها حسيت إن في حاجة في البيت فعلا وإننا مش عايشين فيه لوحدنا.. افتكرت البدروم والأوضة المقفولة فنزلت أبص عليها تاني لقيت الشكل متغير.. كانت مليانة حاجات كتير وكلام مكتوب على الحيط، واللي لفت نظري الصليب المقلوب اللي كان موجود على كل جدار من جدران البدروم.. أنا متأكد إن ماكنش في أي حاجة من دي لما نزلت أول مرة . روحت ناحية الأوضة لقيت القفل مكسور والباب موارب ولسه هدخل لقيت حد بيحط إيده على كتفي، اتفزعت ولفيت بسرعة لقيته بابا، وبیسألني بعمل ايه هنا...

= إنت اللي بتعمل ايه هنا؟ وياه الصليب المتعلق دا!

كنت بكلمه بس هو مش بيرد عليا ، ولقيته مسكني من أيدي وبيخرجني برا الاوضة وبيقفل الباب عليه ، فضلت واقف برا وأنا سامع صوت خبط وناس بتصوت وبتعيط، لحد ما حصل انفجار والبدروم ولع، ومن قوة النار لقيتها طالعة من تحت الباب ولسعت رجليا.. كنت خايف جدا وطلعت البيت فوق بالعافية وأنا بزحف على السلم، وانا طالع لقيت بابا وماما نازلين بسرعة من فوق عشان يشوفوا مصدر الصوت، بصيت لبابا وماكنتش عارف أنكلم من الصدمة وشاورتلهم على باب البدروم من تحت.. فنزل بابا ولما فتح الباب ملاقاش حاجة والدنيا كانت هادية جدا، نزلت بصيت معاه المقيتتش النار ولا الصليب، والأوضة (VVV) مقفولة زي ما هي ومافيش أي أثر للحريق.. في اللحظة دي ابتديت أنكلم وحكيتلهم على كل اللي حصل، لقيت أبويا بصلي بعصبية وقالي بطل شغل العيال دا ومش هنمشي من هنا برضو مهما عملت إنت وأمك، وسابنا ومشي.. بصيت لأمي وعرفت من نظرتها ال مليانة خوف من البدروم إني مش لوحدي اللي بشوف حاجات غريبة هنا.. وبسرعة قفلت الباب، وأخذتني من أيدي وطلعت البيت تاني، وماحدث فينا أنكلم مع الثاني، ومن ساعتها الدنيا

اتلغبطت.. ببقى قاعد وألاقي الحاجة بتتهز وتقع من قدامي، أسمع أصوات ناس بتعيط وتصوت في البدروم، وبعد كذا أسمع صوت انفجار زي أول مرة، وكنت بشوف خيالات خارجة من الأوض بتاعتنا بالليل.. دا غير إني بطلت أبص في المرايا بعد آخر مرة بصيت فيها وشفّت واحدة بتعيط ووشها محروق واقفة ورايا؛ وقتها اتخضيت ولما بصيت مالقيتش حاجة علشان أبص تاني في المرايا وألاقيها واقفة قدامي وصورتي مش موجودة وبتصرخ في وشي.. خرجت مفزوع من الحمام، ومن ساعتها وأنا مغطي مرايات البيت كله. الغريبة إن كلنا شفنا وعرفنا إن البيت وحش، إلا والدي!.. راهي مرة جه بالليل وصحاني وكان بيتخانق معايا عشان دخلت أوضته وهو نايم وكنت بولع نار في سريره، وعلشان أصدق أخذني وراي مكان الحرق في السرير بعد ما طفى النار.. ومرة قالي إني كنت قاعد على الكنبه قدامه طول الليل وعيني عليه وما تحركتش من مكاني غير لما الفجر أذن.. وماما كانت دايمًا بتشتكي إن أدوات المطبخ بتختفي من مكانها، ولما بنزل البدروم كنت بلاقي الحاجات الضايعة.. وكل لما أنزل علشان أجيب لأمي الحاجة كانت عيني بتيجي على الأوضة المحفور على بابها رقم (٧٧٧)، وكنت بلاقي الباب مفتوح وفي نور لشمع طالع من جوا وأصوات تمتمة بس ماجاتليش الجراة إني أروح هناك تاني. لحد يوم ١٤ في الشهر، كنا الصبح وقررت أنا ورامي نخرج نسأل الناس اللي ساكنة قريب منا عن سر البيت دا، وقتها سمعنا كلام كثير جدا.. زي إن صاحب البيت كان عامل مصنع في البدروم لصناعة الصابون، وفي يوم حصل عجز في الشغل وقرر إنه يعاقب كل العمال ويقفل عليهم باب البدروم لحد ما يخلصوا كل الكمية المطلوبة منهم في اليوم، وحصلت حريقة في البدروم وماحدث نجا بسبب إن المدير كان قافل عليهم الباب من برا بالمفتاح. وواحد قال إن البيت دا مبني على أنقاض سجن كانوا بيعذبوا فيه الناس. ومجموعة قالت إنه كان بيت عادي، لحد ما في يوم دخلوا شوية شباب من عبدة الشيطان وسكنوا فيه وابتدوا بيعملوا الطقوس بتاعتهم في البدروم، وفي يوم البيت ولع بيهم، ويقال إنهم قدموا روحهم قربان للشيطان، وإن ما فيش حد جه وسكن البيت دا إلا وحد من الأسرة اتسحب لتحت كقربان للشيطان، وإنهم يرجعوا

كل يوم عشان يشوفوا لو حد جه سكن في البيت ولا لا ، ويتندوا يجهزوا البدروم لتقديم القربان مرة في كل نص شهر.

بعد ما سمعنا الكلام أنا ورامي روحنا البيت بسرعة وحكيينا لماما، وابتدينا نلم الحجات المهمة عشان أول ما بابا يرجع من الشغل نمشي على طول قبل نص الليل، وفضلنا نتصل عليه كثير بس كان موبايله مغلق، لحد ما الساعة جت ٨ ولسه ماجاش، فأمي طلبت ميني أنا وأخويا إننا نخرج من البيت، بالذات بعد ما ابتدينا نسمع خبط في البدروم وناس بتجري تحت أكن فيه إستعداد لحرب ، وإحنا بنتكلم سمعنا صوت بابا بيصرخ من تحت، فنزلنا البدروم بسرعة عشان نلاقيه مكتف على صليب، وناس لونها إسود طويلة بترقص حواليه، والشموع قادة.. ومن أول ما شافونا هجموا علينا وفضلوا يضربوا ويقطعوا في جسمنا، وابتدوا يموتوا والدي .. في اللحظة دي لقيت شاب ماعرفهوش وراجل عجوز لابس جلابية بيضا داخلين الأوضة ، والراجل ابتدا يقرأ قرآن ويقول كلام غريب، وكان المكان يولع من حوالينا وصوت الصرخ بيعلى لحد ما الحيطه بتاعت الأوضة وقعت وشففت هياكل عظمية لناس محطوطين على صليب وشكلهم كانوا متقدمين قربان برضو.. مش فاكر قعدنا وقت قد ايه واحنا جوا البدروم بنحارب ما بين الحياة والموت، بس بعد عناء الأشكال اختفت، والنار اتطفت من المكان، وصوت الصرخ اختفى.. لقيت الشاب جري على أخويا رامي ويحضنه ويحمد ربنا إنهم ماتأخروش أكثر من كدا.. اتصلنا بالإسعاف ونقلنا بابا على المستشفى وكان جسمه كله جروح ودم، واتعالجنا احنا كمان من الجروح والحرائق اللي صابتنا ، وبعد ما هدينا سألت رامي مين الراجل والشاب ؟ قالي إن دا واحد صاحبه والده شيخ، فحكاله كل حاجة واداله عنوان البيت، وإن لورامي ماكمهوش قبل الساعة ٨ يبقى يجيب والده وييجي عشان وقتها هنكون في خطر.. ولما الشيخ جه المستشفى يزورنا طلبت منه أعرف قصة البيت كاملة وبالذات الأوضة، بس مارضاش يقول واكتفى بجملة إن الرقم المنقوش على الأوضة من برا دا بتاع عبدة الشيطان، وإن هما اختاروا والدك كقربان ليهم، وكويس إن هو صرخ قبل الساعة ١٢ عشان تلحقوا تنقذوه، وإلا كانوا هيفضلوا يقطعوا في جسمه ويقدموه قربان لحد ما يموت.. وماقالش أي حاجة عن طريقة

أسره وليه هو الوحيد اللي ماكنش شايف اللي بيحصل في البيت، وادانا شوية أدعية وآيات قرآنية نمشي عليها فترة ولازم نلتزم بيها..
أنا عارف إننا بعد ما نمشي البيت هيتسكن تاني زي ما اتسكن لينا واتسكن للي قبلينا.. علشان كدة أنا سايبلك القصة دي هنا على الطرايزة قدام الباب ، علشان أول متدخل البيت تقرأها ، وتأخذ عيلتك وتمشي من هنا على طول.

تمت.

٤- مشروع إيجار

القصة اللي هتقرأها النهاردا مختلفة عن أي قصة قرأتها قبل كدا، مش هتبقى مجرد أحداث للزمن الحاضر أو قصة خرافية عن المستقبل.. المرة دي هترجع بالزمن لورا شوية وبالتحديد في أواخر التسعينات، واعذرني لو هتلاقي بعض الكلمات اللي بقولها قديمة أو غريبة شوية عنك، بس أنا متأكدة إنك هتفهم قصتي كويس، أنا عارفة إن الجيل الحالي ما عندهوش صبرولا طول بال للمقدمات الطويلة، عشان كدا هرضي فضولك وهبتدي معاك على طول..

"نوفمبر ١٩٩٥م"

الدنيا برد وكل واحد قافل بيته عليه، ماكنش في نت ولا موبايلات حتى التلفزيون ماكنش متوفر عند الكل وبالذات هنا في حي سكني، كنا ناس على قد حالنا..

"الحسين"

الحسين واللي حواليه من أجمل الأماكن اللي هتشوفها في المحروسة، جدرانها وشوارعها كفيلة ترجعك بالزمن سنين لورا، أيام ما كنا بنستنى حفلة أم كلثوم الساعة ١٠، ولما كنا بنستنى التجمعات واللمة العائلية.. حاجات كتير مش لاقياها وأنا عايشة دلوقتي.. المهم، نرجع تاني لأول سطر.. كان أول حمل ليا بعد ٣ سنين جواز وكان عندي ٢٥ سنة وقتها، فرحتي كانت كبيرة جدا وبالذات إني عرفت نوع الجنين.. طول عمري كان نفسي في بنت تقف جنبي زي ما أنا كنت مع أي لحد آخر نفس ليها، كنا ساكنين في أوضة على السطوح أنا ومحسن جوزي، ورغم إن هو ماكنش حيلته اللضا حتى بس أطيب كان وأحسن إنسان قابلته في حياتي، وكان بيعمل المستحيل عشان يقدر يجمع فلوس ونقل لشقة ملك قدام مقام سيدنا الحسين، وجهده وحماسه زادوا أكثر بالذات لما عرف إن في

طفل جاي في الطريق وماينفعلش نكمل قاعدة في الأوضة اللي على السطح دي.. كانت حياتنا صعبة ومجهددة، بس كان كله بيهون لما بيجي بالليل ونقعد مع بعض.. لحد ما الدنيا قررت إنها تلعب معايا لعبة ماحدث فينا بيحبها..

" ١٥ نوفمبر ١٩٩٥ "

كنت واقفة بترعش من البرد وأنا ببص من سور السطوح وماسكة بطني من الوجة.. الساعة وصلت ل ١٢ بالليل ومحسن لسه ماجاش، مع إن معاد رجوعه من الشغل الساعة ٨.. كنت قلقانة ومش عارفة أوصله ازاى ولا عارفة أي أخبار عنه ، وعدا الليل بطوله وكان أطول ليل عدا عليا في حياتي، ويوميها نمت مكاني على البلاط من الوجة والتعب.. عدا ٣ أيام وأنا بنزل كل يوم أسأل عليه في الشوارع ومكان شغله ومش لاقياه، آخر حاجة عرفتها إنه خلص شغل وخرج عشان يروح وماحدث شافه بعد كدة.. وفي اليوم التالت قررت أروح للشرطة عشان يساعدوني، وأنا نازلة من العمارة لقيت واحدة من الجيران لابسة إسود وكانت طالعلي، ومن أول ما شافتي أخذتني بالحضن، وبتقولي البقاء لله.. ماكنتش عايزة أفهم قصدها، أكيد مش قصدك على الإنسان الوحيد اللي طلعت بيه من الدنيا.. بصيبتها وسألتها حصل ايه؟ ردت وهي بتعيط كنوع من أنواع مشاركة الحزن معايا...

- القسم بعت واحد يبلغك باللي حصل .

= وبعدين؟

- لما كان مروح من الشغل العربية اللي كان فيها اتقلبت، كان لسة فيه الروح لما اتنقل للمستشفى بس روحه طلعت لربنا بسرعة.. شدي حيلك يا حبيبتى.

كنت بسمع كلامها ومافيش على وشي أي ملامح للتعبير، زي الحجر واقف ما أثرش فيه الكلام، كان قلبي بيتقطع من جوايا بس الثبات فضل ظاهر عليا.. قعدت على السلم وكان على لساني كلمة واحدة بس.. "إنا لله وإنا إليه راجعون" ..

بعد دفن محسن رجعت للبيت لوحدي وكان شكله ضلمة وكئيب، وبمجرد ما دخلت وقفلت على نفسي الباب انفجرت في العياط، التماسك اللي كنت فيه قدام الناس راح، وبقيت أعيط زي الطفلة وأنا ماسكة هدومه.. لازم أعترف إن موت أبويا وأمي من قبله علموني أفضل متماسكة قدام الناس عشان ماحدث يشفق عليا، وللأسف محسن مشي وسابني أواجه كل اللي جاي لوحدي، بس قبل ما يمشي كان سايب في الدنيا حته منه وهي اللي كانت بتديني القوة إني أكمل . بعد ٣ شهور جت أشرفت، بس على قد فرحي إنها جت أخيراً على قد ما كنت زعلانة إن عيلتنا اتكتب عليها تفضل من فردين بس.. ال ٣ شهور اللي كانوا قبل ولادة أشرفت كانوا صعيين جدا، ماكنش معايا فلوس وكنت عايشة على الوجبات اللي بتجيلي من وقت للتاني، ومن أول ما ولدت نزلت أشوف أي دكان أقف فيها عشان أقدر أصرف على بنتي، وفضل الحال من صعيب لأصعب لحد ما أشرفت بقي عندها سنة، ساعتها صاحب المحل مشاني وجاب حد فاضي للشغل.. طلعت الأوضة اللي على السطوح ودي كانت أول مرة أعيط على حالي بعد موت جوزي وحسيت إن خلاص بقيت لوحدي وإن ماليش سند في الدنيا دي ولا حد أتكل عليه وقت ماتع.. وأنا قاعدة بعيط لقيت الباب بيخبط، ولما فتحت لقيت ٢ رجالة ببدل وشكلهم بشوات، طلبوا يتكلموا معايا وسمحتلهم يدخلوا..

= خير يا بيه؟

- مدام فاطمة احنا تبع الهيئة السكنية، في الفترة الأخيرة الدولة بقت مهتمة جدا بشعبها وهدفنا الوحيد إننا نوفر للناس عيشة هنية بأقل سعر، وعلشان كذا ابدينا ندور على الناس اللي محتاجة سكن، والأرامل والأيتام، ونوفرلهم المكان المناسب حتى لو خارج المحافظة.
= طب كويس..

- حاليا احنا مكلفين إننا ندور على أكثر الناس حاجة في الحسين ونوفرلهم عيشة كريمة، وبصراحة كذا مالقيناش حد حاله أقل منك عشان ياخذ الفرصة الكبيرة دي.

= حضرتك جاي توفري عيشة كويسة ولا تذلي بالكلام الأول!
سكت وبعدين رد الراجل اللي جنبه..

- أكيد مش قصدنا كذا يا مدام، احنا بس بنشرحلك السبب اللي ممكن تفكري فيه بعد كذا، وهو اشمعنى انتي.. ها رأيك ايه؟
= طب محتاجة أعرف معلومات أكثر، يعني هسكن فين وهشتغل ازاى؟
كدا يعني..

- من ناحية السكن، فللأسف الدولة مش عاملة أماكن كتير في القاهرة لحد دلوقتي، واللي اتعمل اتاخذ خلاص، فحضرتك هتروحي معانا إسكندرية في حي راتي ونضيف جدا وعمارة من ٥ أدوار، ليكي شقة فيها وطبعاً مش هتبقي فيها لوحداك، هتلاقي ناس كتير واقفين تحت هيسكنوا معاكي برضو، عشان تطلعوا العمارة سوا. أما لسؤالك الثاني، الحالات اللي زيك الدولة وفرتلهم معاش شهري كبير، حتى لو جوزك ماكنش شغال في الحكومة.

كنت بسمع عرضهم وأنا مش مصدقة دا حلم ولا حقيقة! كنت خايفة
ليكون بيضحكوا عليا أو يطلبوا فلوس كتير عشان السكن، وأنا مش معايا
حاجة..

= طب يا بيه، أنا ما حلتيش ربع جنيه حتى، هدفع إيجار أول شهر ازاي
بس؟

- ماتشيليش هم الموضوع دا، أول شهر السكن مجاني، والدفع من الشهر
التاني، والإيجار بسيط جدا ما كنتيش تحلمي إنك تدفعيه في إسكندرية،
حملة مشروع الإيجار اللي عملته الدولة هدفه واضح وصريح "توفير
عيشة كريمة للشعب"، وإنتي فكري واحنا هنيجي بكرة، ولو موافقة
هتروحي معناها على طول على إسكندرية.

= بكرة على طول؟ مش مستعجل أوي!

- ما احنا مش فاضينلك يا مدام، آخر يوم لينا في المنطقة بكرة علشان
نروح باقي المناطق.. ها قلتي ايه؟

= موافقة طبعاً.

ما كنتش مصدقة اللي بيحصل وإني أخيراً هسيب الفقر دا وأمشي، كنت
حاسة إني بحلم وخايفة أصحى من الحلم، ومن فرحتي ما كنتش
عارفة أنام اليوم دا وفضلت أبص في كل ركن من أركان الأوضة وأفكر
ذكرياتي فيها مع محسن، كنت ماسكة صورته وأنا بتكلم معاه، وأطمنه
إن بنته هتكون بخير، واللي بيحلم بيه أخيراً هيتحقق من عند ربنا.. لميت
كل حاجة عايزة آخدها معايا في الشنطة واستنتهم يجوا، ومع الشروق
لقيتهم بيخبطوا على الباب وبيستعجلوني عشان العربية واقفة تحت..
وبعد ساعات وصلت إسكندرية، وكانت فرحتي كبيرة جداً، وحت
اللحظة اللي مستنياها.. العربية وقفت تحت عمارة ونزلتني أنا وبنتي،

العمارة كانت كبيرة وليها بوابة صغيرة بس تحسها ضلمة من جوا.. ولما نزلت لقيت كذا شخص و واقفين تحت العمارة بشنط ومعاهم ناس ببدل زي اللي معايا، وكان شكلهم إن دول السكان الجداد بتوع العمارة فروحت وقفت معاهم، وقبل ما نطلع وقف واحد من البشوات وقال...

- أهلا بيكم في إسكندرية، هنوزع عليكم أرقام وكل واحد هيدخل الشقة اللي عليها رقمه.. الشقة مجهزة من كافة الأجهزة اللازمة وفيها مياه كمان.

وفضل يقول كلام كتير كدا مش فاهماه، وفي الآخر طلعتنا.. العمارة كانت من ٥ أدوار واحنا ٥ أفراد، وكل واحد خد شقة في دور حسب الرقم اللي مع كل واحد.. الناس اللي جاية تسكن لاحظت إنهم زي مش من إسكندرية، لأن كان في بنت باين عليها إن أول مرة تبقى لوحدها في مكان زي دا وكانت متوترة ومش عارفة تتصرف والشنطة كل شوية تقع منها. وراجل كبير في السن ومعاه مراته ، و ٢ رجالة كمان ، واحد في العشرينات، والثاني في الثلاثينات. بعد ما تفحصت الناس والعمارة، لقيت شقتي في الدور الرابع، فتحت ودخلت علشان أبتدي حياة جديدة وقصة جديدة..

أول يوم ليا ، صحيت الصبح ودخلت البلكونة علشان أتفرج على إسكندرية وجمالها، ممكن تشم ريحة البحر من هنا.. وأنا واقفة افكرت محسن جوزي وقد ايه كان نفسه نعيش اللحظة دي سواء رجعت بالذاكرة لسنة وكام شهر، وافكرت لما دخلت عليه في المستشفى، كنت ماشية ببطء ناحية السرير وخايفة أشيل القماش من على وشه، ماكنتش عايزة أشوفه بالمنظر دا علشان صورته ماتتبتش في عقلي.. أخذته في حضني، وهمست في ودنه وأنا بعيط "هتوحشني.. هتوحشني أوي والدنيا هتبقى وحشة من غيرك"..

قاطع تفكيرني سيجارة نزلت على دراعي من فوق، اتخضيت وبصيت ولسه هبتدي أزعق، لقيت راجل عجوز ولايس نظارة..

= أنا آسف يا بنتي، وقعت من إيدي..

- خلاص يا حاج، ولا يهملك.

= أنا شفتك امبارح تقريبا ، إنتي جاية معنا؟

- أه يا حاج، لسه أول يوم ليا هنا.

= طب يلا تعالي افطري معنا، دي خالتك أم أحمد عليها حبة بتنجان
مخلل هتاكلي صوابعك وراهم..

- تسلم يا حاج ربنا يخليك، لا مش هتقل عليكم بقي.

= يا بنتي اطلعي أنا اللي بقولك.

- حاضر يا حاج.

أخذت بنتي وطلعت عندهم فوق وكان الباب مفتوح، ولما دخلت الشقة
حسيت إنني داخله متحف ! الشقة مليانة لوحات وصور لفنانين.. جت
ست كبيرة بتمشي بالعافية وسلمت عليا أكنها عارفاني من سنين و
أخذتني وقعدنا على الكنبة اللي في الصالة..

= اسمك ايه يا حبيبتي؟

- فاطمة يا ماما، والقردة دي أشرفت.

= ياه.. بقالي كتير ماسمعتش الكلمة دي.

- ليه! او مال فين أحمد؟

اتنهدت الست بحزن وبعد سكوت قالت..

= أحمد برا مصر، بعد ما خلص علام خد مراته وسافر، الأول كان بيبيعتلنا
اللي يكفيننا كل شهر وفضل على كدا شوية، وبعدين ماعدش بيعت

حاجة، واحنا ناس غلابة وعمك شوقي مابقاش قادر يقف في الدكان
ونظره على قده، يا خسارة تربيتي فيه ...

دخل عم شوقي بأطباق الأكل وهو بيتكلم...

- ما خلاص بقى يا حاجة، إنتي كل ما تشوفي حد تقعدي تحكيه قصة
حياتك، سيبى البنات تاكل لقمة الأول.

قالت وهي بتقوم من على الكنبة بالعافية...

= أهو أديني بفضفض شوية.

بعد ما حطينا الأكل على الطبلية، قال عم شوقي وهو بياكل الجرجير...

- وإنتي منين بقى يا فاطمة؟

= من مصر يا عمي، كنت ساكنة في أوضة فوق السطح عند سيدنا
الحسين.

- اومال فين جوزك يا بنتي؟

حكتهم اللي حصلي من ساعة وفاة زوجي، والناس اللي جت عرضت
عليها السكن، فردت الحاجة كريمة...

- احنا برضو كنا على باب الله، وصاحب الملك كان عايز إيجاره،
ومابقيناش عارفين لا ندفع إيجارولا نجيب لقمة ناكلها، مع إن العيشة
عندنا في الفيوم أحلى من هنا والله، والواحد كبر في السن وماعدش في
حمل للشحطة كدا.. لا وكمان مدينا آخر دور علشان لا نزل ولا نطلع،
نفضل قاعدين كدا!

= أنا فعلا مستغربة ليه اداكوا آخر دور! مع إنكم المفروض تاخذوا الدور
الأرضي علشان يبقى سهل الطلوع والنزول.. بصي على العموم أنا ممكن
أكلمك صاحب الشقة اللي في الأرضي وأقنعه تبدلوا.

- يا ريت يا بنتي، تكسبي فينا ثواب.

على أذان الظهر كنت نازلة من عند عم شوقي والحاجة كريمة، ناس طيبين أوي والدنيا شحتططهم جامد.. الست قعدت تحكي لي قد ايه تعبت وشقيت علشان تعلم ابنها وفي الآخر سابهم ومشى ومابقاش يعبرهم.. كان باين عليها الحزن ومعظم الوقت كانت سرحانة. دخلت شقتي وحطيت اللعب قدام أشرفت ونزلت علشان أكلم الناس اللي في الدور الأرضي، ولما نزلت فضلت أخبط كتير ما حدش فتح، وقبل ما طلع سمعت صوت الترياس والباب انفتح حته صغيرة، وظهر نص وش الراجل بس...

= صباح الخير.

- خير؟

= ينفع دقيقة بس؟ عايزة أتكلم مع حضرتك شوية.

قال وهو بيقفل الباب...

- لا.

= طب ثواني يا.. يا أستاذ.. دي مش معاملة جيران دي على فكرة!

طلعت شقتي وأنا بفكر مين الراجل دا؟ وليه إتصرف بغرابة كدة! وأنا قاعدة علي الكرسي بفكر لاحظت الهدوء اللي حواليا وأشرفت مش سامعها صوت، بقيت أدور في الشقة وأنده عليها بس مش لقيها، ساعتها محستش بنفسي غير وأنا بفتح باب الشقة وخارجة أنه عليها وأصوت على السلم، فلقيت اللي ساكنين في ٢ و٣ طلعا وقتلهم اني كنت سايبة بنتي جوا ومش لاقياها، فدخلوا يدوروا عليها جوا، والحاجة كريمة خرجت من الشقة وكانت نازلا لي.. وهي على السلم سمعت صوتها وهي بتنده عليا وبتقولي بنتك هنا أهي.. فطلعت بسرعة على الدور

اللي فوق لقيت أشرفت قاعدة على السلم بين الدور بتاعي ودور الحاجة كريمة، أخذتها في حضني وأنا مش فاهمة ازاي خرجت وأنا قافلة عليها الباب قبل ما انزل! وفي نفس اللحظة سمعت صريخ من البنت اللي جوا شقتي وهي ماسكة في الولد اللي جنبها جامد وباصبة ناحية البلكونة.. ولما دخلت الشقة بصولي باستغراب وأنا شائلة بنتي، لقيت البنت بتقول في ذهول...

= بنتك الثانية نطت من البلكونة..

- بنتي الثانية مين! بنتي لقيتها وعلى دراعي أهي..

بصت البنت للولد ال جنبها بصدمة وسألته..

= إنت شفت اللي حصل!؟ في واحدة نطت من البلكونة.

زقها الولد وخرج من الشقة من غير ما يتكلم، وسمعنا صوت قفلة باب شقته واحنا مكانا، بصتلي البنت وهي بتقولي إنهم سمعوا خروشة في الأوضة، ولما دخلوا لاقوا البنت واقفة على السور وبعدين نطت.. بصراحة إفتكرتها مجنونة وقلتلها يمكن بيتهياًلك، بس هي فضلت بصالي شوية وبعدين سابتني وخرجت.. قعدت على الأرض وأنا حاضنة أشرفت، بس فجأة لقتها بتصرخ وتعيط وبتقولي "ماما.. عو"، بصيت مكان ما بتشاور على البلكونة لمحت طيف إسود اتحرك بسرعة واستخبي، حطتها على السرير ودخلت البلكونة بهدوء بس مالقيتش حاجة، ولما خرجت تاني للأوضة مالقيتش أشرفت علي السرير وسمعت صوتها بتعيط من الصالة، فجريت عليها لقيتها قاعدة جنب باب الشقة والمسافة ما بين الأوضة والباب مستحيل طفلة تلحق تنزل من على السرير وتجري وتروح تقعد جنب الشقة بالثبات دا! دا أكن حد شالها ونقلها من مكانها.. وقتها حسيت بحاجة غريبة في الشقة، وإني مش عايشة فيها لوحدي..

عدا أسبوع على موضوع أشرقت والدنيا كانت عادية جدا، وخلال الأسبوع دا اتعرفت على الجيران اللي ساكنين معايا، ما عدا الراجل اللي ساكن في الدور الأرضي. في الدور الثاني بيسكن جرجس، والتالت عرفت من الحاجة كريمة إن اللي ساكنة فيه اسمها أسمهان، وإنها لسه طالعة من دار أيتام، ومش لاقية مكان تقعد فيه. وخلال الأسبوع دا كونت مع الحاجة كريمة وعم شوقي وجرجس علاقات كويسة، وبقينا نطلع كل يوم السطوح المغرب نقعد لحد بالليل نهزر ونضحك، وكل واحد يحكي عن حياته.. والمفروض إن النهاردا دور جرجس إنه يحكيلنا جه هنا ليه ، وعلى العصر قررت أنزل الشارع لأول مرة علشان أجيب شوية درة للقاعدة فوق، الغربية إن الشقة كان فيها أكل يكفي شهر وماكنتش محتاجة أنزل خالص، وأول ما نزلت من العمارة وخرجت الشارع، لاحظت نظرات غريبة من الناس، وإن الكل بيحاول يتجنبني، حتى العيال الصغيرة بيبعدوا عني؛ كنت مستغربة لدرجة إني شكيت إني نازلة الشارع بهدوم البيت، وماكنتش فاهمة سر نظراتهم، وبعد ما خرجت من الشارع خالص ورحت شارع تاني لقيت الناس فيه عادية جدا، وماחדش بيبصلي ولا حاجة.. فضلت ماشية وأسأل الناس على درة، لحد ما لقيت وجبت وروحت، وبرضو مجرد ما دخلت الشارع عندي الناس اتجنبت المعاملة معايا .. وقتها مااهتمتتش للموضوع وقولت يمكن علشان جديدة في المكان ، وبعد المغرب كنت قاعدة فوق على السطح بتفرج علي الغروب وبشوي درة لبنتي ولباقي السكان لما يطلعوا، بعد شوية لاقيت أسمهان طلعت وجت قعدت جنبي بإبتسامة، ودي كانت أول مرة تيجي تقعد معايا من نفسها.. بصيتها وابتسمت، وابتديت أتكلم معاها وأنا بقلب الدرة من على النار...

= السطح نور.

بتلعثم ردت...

- منور بيكي.

= فكي وفرفشتي كدا واقعدي معانا، ما حدش واخذ منها حاجة والله.

..... -

حطيت إيدي على إيدها وبصيت في عنيتها، وابتديت أتكلم بجدية...

= أسمهان.. أنا صحيح ما عرفكيش، بس أنا ارتحتلك من أول ماشفتك
ويعتبرك زي أختي الصغيرة، وقت ما تحبي تتكلمي في أي حاجة في أي
وقت خبطي على بابي وأنا هسمعك.

كان باين عليها التوتروان في حاجة عايزة تقولها، وكانت بتضغط على
صوابها باستمرار وبتبتسم غصب عنها ومش بتتكلم، لحد ما لقيتها
قامت مرة واحدة وبتجري على سور السطح.. بصيت لقيت بنتي بتجري
هناك وكان فاضلها خطوة وتقع من عمارة ٥ أدوار، لولا أسمهان جريت
ومسكتها بسرعة، كنت قاعدة أكني متكتفة.. وبعد ما فقت من الصدمة
جريت خدت بنتي في حضني وأنا ببص لأسمهان وبقولها شكرا.. بس
أشرفت كانت بتسقف وتقولي " يلا نط .. عمه .. "، بصيت لأسمهان
لاقيتها وقفت وقالت...

- ماتقعديش هنا لوحداك.

وسابنتي ونزلت.. وقتها حسيت إن في حاجة على قلبي، فأخذت بنتي
وطفيت النار ونزلت شقتي بسرعة وإستنيت باقي سكان العمارة علشان
نطلع كلنا نقعد فوق زي كل يوم.. وبعد شوية لقيت جرجس بيخبط
عليا...

= إنتي نايمة ولا ايه؟ ماما كريمة عايزة تطلع دلوقتي.

هزيت راسي وكان باين عليا الشرود..

= مالك يا فاطمة؟ حصل حاجة؟

- لا.. لا مافيش حاجة، اطلعوا إنتوا وأنا هغير للبننت وآجي.

حسيت إنه مش مقتنع بكلامي وكانت عنيه جوا الشقة وأنا بكلمه ، بصلي وهز راسه وطلع ، وبعدين أخذت بنتي علشان أطلع معاهم، بس قبل ماطلع نزلت للراجل اللي في الدور الأرضي، ولما خبطت فتح على طول.. كان راجل في الثلاثينات باين عليه الاجهاد والتعب..

= احنا بنتجمع كلنا فوق السطوح كل يوم زي دلوقتي، أتمنى تيجي تقعد معانا وماتفضلش قاعد لوحدك كدا.

هز دماغه من غير أي تعبير، واستنى لما طلعت بعدين قفل الباب. طلعت فوق لقيتهم كلهم قاعدين وأسمهان معاهم كمان، بس ماחדش فيهم بيتكلم....

= خير يا جماعة قاعدين كدا ليه؟

رد جرجس وهو قايم عشان يولع النار للدرة...

- أبدا يا ستي، ماما كريمة عمالة تعيط، وتقول أحمد بيجلها كل يوم بليل يقعد معاه شوية ويمشي، وهي عايزاه يفضل قاعد معاه على طول.

رد عم شوقي وهو متعصب ويوجه الكلام لمراته...

- يا ولية.. يا ولية الناس هتقول عليكي خرفتي، أحمد مين اللي بيجي ويأكي كل يوم دا، اشمعني بيجيلك إنتي وأنا مش بشوف حاجة!؟

= ما إنت بتبقى نايم، وآجي أصحيك ما بترضاش تصحى.

شوح عم شوقي بإيده ولف وشه الناحية الثانية وكمل تدخين في باقي السيارة .. فروحت قعدت جنبها وهي بتعيط وقتلتها...

- كفاية إنه بيجيلك كل يوم، احمدي ربنا إنه بقى يبجي حتى ولو حبة صغيرين، أوعدك المرة الجاية أنى هطلع وأقوله يقعد معاكي على طول، ماشي؟

مسحت دموعها وهي بتضحك وبتقولي ماشي، بصيت لأسمهان لقيتها بتبصلي جامد، ومن أول ما بصتلها ودت وشها الناحية الثانية.. روجت قعدت جنب جرجس لقيته بيقول...

= إنتي عارفة إن مش أحمد هو اللي بيجيلها، متأكدة إنك هتطلعيلها بالليل؟

بصتلها وأنا مش فاهمة قصده...

- يعني ايه؟

= مش معقول تكوني قاعدة هنا كل دا وماخدتيش بالك من اللي بيحصل في العمارة !

- جرجس أنا ماحبش الألباز، اتكلم بوضوح..

سكت شوية وبعدين قال...

= يبقى لسه دورك ماجاش.

ماكنتش فاهمة بيتكلم على ايه بالظبط، أو كنت فاهمة بس مش عايزة أقنع نفسي باللي في دماغنا.. بعد دقيقة لقيته بينده على الكل عشان يجوا يقعدوا جنب بعض، وييتندي يحكي قصة حياته، وقبل ما يبدأ لقيت إسلام اللي في الدور الأرضي طالع بتردد وجاي يقعد وسطينا وهو ساكت، بصيت للكل وأنا بتتسم وبقول لجرجس..

= كدا العيلة كملت وكلنا موجودين.. ابدأ يلا.

بيحكي جرجس:

اتولدت في بيت ماحدث يحلم بيه، كل وسائل الرفاهية المنزلية متاحة وطلباتي كلها مجابة، بس لما الدنيا تديك حاجة كبيرة مش عند حد، إعرف إنها هتاخذ منك حاجة أكبرعشان ماتعرفش تعيش مبسوط بالي معاك.. كنت مستعد أبيع كل حاجة مقابل إن أمي ترجع وتعيش معايا أنا و والدي تاني.. اللحظة اللي اتولدت فيها اتيتمت فيها، الولادة كانت صعبة عليها جدا وآخر نفس خرج منها كان أول نفس آخده أنا في الدنيا، دايمًا كنت مفتقدها في حياتي وكان نفسي تكون موجودة وتاخذني في حضنها كل يوم قبل مانام.. فترة ابتدائي وإعدادي كانت من أصعب الفترات في حياتي لإني كنت لوحدي على طول، أبويا كان بيخاف عليا لدرجة إنه مش بيودييني المدرسة خالص وبيجبلي مدرسين في البيت.. حياتي كانت عبارة عن أوضة النوم والكتب وجنينة البيت والكلب بتاعي.. ماكنش عندي صحاب ولا أبويا حتى كان قريب مني، ودايمًا في الشغل والسفر.. أنا عارف إنه كان بيحبني وخايف يخسرنى زي أمي بس خوفه عليا خلاه يحبسني أكني حيوان أليف عنده ومالهوش حق يختار حياته، ويوم ما بخرج مش بيسبني اخرج لوحدي لازم يكون موجود معايا او حد من الخدم في غيابه .. إحساس صعب لما يكون عندك كل حاجة بس مش عارف تستمتع بيها ولا عارف تعيش.. جيت في مرحلة الثانوية وقلت لأبويا إني زهقت منه ومن تحكمه في حياتي وإني عايز أخرج وأسافر وأعيش...

= مش فاضي يا جرجس.

- إنت دايمًا مش فاضي، وعمرك ما اهتميت بيا وسمعتني زي بقيت الآباء.

اتنهذ وقال بعصبية...

= قلتلك مش فاضي دلوقتي، احنا بنخسر والشركة بتنهار، وأنا مش فاضي للدلع بتاعك دا.

بصتله وأنا زعلان...

- أحيانا بتمنى إن أمي هي اللي تبقى عايشة، مش إنت..

وسبته وخرجت.. وعدا أسبوع على الموقف دا وماحدث فينا كان بيكمم الثاني، أنا على طول في أوضتي بقرأ في كتب وبتقف نفسي، وهو على طول في شغله. لحد ما في يوم سمعت الخدم وهما بيقولوا إن المشروع اللي أبويا دخل فيه كان فاسد وخسر فلوسه، وإنه كان مراهن على الشركة وراحت مننا، دا غير إن باقي الفلوس اللي كانت في البورصة يشاء القدر إننا نخسرها برضو في الوقت دا، والشركة في آخر أيامها كان عليها ديون كتير وصاحب الشركة الجديد كان عايز ياخذ الفلوس مننا عشان يسددها.. ماكنش الموضوع هاممني، وسمعت الكلام ولا كإني سمعت حاجة، كدا كدا ماكنتش شايف نفسي عايش ولا فارق معايا. وعلى بالليل جالي خبر إن والدي مااستحملش صدمة خسارته للشركة وتوفي.. وقتها حسيت إني لوحدي بجد ومابقاش ليا حد في الدنيا دي، واللي ضايقي أكثر إنه مات وهو زعلان مني.. أنا ماكنتش أتمنى إنه يسبيني ويمشي كدا، كنت عايزه يهتم بيا، ويحسني إني ابنه بس و مش عايز فلوس.. ماقدرتش أروح أشوفه قبل ما يتدفن وفضلت واقف برا بعيد عن باب الكنيسة وشايف التابوت وهو بيطلع والناس شيلاه وبيختفي من قدامي وسط الزحمة.. كنت شايف الدنيا سودا قدامي وإن ماليش لازمة إني أعيش أصلا، وأعيش لمين! رocht ومن أول ما دخلت البيت ما بقتش قادر آخذ نفسي، كان ضلمة وكئيب بطريقة ماحدث يستحملها لدرجة إني ماقدرتش أنام فيه وخرجت الجنيئة، وتاني يوم لقيت ناس جاين يعملوا مزاد على البيت عشان يسددوا ديون الشركة، واتضح إن والدي كان راهن البيت على الديون دي، علشان كان فاكر إنه لو كسب في المشروع هيبقى من أغنياء مصر، بس للأسف كل حاجة مشيت عكس توقعاته، والمرة دي الدنيا خدت مني كل حاجة، حتى البيت اللي ساكن فيه.. أخذت هدومي وطلعت، ولأول مرة أواجه الحياة لوحدي، أول مرة

أواجه الحياة أصلا.. خرجت وكان باين عليا إني مش فاهم حاجة في الدنيا، والناس استغلوا قلة معرفتي . ومعظم الوقت ماكنتش بفضل في مكان واحد أكثر من يومين لإن بلطجية المنطقة بيتلموا عليا وبيتسلوا في ضربي فكان لازم أمشي من حته للتانية، وكنت بفضل قاعد في الشارع بالايام وأناام تحت الكباري لحد ما لقيت شغل في مصنع.. كنت برتب الكراتين الصبح وبيبات في المصنع بالليل، فضلت متشحط في الشوارع ٣ شهور بحالهم بعاني فيهم من البرد والجوع، كنت بنام على بلاط المصنع وأنا بعيط وبفتكر إني كنت بنام على سريري قدام الدفاية وكوباية الكاكو السخنة في إيدي ومكنتش حاسس إن دي نعمة كبيرة لازم أحمد ربنا عليها.. بعد ال ٣ شهور دول جالي البشوات وشرحولي فكرة مشروع إيجار الي كلكو عارفينها، طبعا ماترددت ثانياة ووافقت وجيت معاهم.. خلصت..

اتنهد جرجس بحزن وفضل قاعد باصص للنار، وماحدث فينا بيتكلم.. قاطع الصمت صوت إسلام وهو بيقول بصوت مبجوح...

= يا بختك إنت عشت، حتى لو حسيت إنك كنت عايش ولو بعد فوات الأوان، على الأقل اتكون عندك ذكريات بشيء من الأمان والدفاء، غيرك عاش طول عمره ميت.

قال كلمته وسابنا وقام، وقبل ما ينزل من على السلم لقيناه بيصرخ ويرجع بظهره لورا وجاي ناحيتنا تاني، قمنا مخضوضين نشوف في ايه بس ماكنش في حاجة، وهو كان قاعد زي الطفل في ركن من أركان السطح وبيعيط وبيقول "أنا خايف.. ماتخلهوش ياخدوني.. أنا خايف"، راحله عم شوقي وجرجس وفضلوا يهدوا فيه ويطمنوه إن كلنا معاه ومش هنخلي حاجة تحصله، بس هو كان بيردد جملة واحدة بس.. "ماتخلهوش ياخدوني.. أنا خايف"

سببهم ونزلت لإن أشرقت كانت بتصرخ وتعييط لما شافت إسلام بالشكل
دا.. دخلت الشقة وحاولت أهديها وأكبتها، فسكتت ونامت على طول.
بعد ما نامت الشقة كانت هدوء جدا، وأنا كنت خائفة أقعد فيها لوحدي
بس كنت متماسكة لحد ما سمعت صوت حد بيسقف جاي من الأوضة
التانية، فضلت قاعدة مكاني خائفة أتحرك ويقنع نفسي إنه جاي من
الشارع، بس سمعت صوت حاجات بتقع فقررت أستجمع شجاعتي
وأروح الأوضة، ومن أول ما دخلت وقدت النور لقيت كرسي كبير
بيتحدف عليا فجأة ومافيش حد في الأوضة، والكرسي خبطني جامد في
دماغي وفقدت الوعي.

أنا عارفة إنك حيران دلوقتي وفي أسئلة كثير في دماغك وإن الألغاز كترت
قدامك، بس صدقني كل ماكمل حكي وأغوص في قصتي أكثر، كل ما
هتفهم لوحديك ايه اللي كان بيبتدي يحصل في العمارة من غير ما أقول..
خليني أحكيك ايه اللي كان بيحصل فوق على السطح لما أنا كنت فاقدة
الوعي تحت، تقدر تشوف عم شوقي وجرجس وهما قاعدين جنب راجل
تلاتيني بيعيط وماسك راسه وبيخبط رجله في الأرض بطريقة طفولية..
أسمهان واقفة جنب الحاجة كريمة اللي قاعدة تذكربنا وتقول أذكرك
وتسايح، وبعد محاولات من عم شوقي وجرجس هدي إسلام ورجع
لحالته الطبيعية تاني.. بص جرجس في عين إسلام بجدية وسأله...

= إنت شوفت ايه؟

بصله إسلام ومارضيش يتكلم، فكرر جرجس السؤال...

- كانوا جايين ياخدوني.

= هما مين؟

- بابا وكلهم.

بص عم شوقي لجرجس وخذه على جنب في الوقت اللي إسلام قاعد بيعيط فيه...

= شكله تعبان يا جرجس، شايف كان بيعمل ايه؟

- هو تعبان أه يا عمي، بس هو صح فعلا..

= قصدك ايه؟

بصله جرجس وبعدين بص لإسلام ونزل دخل شقته، وإسلام نزل وراه ودخل شقته برضو.. ماكنش فاضل على السطح غير عم شوقي والحاجة كريمة وأسمهان، وفجأة النار اللي كنا مولعينها عليت وطلعت فوق وابتدت تنتشر في المكان بطريقة مرعبة، وسمعنا صريخهم وهما نازلين من فوق السطوح، وأنا في اللحظة دي كنت فقت من الإغماء اللي حصلي على حد كان بيضريني على وشي جامد فقت مفزوعة، ولما سمعت الصريخ قمت بسرعة وخرجت برا الشقة عشان ألاقهم بيقولوا السطح بيولع، فطلعت أنا وجرجس بس مالقيناش حاجة، حتى النار اللي كنا مولعينها للدرة كانت مطفية، فضلت واقفة أنا وجرجس ماحدث فينا بيتكلم، لحد ما قال...

= فهمتي قصدي لما قلتلك ماخدتيش بالك باللي بيحصل؟ العمارة دي مش كويسة.

بصلي وبان على وشه الاستغراب وهو بيسألني...

= ليه خدك أحمر كدا؟

بصتله والقلق كان باين عليا وحكتله اللي حصل، لقيته بيقولي للأسف احنا ماقدامناش حل غير إننا نتأقلم هنا، وسابني ونزل، ولما نزلت لقيته بيقولهم...

- ما فيش حريقة ولا حاجة، يمكن كان بيتهيالكم.

ردت أسمهان بعصبية...

= لا يا جرجس، إنت عارف كويس إن كان في ناروان احنا ٣ شفناها، إنت ليه مش عايز تقول اللي إنت عارفه؟ أنا متأكدة إنك تعرف حاجة، وإلا ماكنتش فضلت واقف بالثبات دا.

- طب ليه مايكونش إنتي اللي عارفة حاجة؟ نظراتك للكك غريبة، وماحدث يعرف عنك حاجة لحد دلوقتي.

بصتله أسمهان بغضب، وبصت لينا وهي متوترة وسابتنا ونزلت، وبعد ما قفلت بابها جرجس نزل شفته هو كمان.. سندات الحاجة كريمة على السلم وهي طالعة ببطء...

= اتحسدنا والله يا ولاد، اقرأوا البقرة خلي البركة تحل علينا تاني.

دخلت شقتي لقيت أشرفت نائمة في هدوء، نمت جنبها وأنا طول الليل سامعة حد بيسقف في الأوضة اللي جوا وصوت همس، بس المرة دي فضلت مكاني وخفت أتحرك.

تاني يوم أخذت أشرفت ونزلت عند أسمهان تحت لإني كنت متأكدة إنها تعرف حاجة.. وأنا نازلة لمحت عامل النضافة اللي بييجي كل يومين يفضي الباسكت اللي قدام أبواب الشقق، غريبة مع إني راقبته قبل كدا وهو داخل وخارج من العمارة لاحظت إنه مش بييجي غير عندنا بس، ومافيش أي عمال بتدخل العمائر اللي جنبنا.. بصتله بشك وكملت نزول السلم، ولما خبطت على أسمهان فتحتلي وسابت الباب مفتوح ودخلت قعدت على الكنبه وهي بتشرب كوباية الشاي فروحت قعدت قدامها، وبعد صمت وهدوء طويل قالت...

- احنا اتضحك علينا يا فاطمة، كل اللي أقدر أقوله دلوقتي إننا مش عايشين لوحدها وإن العمارة كلها مش كويسة، بس رغم اللي بشوفه وأنا عايشة لوحدي هنا ماقدرش أسيب المكان وأخرج أواجه الشارع تاني

بالوحوش اللي عايشة فيه، على الأقل الأذى هنا بسيط لكن لو نزلت الشارع تاني هموت بالبطنيء.

= شفتي ايه؟

- نفس اللي بتشوفيه بس على أكثر، طول الليل ناس بتجري هنا في الشقة، وأصوات غريبة بسمعها طالعة من الحمام.. عايزة أقولك إن الحاجة كريمة بتشوف أحمد فعلا كل يوم أه، مانا كمان بشوف صحابي اللي وحشوني من الملجأ.. لوعايزة تفضلي عايشة هنا لازم تقنعي نفسك إن دي كلها أوهام، واعي تصدقي اللي بتشوفيه عشان ماتجنينش، اوعي تصدقي أي حاجة تسمعيها يا فاطمة وتروحي وراها حتى لو تعرفيها.. اوعي.

طلعت من عند أسمهان وأنا مش مطمئة، وإن في حاجات كثير لسه مستخبية لينا.. أشرقت كانت بتلعب قدامي في الصالة وأنا قاعدة على الكرسي معاها ووشي للأوضة، فجأة اتخضيت وحسيت إن قلبي بيتخلع من مكانه لما شفت طفلة شبه أشرقت في الأوضة اللي قدامي ولابسة نفس اللبس وبتلعب زي بنتي بالظبط، بعدين ظهرت إيد في الضملة من وراها وشدتها، وابتديت أسمع حد بيسقف ببطء.. في اللحظة دي لقيت بنتي بصت ناحية الأوضة وقايمة تجري عليها فقامت وخذتها في حضني بسرعة، وفضلت حضناها وقاعدة في الأرض أكن جسمي متكفف، وكان صوت التسقيف حوالينا بيزيد، لحد ما لقيت واحدة خارجة من الأوضة بسرعة البرق وضربتني على وشي وبعدين اختفت..

بعد اللي حصل لإسلام على السطح قرر جرجس إنه ينزل على الساعة ٩ يظمن عليه...

- إنت كويس دلوقتي؟

هز إسلام راسه من غير ما يرد، وعنيه كانت بتتحرك في الشقة من وقت للتاني.

- طب ممكن أعرف في ايه؟

=

- إسلام سكوتك دا غلط ومالهوش غير معنى واحد بس، إنك كدا بتموت نفسك بالبطيء، إنت مش شايف نفسك عامل ازاي؟ بص في المرايا وإنت هتشوف الهالات اللي تحت عينك من قلة النوم، ودقنك اللي ماتشالتش من أسابيع، ولا جسمك اللي باين عليه ماشافش الأكل من أيام.. إسلام إنت بتموت نفسك من غير ما تحس، وأنا مش عايز منك أي حاجة غير إنك تتكلم وتحكي لي مشاكلك، إنت زي أخويا وأنا نفسي أساعدك، مش عايزك تعيش كدا.

= غريبة الدنيا، بتخلي الغرب يحاولوا يقربوا منا ويساعدونا والقريب كان بيدوس علينا!

- أنا معاك، احكي.

بعد هدوء طويل اتكلم إسلام...

= اتولدت وسط عيلة عادية جدا من ناحية المستوى المادي والتعليم، بس من ناحية السلوك والأفكار كنا زي الإنسان البدائي بالظبط بل أسوأ .. والدي تاجر موبيليا على قده، وأمي كانت معلمة، عندي أخ وأخت، وأنا أصغرهم.. ورغم إن عندي عيلة بس بعتبر نفسي يتيم من ساعة ما اتولدت وإن مليش حد اتسند عليه، من ساعة ما وعيت على وش الدنيا ماشفتش غير القسوة والضرب والشتيمة، عمر ما حد فيهم خدني في حضنه وطببط عليا وسمعني، على أي غلطة كان بابا يمسكني وينزل بيا

في وسط الشارع ويضربني بكل قوته.. عمري ما هنسى لما كان عندي ٩ سنين ساعتها قلت لأمي أنا جعان وكانت واقفة بتقلي كفتة رز، قالتلي اصبر لما أبوك يبجي وناكل كلنا سواء، بس زي أي طفل ما استحملتش الجوع وروحت أخذت شوية من الكفتة وأكلتهم، وأبويا كان راجل بخيل جدا وبيدقق في التفاصيل.. ومن أول ما دخل المطبخ ولقي الأكل ناقص شوية ومن قبل ما يسأل أو يشك في أي حد لقيته جاي يضربني وجري من هدومي على السلم وكمل ضرب فيا في الشارع وسط صحابي وجيراني، وكان بيشتمني بأسوأ الشتايم، ويروح جنب العيال اللي واقفة تتفرج ويقولهم دا حرامي ما حدش يكلمه.. وسابني مرمي في الشارع وطلع، وبت أنا برا البيت اليوم دا.. كان المعنى الحقيقي للشرح وحالة جاهزة للأطباء عشان يدرسوا عليها الخلل النفسي. عمري ما بصيت ليه بصة سند أو أمان، بل كنت ببصله على إنه مجنون وبني آدم مختل عقليا، ما حدش كان بيحاول حتى يدافع عني علشان الكل بيخاف منه، ومع الوقت أمي اطبعت بطبعه وقسوته.. وبما إني كنت بطيء في الحفظ والمذاكرة، كانت دايمًا تلسعني بالمعلقة في دماغي.. مش فاكركام مرة حد فيهم ندهلي باسمي في البيت، أبويا دايمًا كان بينعتني بأسوأ الألفاظ، وأمي دايمًا تقولي إنت فاشل وغبي.. أخويا الكبير طلع دكتور، وأختي مدرسة زي ماما واتجوزت وسافرت السعودية.. طبعا الأخبار دي كلها عرفتها لما طلعت من الملجأ، وجيت تاني على المنطقة...

- ملجأ!

= أيوة ملجأ، في يوم لما كنت في إعدادي أمي كانت قاعدة تذاكرلي وكانت عصبية جدا ومش متفهمة، ولما حليت غلط لقيتها جابت الولاة و بكل قسوة ابتدت تلسعني في صوابي.. عمري ما حسيت إن دي أمي ولا إن دهما هو اللي بيجري جوايا.. في اليوم دا زعقت فيها جامد، وقلتلها إني بكرهها وبكره أبويا وبكرهم كلهم، وإني بتمنى أشوفهم ميتين قدامي، وإنها أسوأ أم في الدنيا.. وقتها قالت جملة واحدة بس خلت الرعب يدب في

قلبي، وما فكرت في أي حاجة غير إني أهرب بحياتي.. "لما أبوك يبجي"، الكلمة خلّتي أشوف نفسي وأنا بتعذب وبتحرم من الأكل لأيام... الكلمة خلّتي بترعش من الخوف وكنت بتمنى أموت في لحظتها، ساعتها دخلت أوضتي وفضلت قاعد على السرير من غير حركة، وبعدين نزلت الشارع.. نزلت وأنا واخذ عهد على نفسي إن مهما أشوف هيبقى أهون من الجحيم اللي كنت عايش فيه، كنت عارف إن الناس مش طيبة ومش سهلة، مع إن سني صغير بس كنت فاهم كل حاجة وعارف أنا هواجه ايه بالظبط.. هربت من البيت وأنا حاسس بالحرية والفرح، بس خايف لحد فيهم يلاقيني ويرجعني تاني.. سبت الإسماعيلية وجيت هنا على إسكندرية.. وبسبب حجم جسمي الصغير والهزيل، كنت بركب في الإتوبيسات والقطر من غير ما حد ياخذ باله مني، وبعد ما وصلت على إسكندرية حسيت إني حر وإني اتولدت من جديد، بس في حاجة فضلت ملازماني لحد دلوقتي، وهي إن عندي انطواء وخوف من الناس والمجتمع. اتبهدت كثير في الشوارع، وكنت بنام أيام من غير أكل تحت الكباري، بس ماكنش هاممني لإني كنت متعود على البهدلة من وأنا في البيت، وبعد كام يوم انضمت لشلة عيال متشردين وكنا بنسرق الأكل من الخضارية والناس، لحد ما الشرطة جت في يوم ولمتنا كلنا وحطتنا في ملجأ، وقتها حسيت إني رجعت للحبس تاني، وبالذات إن المعلمة كان طبعها قاسي وبتفكرني بأمي.. بعد أسبوع بالظبط كنت هربت وسبت الملجأ ومشيت من المنطقة خالص.. ومع الوقت لما كبرت بقيت تاجر مخدرات، كنت بتاجر فيها أه لكن عمري ما جربتها، ولا دخنت حتى، وعلى سن ٢٠ كنت مرتاح ماديا ومعايا شقتي، بس كنت لسه لوحدي وانطوائي وماعرفش حد ولا بتكلم مع حد، فضلت على الحال دا ٩ سنين.. كنت ميت، لحد ما شففت بنت رجعتلي روجي تاني، من أول نظرة حبيتها وحسيت إني وقعت أسير عندها، كانت بتشتغل نادلة في كافيه.. عارف لما بتكون عايش مجرد بتتنفس بس؟ ما فيش أي شعور ليك اتجاه الحياة غير الكره، ودي كانت أول مرة قلبي يدق فيها.. بقيت أروح الكافيه

كل يوم علشان أشوفها، وهي مع الوقت لاحظت وجودي وإني مهتم بيها، وابتديت أنبادل معاها الكلام، ولأول مرة أنا اللي أبتدي كلام مع حد.. كنت بستناها تخلص شغل وأتمشى معاها كل يوم لحد البيت.. الحب إحساس حلو أوي، إحساس إنك طاير وقلبك بيرقص وعندك طاقة وحماس ومستعد تعمل أي حاجة في الدنيا عشان تبقى جنب اللي بتحبه.. النظرة في عنيتها كانت بترجعني للحياة تاني، وضحكتها كانت الشمس اللي جتلي بعد ليل طويل.. مش هتصدقني لو قلتلك إن ماكنش فيها غلطة! كانت المعنى الحقيقي للمثالية، والكمال لله وحده طبعاً.. بس حقيقي ماكنش فيها غلطة، كانت دايمًا متفائلة، وعندها نظرة وردية للحياة وطاقة تخليك تفتح بلاد.. لما ببقى معاها كنت بحب أقعد أسمعها وهي بتحكي عن القصص اللي بتقرأها والأحلام اللي بتتمنى تعيشها.. كانت أسعد أيام حياتي أول ٦ شهور معاها، بعد كذا ابتدت تبعد عني ومابقتش تيجي الشغل، فضلت أيام مستنيها، والأيام واتحولت لأسابيع، وبعد ما استجمعت شجاعتي قررت أروح بيتها وأسأل عليها، ولما روحت لقيتها فتحولي وفضلنا باصين لبعض شوية، وأنا جوايا أسئلة كتير.. قالتلي شوية وجاية، فدخلت غيرت هدومها وخرجنا نتمشى، وماكنش حد فينا بيتكلم، ولما قعدنا لقيتها بتعيط وبتعتذر مني، ماكنتش فاهم قصدها ايه! لحد ما قالت إن بعد الفحوصات والتحليل اكتشفت إن عندها كانسر، وإنها في المرحلة الأخيرة وماعدش في وقت للعلاج.. الخبر نزل عليا كالصاعقة، ماكنتش عارف أتكلم ولا حتى أخذها في حضني وأواسيها.. شكلها وهي منهارة قدامي وفي إيدها الأوراق والأشعة خلاني قمت وجريت من قدامها، كنت بجري في الشارع زي المجنون، لحد ما روحت حته فاضية وبقيت أصرخ وأعيط بأعلى صوتي، كنت بصرخ بغضب وحزن وحسرة.. ليه! ليه الدنيا بتعمل معايا كذا؟ ليه بعد ما ادتني الحياة رجعت موتتني تاني؟ فضلت قاعد في بيتي أيام من غير أكل ومش بعمل حاجة، لحد ما قررت إنها مش هتموت.. روحت بيتها وقتلتها هنحاول في العلاج، وإني معاها ومش هسيبها، وهي كانت على قد

حالتها، ساعتها بعث الشقة وأخذت كل اللي معايا وسافرت بيها أوروبا بعد ما اتجوزنا، ماكنش هاممني أي حاجة غير إني أشوفها سليمة وفي حضني.. وبعد مدة من العلاج لقيت التقارير زي ما هي، بل حالتها بتزداد سوء، والدكاترة نصحوني إني أوقف علاج، وأسببها تعيش آخر أيام حياتنا من غير وجع زيادة...

سكت شوية وبعدين كمل...

= ماتت في حضني.. حتى في عز وجعها وألمها كانت بتضحك، لمسة إيدها على وشي لسه حاسس بيها لحد دلوقتي، كالمتها لسه في ودني وهي بتخليني أوعدها مارجعش لتجارة المخدرات تاني، ولا أعمل أي حاجة وحشة في حياتي وأخلي بالي من نفسي، وأحب من جديد.. كانت بتقولي الحياة صعبة، دور على اللي يخليها هينة عليك، وأنا هفضل معاك وفي قلبك.. آخر نفس ليها كانت آخر لحظة حلوة أعيشها في حياتي.. لما تقابل حد وتشوفه كامل ومثالي وتحبه من قلبك وتلاقيه محبوب من اللي حواليه، اعرف إنه هيتخطف منك بسرعة، الناس الطيبة الحنينة الدنيا مش بتسيبهم فيها كتير لإنهم أنقى من إنهم يعيشوا وسطنا. من بعد وفاتها وأنا مش عارف أعمل حاجة، ولما مابقاش معايا فلوس أدفع الإيجار اطردت من البيت وجيت على هنا.. حالي النفسية ساءت أكثر، وبقي عندي أمراض كتير لدرجة إني بقيت أشوف أبويا وأمي هنا في الشقة جاين يضربوني تاني زي زمان، وتهيؤات تانية كتير.. أنا مابقتش مستحمل الحياة دي، أنا عايز أموت وأرتاح منهم كلهم.

بعد ما ظهرت الإيد من الضلمة وضربتني على وشي، قمت وأنا بجري ببنتي بسرعة عشان أخرج من الشقة خالص، كنت خيفة ومرعوبة ورجلي مش شايلاني.. نزلت عند أسمهان وخبطت عليها جامد، ففتحتلي وهي مخضوضة، وحكيتها اللي حصل، لقيتها بتقولي إن الحوار دا اتكرر

معها أكثر من مرة وإنما دلوقتي مش قاعدين لوحدنا، دخلنا الأوضة ونمنا كلنا على نفس السرير، وطول الليل سامعين خطوات ناس ماشية في الشقة، والأبواب بتتفتح وتتقفل مع نفسها، فضلنا كدا لحد ما عيننا راحت في النوم، علشان نصحى على صوت صريخ ناس جاي من تحت العمارة ونقوم مفزوعين من النوم، ولما روحنا بصينا لقينها الحاجة كريمة وقعت من الدور الخامس في الشارع والدم مالي الأرض حواليتها، وبعد دقايق جت الشرطة والإسعاف على طول ونقلوها للمستشفى يغسلوها، وبدأت الشرطة تحقق معانا، وأول من سألوه طبعاً كان العم شوقي، وكان رده غريب بالنسبة للشرطة، بس مش غريب بالنسبانا...

= من امبارح وهي متضايقة جداً، وما بطلتش كلام عن ابننا أحمد، فضلت تفتكر كل حاجة عنه من أول ما كان طفل لحد ما سابنا ومشى، ماسابتش تفصيلية ما حكتهاش عنه؛ كنت مستغرب ازاي فاكرة التفاصيل دي كلها! دا غير إنها كانت صاحبة طول الليل، وأنا سامع صوت عياطها وهي في الصلاة،

ولما الصبح جه وبكلمها، لقبيتها ماشية بسرعة ناحية البلكونة وبتنده على أحمد، أكنها بتجري وراه وشايفاه، مالحقتش أمسكها، وما عرفش ازاي فجأة اتقلبت من على السور كدا! هي أصلاً ما بتعرفش تمشي بسرعة، وحركتها بطيئة جداً، والنهاردا أول مرة أشوف فيها الحماس والسرعة دي من سنين، وآخر مرة..

خلص عم شوقي الكلام، ونزل راح المستشفى عشان يشوف مراته للمرة الأخيرة ويدفنها.

بعد ما الشرطة نزلت اتجمعنا كلنا عند جرجس، وكل واحد ابتدا يقول اللي بيحصله، وابتدينا برضو نفكر جدياً إننا نسيب العمارة ونمشي.. جرجس قال إنه كان ببشوف كلام غريب مكتوب على الحيطه بالدم، ولغة مش مفهومة، وتاني يوم الكتابة بتختفي، دا غير الأبواب والأدراج

اللي بتفتح وتتقفل لوحدها، وأصوات الناس اللي بتتكلم طول الليل ومابيعرفش ينام منهم.

وأسمهان كان بيحصلها نفس اللي بيحصللي، كانت بتظهر إيد من الضلمة وتضريها، وكانت بتسمع على طول حد بيسقف، والصوت جاي من أماكن مختلفة، دا غير الكوابيس اللي ملازماها من ساعة ما اتنقلت للعمارة.

أما إسلام فكان الوحيد اللي يعتبر ماكنش بيشوف حاجة، أو كان بيشوف بس ماكنش بيعرف يفرق إذا كان دا بسبب الأمراض النفسية اللي عنده، ولا من الأشباح اللي ساكنة العمارة، ومش معقول الدولة مش عارفة إن العمارة دي مسكونة، وإن اللي بيقعد فيها لإما بيتأذي او ويموت.

- كل حاجة هنا غريبة وغير منطقية، مافيش هيئة سكنية تبع الحكومة توفر أكل للسكان بالكميات دي، ولا بيخلوا أول شهر مجاني، الموضوع دا الحكومة مالهاش دخل فيه.

رديت عليه...

= عندك حق، أنا من الأول ماكنتش مقتنعة بالأفعال دي كلها، وبالذات عامل النظافة اللي ببيجي عندنا بس.. أنا عندي فكرة، أكيد الناس بتوع المنطقة عارفين حاجة عن العمارة، أو على الأقل عارفين السبب الحقيقي ورا سكننا فيها، أنا هنزل وهحاول أجيب خبر للموضوع دا.

سبت أشرفت معاهم ونزلت أكني هشتري حاجات من السوق، وأخذت اسم ورقم العمارة، وكالعادة لقيت سكان المنطقة بيبصولي باستغراب، ونظرات مش فاهماها، والعيال الصغيرة تجري بعيد عني، ولما خرجت من الشارع بتاعي ودخلت شارع جديد، الناس كانت طبيعية معايا جدا.. رocht أنقي طماطم جنب ست وابتديت أسألها...

= بقولك ايه يا حبيبتى، هي ايه قصة العمارة رقم **؟*

- ربنا يجعل كلامنا خفيف عليهم، دي عمارة مش تمام، إنتي جديدة هنا ولا ايه؟ مافيش حد في إسكندرية مايعرفش العمارة دي.

= ايه؟ اه اه.. أنا جاية مصيف هنا كام يوم، وسمعت كلام كدا عليها وعايزة أتأكد يعني، وشكلك فاهمة وعارفة وهتقوليلي اللي فيها.

- دي عمارة موجودة من زمان ومسكونة، مافيش حد بيقدر يدخلها ولا يقعد فيها، واللي بيسكن فيها بيموت موتة مش طبيعية، لإما منتحر، أوقلبه يقف من اللي ببشوفه جوا.

دخلت ست تانية معانا في الحوار...

- ما هما سكنوا فيها ناس يا مديحة.

= والله! مين جتله الجرأة يسكن فيها دي؟

- اللي سمعته إنهم حولوها لمستشفى المجانين، وفي واحدة انتحرت منهم النهاردا.

= مستشفى ازاي يعني، ومافيش ولا يافطة ولا دكاترة داخله خارجة!

بصتلي الست وقالت...

= بصي ياختي، إنتي هتسمعي حكايات ياما، ومش هتعرفي الحقيقة فين، كل اللي عارفاه ومتأكدة منه إن العمارة دي مسكونة، واللي بيدخلها مايبخرجش سليم، سلام عليكم..

مشيت الست وماجاوبتش على أسئلتي، بل بالعكس زودتها جوايا.. سبت المكان اللي فيه ورحت شارع تاني وكررت نفس الحركة مع ست تانية، ولاقيتها بتقولي نفس الكلام، ولما سألتها على موضوع مشروع الإيجار بتاع الدولة وشروطه، لقيتها بتقولي مافيش الكلام دا، وإن الدولة أصلا مش عايزة تسكن حد في العمارة دي بسبب تاريخها، وإنها مش

عارفة ازاي صاحب العمارة أقنع الناس عشان يسكنوا فيها.. أخذت كل المعلومات دي وطلعت العمارة تاني، وحكيته لهم اللي سمعته كله...

جرجس: ازاي مستشفى أمراض عقلية ومش تبع الدولة! ليه الكلام متناقض كدا؟

فاطمة: مش عارفة، وللأسف ماحدث هيعرف يفيدنا في الموضوع دا.

جرجس: أنا مش عايز أعيش أكني مش عايش، وأموت موتة وحشة كمان في الآخر؟ لا مش هينفع.

كنا قاعدين ساكتين وماحدث فينا عارف يقول ايه، بعد شوية سمعنا صوت خروشة برا جاية من عامل النظافة، ومن أول ما جرجس سمع صوته خرج ليه بسرعة وضربه على دماغه وخلاه يفقد الوعي، خدناه ودخلنا الشقة وربطناه في كرسي، بس لسه ماصحيش...

أسمهان: إنت عارف لو مات من الضربة يا جرجس، كنا هنروح في داهية.

جرجس: ما احنا كدا كدا رايعين، لو عندك طماطم بايظة وحطيتي عليها طماطم تاني بايظة، هتعرفي تفرقي بينهم؟

فاطمة: مش وقت فلسفة يا جرجس، مش إنت مثقف وعشت طول عمرك بتقرأ وتتعلم بس، يلا اتفضل صحيه.

بصلهم جرجس بلا مبالاة، وقعد قدام الراجل على الكرسي، وبعد دقائق ابتدا يفوق ويزعق، ويحاول يفك الحبل...

أسمهان: إنت مش هتخرج من هنا غير لما تفهمنا احنا جينا هنا ليه، أنا عارفة إنك مش عامل نظافة؛ لإني سمعتك قبل كدا بتتكلم في اللاسلكي وبتنقل أخبارنا، طريقة كلامك وتحليلك للموقف ولحالة السكان، تدل على إنك حد تاني.

بصيت لأسمهان وفهمت قصدها لما قالت إن اتضحك علينا، الراجل كان قاعد على الكرسي بكل ثبات وملامحه صارمة وهدوءه كان غير عادي، ومكنش راضي يتكلم.. لحد ما جرجس ابتدا يستخدم معاه أسلوب العنف ويضربه، ولما إسلام شاف الموقف اتشنج ووقع على الأرض، وفضل يضرب برجله زي الأطفال، في الوقت دا سمعنا حاجات بتقع في المطبخ، وخيال إسود طويل واقف جوا وأشرقت بتجري ناحيته، وقبل ما تدخل أسمهان مسكتها، وأشرقت كانت بتقاوم أسمهان بطريقة مش طبيعية وبقوة...

تخيلت الموقف معايا.. جرجس مش موقف ضرب في الراجل المتنكر، وإسلام متشنج ونايم على الأرض وأنا بحاول أهديه وبزعق لجرجس عشان يبطل، وأشرقت اللي بتعيط وتضرب في أسمهان وعازية تدخل عند الخيال الإسود.. كان في دوشة وكركبة حوالينا، لحد ما الراجل حس بالخطر، وإنه لو طول في المكان أكثر من كذا مش هيخرج منه حي، ومن هنا ابتدا يحكي...

= مافيش حاجة اسمها مشروع إيجار تبع الدولة، احنا أصلا رشينا الناس المسيطرة على المنطقة عشان تسيبنا نسكن ناس في العمارة.. دكتور ارونيس هو اللي صاحب الفكرة دي كلها، وهو مؤمن بوجود الجن والأرواح الشريرة، ولما جه مصر وسمع بالأقوال المنتشرة على العمارة، قرر إنه يعمل عليها أبحاثه ويستعين بناس من مراحل عمرية مختلفة، وحرص إن يكون منهم مرضى نفسيين عشان يعرف أنهي أقوى على الإنسان واللي هيتأثر بيه.. عقله واللي القوة الخارقة اللي هيشوفها بعد كذا. وكان حريص إنه يجيب ناس ماتعرفش حاجة عن تاريخ العمارة، علشان مايأثرش علي التجربة اللي هيعملها، وبما إنه غني، فكان سهل يدفع لصاحب العمارة، ونشر إشاعات في المنطقة إن العمارة اتحولت لمستشفى أمراض عقلية، علشان ماحدث من السكان يروح يتكلم معاكم، ووفركم غذاء في الشقق علشان تقضوا فيها أكبر وقت ممكن.

من الآخر إنتو فيران تجارب بالنسبالنا، بس للأسف الست العجوزة ماتت بسرعة.

ماستحملش جرجس كلام الراجل، ورجع يضرب فيه أكثر من الأول، وإسلام كان نايم على الأرض وضامم رجله عند صدره وبيعيط، وبعدين قام بسرعة وخرج من الشقة.. أنا كنت هنزل وراه بس سمعت صوت تسقيف جامد جاي من المطبخ، وأسمهان قاعدة باصة للمطبخ برعب وحاضنة أشرقت وبعدين حدفتها بعيد عنها، وخرج صوت صريخ عالي ونار شديدة من المطبخ، ومسكت في أسمهان.. كانت بتجري في الصالة وهي بتصرخ والنار ماسكة فيها، فجري جرجس بسرعة للأوضة وجاب كوفرتة، ولف أسمهان بيها لحد ما النار اطفت، ومن حسن حظها إن النار مامسكتش فيها أكثر من ثواني وكان جرجس مطفيها، ودا ساب أثار حرق بسيطة ماوصلتش حتى للدرجة الأولى.. الراجل شاف الموقف فضل يترجانا نسبيه يخرج من هنا وهو هيخرجنا، بس جرجس جاب حبل تاني وربطه في الكرسي جامد عشان مايعرفش يهرب، وخذ أسمهان ونزل بيها المستشفى.. في الوقت دا كنت قاعدة براقب الراجل، وحاضنة بنتي وأنا مرعوبة من اللي شايفاه.. كان في ست لابسة أبيض، وشعرها طول جسمها، وكل شوية أشوفها خارجة من الحمام، وتدخل الأوضة، وتخرج من أماكن مختلفة، واللوح المتعلقة على الحيطه كانت بتقع مع نفسها.. سمعت صوت على السلم فرحت لاقيت عم شوقي واخذ حاجته، ومسافر للفيوم عشان يدفن مراته، ويكمل باقي حياته هناك، كان حزين جدا ومش قادر يتكلم، وماكنش عنده الوقت إني أشرحه اللي حصل.. سلم عليا ومشي، ومن ساعتها ماشفتهوش تاني.. وعلى بالليل جرجس وأسمهان رجعوا من المستشفى، وابتدينا نلم حاجتنا عشان نمشي من العمارة، ونسيب الراجل مكتف جوا.. في الوقت دا افتكرت إسلام، وإن حالته كانت صعبة وماعرفتش أنزل وراه، نزلت أخبط عليه مافتحش، فضلت أخبط كثير وجامد ومافيش أي صوت جوا، ماكنتش

مطمنة ومتأكدة إن في حاجة ، فندعت لجرجس وفضل يخبط الباب لحد ماكسره، علسان ندخل ونلاقي إسلام شانق نفسه في الصلاة، وماسك ورقة في إيدته.. ماقدرتش أفق قدامه كتير وطلعت الشقة وأنا بعيط.. بس جرجس ماسابھوش، وأخذ الورقة الي معاه، ولقى فيها وصية إنه مش عايز يتدفن بالليل، حطها في جيبه ونزله من المشنقة، وقرر إنه يدفنه في إسكندرية، وطبعا مافيش أي حد وافق إنه يدخل العمارة، فاضطرينا نغسله في المستشفى، وخده جرجس ودفنه في مقابر عامة للمسلمين.. البيت فضي علينا احنا ال ٣، أنا وجرجس وأسمهان.. قتلهم إني هرجع الشقة الي في السطوح تاني، وقلت لأسمهان إني مش هسيبها، وهاخدها تعيش معايا، وإنها أختي الي لقيتها وبعتهالي الدنيا عشان نكون دعم وسند لبعض، وقررت أشوف لجرجس مكان جنبنا عشان كلنا نبقى سوا .. وبعد ما خلصنا أوراق إسلام واتدفن، لمينا حاجتنا، وسبنا الراجل متكتف زي ما هو وخرجنا من الشقة.. كان بيصرخ ويقول ماتسبونيش لوحدي، لحد ما صوته وطى خالص، وفجأة لقينا جثته بتتحدف برا الشقة على السلم، وجسمه مليون خربشة وميت متخشب ، وعينه مفتوحة على آخرها وفتح بقه.. ومن أول ما خرجنا من العمارة لقينا الدور اللي كنا قاعدين فيه بيولع، والنار طالعة من الشبابيك والبلكونة، بصينا ليها بصة أخيرة، وخذنا أول عربية رايحة القاهرة، ومن ساعتها ماروحتش هناك تاني..

عدا ٢٥ سنة.. لسه فاكرة كل حاجة وكل التفاصيل، أكنها لسه امبارح.. بنتي كبرت وبقت دكتورة قد الدنيا ومتجوزة كمان، وأسمهان فضلت عايشة معايا لحد ما جوزتها واطمنت عليها، أما جرجس ففضل ساكن جنبنا لحد ما ربنا فتحها عليه ومشي من الحسين خالص.. دلوقتي أنا قاعدة لوحدي في شقة ملك قصاد مقام الحسين، زي ما محسن الله يرحمه كان بيتمنى، وكل يوم بالليل بقعد في البلكونة ومعايا صورة

محسن، وبتمنى إني أشوفه قدامي، زي ما الحاجة كريمة الله يرحمها كانت
بتشوف ابنها أحمد.

تمت.

٥- الإذاعة

أنا عارف إني مجرد ما اخلص حكي وأسيب القلم، هيكون دا آخر نفس
أنفسه، بس مش فارق معايا حاجة، ما أنا كدا كدا خسرت كتير، وما بقاش
عندي حاجة أعيش علشانها.. أنا قررت أحكي النهاردا كل حاجة عشان
ما اشلش ذنب حد، ومش عايز حد يمر بالي أنا مریت بيه، باختصار
علشان هو واقف قدامي دلوقتي، ويبيرق ورافع المنشار لفوق، مستني إني
أعصي كلامه علشان يقتلني، بس أنا مش هتراجع.. فاضل دقائق
والتعويدة تتفك، وساعتها.. ساعتها ما فيش حاجة تقدر تمنعه..

أنا زياد عبد الله مهندس كمبيوتر، تزوجت من ٨ سنين من منال، البنت
اللي بحبها واتمنيت أقضي معاها بقيت عمري، وبعد سنة ربنا رزقنا
بأجمل هدية.. لؤي ابني هو كل حاجة في حياتي، قررت أنا ومنال نسيب
البلد بعد سنتين من الجواز، ونيجي نعيش في القاهرة وأدور علي الشغل
اللي يناسبني، وبالمرة ندخل ابنا مدرسة كويسة، فكلت واحد صاحبي
ساكن هناك، وشافلنا شقة بسعر إيجار كويس...

- إنت متأكد إن الشقة دي كويسة يا إبراهيم؟ أنا أول مرة أشوف إيجار
ب ٣٥٠ في الوقت دا!

= يا زياد بقولك قريننا، وبيعمل معايا واجب عشان إنت صاحبي وكدا..
ما تقلقش الشقة كويسة.

ما كنتش مرتاح ليها، وبالذات بعد ما دخلتها مع إبراهيم، كنت حاسس
بخنقة، وإن في حد ماشي ورايا طول منا جوا، بس لما قعدت مع منال
مراي لقتها مرتاحة وعايزة تقعد فيها ...

= زياد الشقة كبيرة وموقعها كويس يا حبيبي، أنا شايفة إنها فرصة
ما تتعوضش.

- يعني إنتي مرتاحة فيها يا منال؟

= اه يا زياد مالها؟ تلاقىها مش عاجباك بس عشان على شارع عربيات
ودوشة، وانت متعود على الهدوء.. ناخذها بقي؟
- ماشي.

وافقت على الشقة ويا ريتني ما وافقت ولا كنت كلمت إبراهيم أصلا..
تاني يوم وقعت العقد مع صاحب الشقة واستلمنا المفتاح، وبعد ٣
أسابيع نقلنا العفش، واستقرينا رسمي في القاهرة..

= يا حلاوة.. مش قلتلك يا زياد الشقة واسعة وحلوة وهنرتاح فيها.
- الحمد لله ربنا يسعدك يا حبيبتي، بس سؤال يا..

جرس الشقة رن فقامت أشوف مين لقيته إبراهيم صاحبي، جاي يباركلي
ويقعد معايا شوية، ولما جه يمشي اداني هدية في كرتونة، وقال بنبرة
ماحستش فيها بارتياح..

= أنا فرحان إنك جيت جنبي هنا يا زياد، إنت عارف إني بحبك صح؟
استغربت من كلامه لأنه أول مرة يتكلم معايا بالطريقة دي!
- في حاجة يا إبراهيم؟

= لا يا صاحبي ولا حاجة.. أستأذن أنا بقي، مع السلامة.

بعد ما مشي فتحت العلبة، لقيت فيها راديو صغير شكله قديم ومترب
ومعاه شرايط.. إستغربت من الهدية وقفلت العلبة وروحت أنام.. عدا
أسبوع وكانت كل حاجة طبيعية جدا، لحد ما في يوم بعد ما رجعت من
الشغل لاقيت الراديو شغال ولؤي قاعد قدامه وماسك الدبodob الكبير،
سلمت عليه وسألته ماما فين بس ماردش عليا ولا بصلي حتى، فقربت
منه لقيته نايم، شلته ودخلته على السرير، ودورت على منال...

= منال.. منال إنتي فين؟

- أنا هنا يا زياد في البلكونة تعالى..

= إنتي طلعتي الراديو ليه؟

- عادي قلت أشغل عليه قرآن، بما إننا لسه جداد وكدا.

= بس ماكنش شغال عليه قرآن يا منال، كان وش وكلام مش فاهمه،
ومش سامع منه حاجة، ولؤي كان قاعد قدامه لحد ما نام.

- لا ازاي! أنا مشغلة القرآن.. وبعدين ثواني، لؤي في الشارع بيحيب حاجة
من السوبر ماركت اللي هناك دا، وأنا واقفاله لحد ما يرجع.. أهو هناك
أهو بص..

بصيت مكان ما بتشاور لقيت لؤي جاي فعلا من بعيد، بس مين اللي
جنبه دي.. دي منال مراتي!

او مال أنا بتكل...

بصيت جنبي مالقيتش حد أكني واقف لوحدي.. كنت هتجنن ساعتها،
دخلت الأوضة أشوف الطفل اللي شلته دا مالقيتهوش ولا لقيت
الدبodob، وأنا خارج لقيت الراديو اشتغل تاني، وشغال على حاجة مش
مفهومة ووش، والدبodob الكبير قدامه، شلت الفيشة وإيدي كانت
بتترعش وكانت أول مرة أحس الإحساس دا.. بعدها باب الشقة اتفتح،
ومراتي وابني دخلوا...

= ايه دا.. بابا جه أهو يا لؤي.

لؤي جري عليا، وكنت بتكلم وأنا متوتر وهي لاحظت دا..

- كنتوا فين؟

باستغراب..

= ايه يا زياد مالك؟

- لا يا حبيبي مافيش، تعبان بس شوية.

وأنا بتكلم لقيت ابني جري على الدبدوب وبيحضنه، ومسميه اسم غريب كدا، وشغل الراديو وقعد قدامه.. قلبي اتقبض فبصيت لمنال وقتلتها...

- إنتو شغلتمو البتاع دا امتي؟ و.. وايه اللي بيحصل؟

= زياد إنت شكلك تعبان في ايه! عادي، احنا مشغلينه بقالنا ٣ أو ٤ أيام، في محطات بتجيب قصص أطفال ولؤي بيحبهم أوي.. بس إنت مالك حاساك مش كويس؟

ماردتش عليها ودخلت نمت، حسيت إني بخرف من شدة الصداع، وكمان عشان بقالي كتير مانمتش كويس.. دخلت نمت وماصحتش غير على صوت صويت وكانت الساعة ٢ بالليل فقممت أشوف في ايه لقيت الراديو شغال على صوت ناس بتصوت وتعيط، وابني واقف يرقص قدامه والدنيا ضلمة.. فقدت النور وشخطت فيه وطفيت الراديو وقتلته يدخل بنام .. بس وهو داخل بصلي بغضب! دا مش لؤي ابني ولا دي عينيه ولا دي حركاته.. كنت خايف منه وعيني عليه لحد مدخل .. بصيت للراديو بغضب وخرجته برا الشقة يمكن أي حد معدي ياخده، ودخلت نمت ، ولما صحيت الصبح وخرجت الصالة لقيت الراديو محطوط في مكانه وعليه ورقة مكتوبة بخط منعكش أكن طفل صغير هو اللي كتبها..

"ماتحاولش.. إنتو خلاص بقيتوا ملكي.. فاضل ٥ أيام"

ندهت على منال وأنا كلي غضب، وسألته دا دخل تاني ازاي قالتلي ماعرفش، ولما سألت لؤي قالي ماعرفش برضو، هنا قعدت مع منال

وحكيته كل حاجة، من أول كلام إبراهيم اللي مش مريحني، وحادثة السوبر ماركت، لحد اللي حصل النهاردا، لقيتها بتعيط وصدمتني باللي سمعته منها..

= أ.. أنا عارفة ... كل اللي بيحصل معاك دا حصل معايا.. من أسبوع طلعت الراديو وشغلت عليه الشرايط وكان قرآن في الأول، بعدين لقيته قلب مع نفسه وشغل قصص أطفال، وقتها فرحت وخليت لؤي يقعد يسمعهم، بس بعد كدا لاحظت حاجات غريبة بتحصل، لقيت صوت وش وكلام مش مفهوم و صوت صريخ، ولما كنت بسمع كدا كنت بطفيه على طول بس كان بيشتغل تاني مع نفسه والصوت بيبقى أبشع من الأول أكنه عقاب ليا إني طفيته.. بعدها بفترة لقيت لؤي مندمج معاه أوي ويشغله ويرقص ويعمل حركات غريبة، زعقتله وشلت الراديو خالص، وبرضو بلاقيه طلع واتحط مكانه تاني، حاولت أقولك بس..

لقيتها بتبص ورايا أكن في حاجة واقفة بتهددها...

= أنا حاسة إني مجنونة يا زياد.. أ.. أنا تعبانة.. تعبانة أوي وعاززة أمشي من هنا..

منال كانت بتتكلم بهستيريا ومش مبطله عياط، قعدت أهدي فيها لحد ما عنيتها راحت في النوم، فسببتها وروحت أشوف ابني فين، لقيته قاعد في أرض الحمام ويرسم بالألوان رسومات وحاجات غريبة، أخذته في حضني وسألته بيعمل كدا ليه...

= عمو اللي هناك دا هو اللي بيقولي أعمل كدا، وإلا هيموتني.

حسيت بحد واقف ورايا فعلا.. بلعت ريتي بصعوبة وبصيت ورايا مالقيتش حد، فبصيت للؤي وسألته بهدوء...

- عمو مين يا حبيبي؟ اسمه ايه ممكن توريهولي؟

= اللي هناك دا، بيقول إنه خادم لوسيفر.. يعني ايه لوسيفر يا بابا؟

- لؤي.. ينفع تحكيلي كل حاجة يا حبيبي؟

بصلي وطلع يجري على أوضة مامته وهو بيضحك وما اتكلمش، قعدت في الصلاة وأنا مش فاهم ايه اللي بيحصل، ايه الحاجات اللي بتشتغل دي؟ وازاي بيشتغل أحيانا من غير كهربا؟ وليه منال ولؤي مش عايزين يتكلموا؟ ومين اللي كتب الورقة دي! وقصده ايه بجملته فاضل ٥ أيام؟ أول حد جه في بالي إبراهيم.. اتصلت بيه وكنت بتكلم معاه بعصبية وأنا بزق...

= أيوة يا إبراهيم أنا زياد.. إنت عملت فيا كدا ليه؟

- قصدك ايه يا زياد؟

= إنت عارف قصدي ايه يا إبراهيم، حرام عليك أنا وعيلتي هنتجنن، انطق يابني إنت عارف كل حاجة، ايه اللي بيحصلنا دا يا إبراهيم؟

- أنا آسف يا زياد بس ماكنش قدامي حل غير كدا، لو ماكنتش دخلتكوا الشقة واديتكوا الراديو كان التمن هيبقى حياتي أنا، وأنا مش مستعد أموت دلوقتي.

= أنا مش فاهم حاجة..

- الشقة تبع عمي، وهو معروف بسيرته الحلوة.. من فترة عرفت إنه بيشتغل في السحر الأسود وهو كان السبب في موت ناس كتير من العيلة وعمل مشاكل وخرابات وخب بيوت، هددته إني هفضحه وسط الناس كلها، وهقولهم ياخدوا بالطار لو ما بطلش الأذية دي.. بس ماكنتش أعرف إني بهدده بحياتي أنا.. عمي بيبيع أرواح البني آدمين للشيطان وأتباعه عشان يحموه ويقدر يرجع للعالم تاني بعد ما يموت، وكل فترة لازم أجبله عدد معين يكون فدا عن نفسي.. أنا آسف يا زياد... أنا حاولت

بس ماعرفتش، ولو ماعملتش كدا كنت هموت.. الراديو معمول عليه سحر أسود، وببشتغل عليه تعاويد وحاجات تحضركم إنكم تكونوا قرايين للشيطان من غير ما تعرفوا.. أكيد هو قالك فاضل كام يوم وياخد روح حد منكم، أنا شكلي مش هعيش بعد اللي قلتهولك دا كله، لأنه ماسك منشار وببيرقلي وبهددني إني أموت، بس مش مهم أنا مش عايز أكون السبب في موت ناس تاني.. هات شيخ قوي يا زياد، وخليه يفك العمل علشان ابنك ومراتك مايروحوش منك.. حاول تجيب حد بسرعة يا زياد، التعويذة اللي عاملها على نفسي قربت تتفك، وهو يقرب مني.. سامحني بس أنا كنت خايف وقتها.. سامحني..

"الخط قطع"

جريت على منال ولؤي عشان آخدهم ونخرج برا الشقة خالص بعيد عن الراديو، لمينا هدمونا بسرعة ورجعنا البلد تاني وحالتنا كانت صعبة جدا.. تاني يوم جبت شيخ على طول بس ماعرفش يعمل حاجة، بقيت كل شوية أجيب شيخ مختلف، وماحدث فيهم عرف يساعدي.. عدي الخمس أيام، ولقيت الراديو القديم بتاعنا شغال على محطة مش معروفة، ومش فاهم الكلام اللي بيتقال وصوت وش جامد وصريخ وعياط، فصلت الفيشة بس كان لسه الصوت مستمر، وفجأة لقيت ابني خارج من الأوضة بيرقص ويتنطط وبيعمل حركات غريبة، لحد ما وقع على رقبته واتكسرت ومات.. مراتي شافت المنظر جالها انهيار عصبي ودخلت المستشفى، ومن ساعتها وهي فاقدة النطق..

النهاردا بعد شهرين من الحادثة قررت إني لازم أحكي، عشان ماحدث يحصل معاه نفس اللي حصلني، حياتي اتدمرت وخسرت ابني، ومراتي بين الحياة والموت بسبب راديو.. التعويذة قربت تتفك، وهو واقف قدامي بمنشار كبير والغضب بيزيد على وشه أكثر.. آخر حاجة حابب أقولها، المرة الجاية لما تشغل الإذاعة، اتأكد من الكلام اللي بيتقال، عشان

هيبتي يدخل التعاويذ وسط الكلام وياخذ أرواح جديدة ويقدمها قربان
للشيطان علشان يفضل عايش .

تمت.

٦- المشرحة

- هيمشي على العلاج دا لمدة أسبوع كمان، ولازم يقعد في المستشفى لحد ما حالته تستقر.

= تمام، متشكرين لحضرتك يا دكتور.

- بالشفا إن شاء الله.

قال الدكتور جملته الأخيرة وخرج من الأوضة، وسابني أنا ووالدي، فضلت باصصله وهو نايم على السرير، ومش قادر يتحرك.. رocht قعدت على الكنبه اللي قدامه، وطلعت صورة من جيبي وسرحت في تفاصيلها.. كانت صورة ليا مع عمي يونس اللي في نفس سني، كنت بحبه جدا، وكنا قريبين من بعض لدرجة إن الناس كانوا بيفتكروننا إخوات، وللأسف مات في الحادثة اللي حصلت، ووالدي هو اللي نجا مع إصابات خطيرة، وبقالنا هنا ٣ أسابيع، وكل أسبوع الدكتور يقولي نفس الجملتين "هنستمر على العلاج دا ويلزم المستشفى لحد ميفوق..."

وفي يوم كنت تعبان ومرهق جدا من قلة النوم والراحة فنمت على الكنبه، وصحيت على الساعة ٢ بالليل، وكنت عطشان ومافيش مياه معانا في الأوضة، فأخذت الازاة ونزلت أملاها من الكولدير تحت.. الدنيا كانت هدوء ومافيش ناس ماشية في الدور.. وأنا طالع سمعت صوت حد بيعيط جاي من آخر الطرقة، فرجعت تاني من على السلم، ومديت راسي عشان أشوف مصدر الصوت، فلمحت بنت قاعدة لوحدها جنب باب كبير، فقررت أروح أشوفها بتعيط ليه، ولما رocht لقيتها بنت جميلة جدا عمرها ١٥ سنة تقريبا، ولابسة فستان طويل ورقيق لونه أصفر بس متوسخ شوية.. شعرها كان بني قصير لحد كتفها، وكانت حافية.. نزلت على ركبي عشان أقرب منها وأشوف مالها...

= إنتي تايهة يا أميرة؟

بصتلي وعنيها فيها دموع وقالت باستغراب...

- إنت عرفت منين إن اسمي أميرة؟

= عشان إنتي شكلك شبه الأميرات الحلوين، طلع اسم على مسمى.. إنتي بتعيطي ليه يا أميرة؟ وفين أهلك؟

- أنا عايزة أروح لماما، وحشتني أوي.. هما حابسيني في الأوضة دي، ومش عايزين يروحوني البيت.

= طب إنتي ايه اللي جابك هنا أصلا؟

- مش فاكرة، أنا صحيت لقيت نفسي محبوسة هنا وعايزة أخرج.

= طب قوليلي طيب باباكي اسمه ايه، وإنتي ساكنة فين؟

- بابا اسمه طارق عبد العزيز، هو بيشتغل دكتور تحاليل في مستشفى كبيرة، أنا ساكنة جنب القلعة.

كان في خدوش كتير في إيدها، ووشها فيه كدمات، فسألته من ايه الكدمات دي..

- بص أنا عايزة أروح بيتي، إنت بس اتصل بأهلي هما هيجوا ياخدوني، وأنا هحكليك على كل حاجة.

= طب تعالي معايا نروح للسكرتيرة تحت، ومليني الرقم نكلمهم.

اتوترت شوية وقالت...

- لا روح إنت، هما مش بيرضوا يخلوني أكلم حد وبيعذبوا فيا، حتى بص مخربشني في دراعي ازاى.. روح إنت دور على بابا وقوله إني هنا، أنا قاعدة مستنياك ماشي؟

وقعدت على الأرض وضمت رجليها تاني وهي رافعة راسها وبتبصلي بصة رجاء إني أساعدها.. طمنتها إني مش هسيبها لحد ما ترجع لأهلها، ونزلت

للسكرتيرة تحت أنخاق معاهم ازاى يعاملوا بنت صغيرة بالطريقة دي..
وقفت قدام السكرتيرة..

= أي خدمة حضرتك؟

- في بنت فوق بتقول إنها محبوسة هنا، وعايزة ترجع لأهلها، اسمها..
قالت بعدم اهتمام وهي بترتب الأوراق..

= اسمها أميرة، عمرها من ١٥ ل ١٧ سنة.. ها قالتلك ايه تاني؟

بصتلها باستغراب...

- طب حابسينها ليه؟

= البنت دي جت على المستشفى من أسبوعين، عربية الإسعاف لقيتها
مرمية على الطريق، وهي رايحة تنقذ ناس من حادثة عربية، باين إن حد
اعتدى عليها وهي هربت منه لحد ما وصلت للطريق العام.. للأسف
ماتت بعد يومين، وبن دور على أهلها عشان يستلموها، ناس كتير شافتها
هنا في المستشفى، واتصدموا بعد ما عرفوا إنها ماتت.. ماتنزلش الدور
اللي تحت تاني.

مشيت من عندها وأنا مصدوم وخايف في نفس الوقت، طلعت الأوضة
ونمت مع أبويا، وتاني يوم كان عندي فضول أشوفها تاني.. نزلت نفس
المكان الساعة ٢ بالليل، لقيتها قاعدة بنفس الطريقة، ولما قربت منها
قامت من مكانها وبصتلي بأمل...

= لقيت بابا ولا لسه؟

بعد ثواني رديت..

- لسه يا أميرة.

ماكنتش مقتنع إنها ميتة، بلمس جسمها أكني بلمس إنسان عادي، كنت عايز أتأكد أكثر فطلعت الموبايل وعملت نفسي بشوف حاجة وشغلت الكاميرا، بس مالقيتهاش ظهرت في الصورة، أكنها مش موجودة.. كل دا وهي واقفة قدامي بتبصلي.. حسيت بخوف بس جمعت شجاعتي، وأخذت منها كل المعلومات عنها، وطلعت أدور على أهلها نواحي القلعة وأسأل الناس، بس ماوصلتش لحد منهم.. وعلى بالليل رجعت على المستشفى عشان أشوف أبويا وكانت حالته زي ما هي، فنزلت الدور اللي تحت عند أميرة لقيتها قاعدة في مكانها، قعدت جنبها من غير ماتكلم، فقلت بهدوء...

= مالقيتش حد منهم صح؟

.... -

= أحكيك قصتي؟

- احكي..

= كنت عايشة حياة أي حد يتمنى يعيش فيها.. مال، رفاهية، حب، صحاب، كل حاجة عندي، كنت البنت الوحيدة لأبويا وأمي فكانوا مدلعي وبيحبوني جدا.. في يوم رحلت حفلة عيد ميلاد لصاحبتي واتعرفت على شاب هناك، في نفس سنك تقريبا.. قعدنا نتكلم فترة وبعدين حبيته جدا، كان كل حاجة في حياتي حقيقي، وعدني إنه هيفضل جنبي لحد ما اخلص الثانوية بعدين يجي يتقدملي، كان وسيم وشجاع، وفي كل الصفات اللي بتتمناها أي بنت، بس فجأة، وبدون أي مقدمات لقيته اتغير معايا، وبقي يطلب مني فلوس كتير أوي بحجة إنه مزنونق في الشغل، أو حصل عجز، وهيردهم على طول.. كنت بديله في البداية اللي هو عايزه، بس بعد كذا ابتدا المبلغ يزيد، وأنا مابقاش معايا تاني، وماينفعلش أطلب من أهلي المبالغ اللي هو كان عايزها.. ابتدا يضغط عليا ويقول إنني بتتخلي عني والمفروض نكون سند لبعض، وأنا مستحيل

أتجوز واحدة مش مستعدة تضحي عشاني.. فضلنا فترة كبيرة في مشاكل، ويطلب مني حاجات كتير ولو مانفذتش اللي هو عايزه يسيبني ويمشي.. ابتدا يهددني بحاجات غريبة زي إنه هيقول لأهلي إني سرقت منهم فلوس، وحاجات كتير أنا ماعملتهاش.. لحد ما طلبت منه نتقابل في كافية جنب النيل قبل أسبوعين من دلوقتي، وصلت في الوقت واستنيتته ساعة كاملة لحد ما جه.. كان قاعد قدامي بعدم اهتمام وتكبر، ماكنش دا الشخص اللي حبيته في الأول وآمنته على كل أسراري، مش دا اللي وعدني إنه هيفضل جنبي ويكون دعم وسند ليا.. حسيت إني قاعدة قصاد حد غريب ماعرفهوش وأول مرة أشوفه.. خرج عن صمته وسألني عايزة ايه.. كنت في قمة غضبي وقتها من بروده معايا، هددته لو بعث ليا حاجة تاني أنا هبلغ البوليس، وهفضحه في كل حته، وهقول إنه يببترني عشان أعمل اللي هو عايزه، وبما إني لسه قاصر فحيتحكم عليه بالسجن. اتخانقنا وقتها، وكان هيضربني لولا الناس ساعدتني إني أخرج من الكافية بسرعة، وللأسف نسيت شنطتي هناك من كتر الخوف، وماكنش معايا فلوس أروح والساعة كانت ٥ المغرب.. فضلت ماشية لحد ما تهت ومابقتش عارفة أنا فين، ووصلت لحوارات وحتت ضلمة.. فجأة لقيته جه هو وأخوه ناحيتي بعربية، ونزلوا وضربوني، كان عايز يموتني لولا صوت صريخي خلا الناس تخرج من بيوتها، فهرب هو وأخوه بالعربية، وأنا خرجت بسرعة على الطريق العام عشان أروح المستشفى، بس ماقدرتش أكمل من كتر الجروح اللي في جسمي ووقعت، وقتها كان في عربية إسعاف معدية على الطريق اللي أنا فيه، ولاقتني واقعة على الأرض فخذتني معاه، ولسه قاعدة في المستشفى لحد دلوقتي، بالتحديد في الأوضة دي.

شاورت على الأوضة اللي وراها، فبصيت عليها لقيتها المشرحة...

- إنتي.. إنتي عارفة إنك ميتة؟

ابتسمت وقالت..

= أنا عارفة إنك عرفت من السكرتيرة، واتفاجئت لما جيت تاني، كل اللي بيعرف بيخاف ويمشي، عشان كذا حكيتلك كل حاجة.. أنا مش هرتاح غير لما انتقم من يونس وأخوه.

سكت كام ثانية وسألته باستغراب...

- يونس! يونس مين؟

= يونس إسماعيل وأخوه بلال، أنا مش عايزة أمشي من هنا غير لما أوريهم نار جهنم على الأرض.

كنت في حالة صدمة، دا اسم عمي وأبويا! فضلت ساكت شوية، بعدين طلعت صورته ووريتها لأميرة...

- هو دا اللي قصدك عليه؟

بصت للصورة بغضب وقطعتها...

= أيوة، هو دا الملعون.

ماكنتش مصدق إن يونس ووالدي ممكن يعملوا كذا، أنا عمري ما شفت منهم حاجة وحشة، دا حتى الناس كلها بتشهد على حسن معاملتهم وسيرتهم الحلوة.. افتكرت اليوم دا لما يونس اتصل بابا وكان بيكلمه وهو متعصب جدا، وقفل معاه التليفون سألته رايح فين، قالي مشوار مع يونس وجي على طول.. بعدها جالي تليفون إن هما عملوا حادثة على الطريق، ويونس مات وأبويا حالته حرجة.. افتكرت لما كنا ماشيين ولقينا بنت مرمية على جنب في الضلعة والإسعاف شالتها معانا، بس ماكنتش مركز معاها علشان كنت مشغول مع أبويا ويونس.. بصيتها لقيتها بصالي بحزن وغضب، وبتسأل أنا أعرفهم منين وهما فين دلوقتي.. ابتسمت بسخرية، وقتلتها إن ربنا جابلك حقك في نفس الساعة، العربية اتقلبت

ببهم ويونس مات، وأخوه نايم فوق بين الحياة والموت.. كانت بتضحك وبتعيط في نفس الوقت، بعد كدا دخلت المشرحة وقفلت الباب بقوة.. طلعت عند أبويا فوق وأنا مش مصدق اللي عمله، وبحاول أكذب اللي سمعته من أميرة. تاني يوم نزلت أدور على أهلها لحد ما لقيتهم وجبتهم المستشفى.. كانوا منهارين لما شافوا جثتها في المشرحة علشان يتعرفوا عليها، وبعد ساعات اتكتبلها على تصريح للدفن، وأهلها خدوها ومشيو.. كنت شايفها وهي ماشية جنبهم بحزن وبتعيط وباصبة على نفسها بحسرة.. فجأة بصتلي والدموع مغرقة عنيتها، وبعدين اختفت.

بعد دقائق لقيت الممرضين بيجروا على الدور اللي فيه أوضة والدي، اتخضيت ورحت أشوف في ايه، لقيت الأسلاك متشالة من عليه، ومرمي على الأرض ووشه أزرق.. الممرضين كانوا بيحاولوا معاه بس هو كان قطع النفس.. كنت واقف مصدوم من الموقف، وكل الموجودين مش لاقين تفسير للي حصل، بصيت على باب الأوضة لقيتها واقفة، وابتسامه النصر مرسومة على وشها.. بصينا لبعض نظرة أخيرة، وخرجت من الأوضة ومشيت ورا أهلها للمقابر.

تمت.

٧- رقم عشوائي

كنت متعود على طول إني أكتب أرقام عشوائية وأتصل بيها في أي وقت، وبالذات بالليل، يعني كنوع من أنواع التسالي كدا، دا غير إن أحيانا حظي بيبقى حلو، ويطلع معايا بنات اوبن مايند، وبعد ماالايهم في الكلام، وأحس إن حد منهم ابتدا يتعلق بيا، بعملها بلوك ومابكلمهاش تاني.. المهم أنا بقالي سنين على الموضوع دا أنا وواحد صاحبي، ممكن نتصل نعمل مقال في الناس، أو نهددهم ونخوفهم كدا يعني.

- لسه شاحن كارت أهو تعالى نتسلى شوية.

= لا يا معتر، مابقتش فاضي خلاص ورايا شغل.

- شغل ايه دلوقتي يا بني، الساعة ١٢ قفل يلا وتعالى.

= أما أشوف لو عرفت هجيلك ..

قفلت مع صاحبي وكنت عارف إنه بيقول كدا وخلص ومش جاي.. قعدت على الكنبه وكتبت رقم عشوائي، وطلع صح ورن فعلا.. فضل يرن أول مرة ماحدث رد، اتصلت تاني الخط أفتح بس هدوء مش سامع حاجة، قلت أكيد واحدة ومستنية تعرف مين الأول، فضلت فاتح السكة وماتكلمتش لحد ما الخط قطع.. كدا اللعبة ابتدت تحلو، اتصلت تاني فتح، بس المرة دي سامع صوت همهمة، ومش فاهم حاجة.. ابتديت أقول الكلام العادي اللي بنعاكس بيه...

- ألو.. وحشتيني.. فينك يا بنتي مش بشوفك ليه؟

كنت بتكلم على أساس حد يرد عليا، بس كان في صوت همهمة ومش عارف أحدد نوع اللي بيتكلم، وفجأة جه صوت عياط وصريخ جامد، وحسيت إن ودني هتتخرم؛ فاتخضيت وقفلت السكة بسرعة.

فضلت قاعد مكاني مش مستوعب اللي سمعته، صوت صرخة البنت أول مرة أسمعها في حياتي، أكن حد بيقتلها، أو هي معايا في المكان..

ماهتمش ونمت، وتاني يوم الفضول أخذني عشان أتصل على نفس الرقم، وفتحت فعلا.. ردت بنت كانت بنت بتعيط بهستيريا وتقول...
- الحقني هيموتوني.. دخلوا الشقة وأنا مستخبية في دولاب الحمام..
الحقني والنبى..

والخط قطع.. اتصلت أكثر من مرة بس ماكنتش بترد، وبقيت مش عارف أعمل ايه، رحى أبلغ الشرطة وسمعتهم المكالمة، وبعد فترة قصيرة عرفوا يوصلوا لعنوان الرقم، وفي يوم اتصل الشرطي عليا..

= أيوة يا أستاذ معتر، البلاغ اللي حضرتك قدمته عن المتصلة المستغيثة.

- اه ماله؟

= بعد ما وصلنا للعنوان اكتشفنا إن الشقة مقفولة بقالها ٦ شهور، واللي كان ساكن فيها بنت فعلا، والجيران قالوا إنها ماتت من حرامية لما كانوا يسرقوا شقتها.

ماكنتش عارف أرد عليه بايه، ماكنتش مصدق كلامه، وحسيت بقبضة في قلبي.. كمل كلامه علشان يطمئني وقال إن يمكن الخط اتباع، أو حد من معارفها أخده وبيعمل بيه مقابل.. شكرته على تعاونه معايا، وطلبت منه العنوان بتاعها واداهولي فعلا، ولما رحى لقيت باب الشقة عليه تراب، وسكان العمارة أكدولي إن ماحدث دخل الشقة تاني بعد موت صاحبته، بس كنت حاسس إن في حاجة بتشدني للشقة.. وقفت قدامها، وطلعت موبايلي ورنيت على الرقم، سمعت صوت الرن جوا، وشفيت خيال بيتحرك من تحت الباب، عشان الخط يفتح وترد عليا وتقول....

= معتر وحشتني.. فينك يابني مش بشوفك ليه؟

اتخضيت وقفلت السكة بسرعة، ورجعت ورا وعيني على الباب من تحت.. كنت شايف خيالات بتجري جوا، بعد كدا سمعت صوت صريخ جامد، ولما سمعته نزلت بسرعة من العمارة، وأخذت تاكسي على بيتي على طول.. كنت قاعد على السرير بنهج من اللي حصل، مش قادر أصدق ولا أستوعب، ازاي! ازاي واحدة ماتت بتتصل بيا! وازاي أصلا موبايلها فضل شغال الفترة دي كلها من غير ما يفصل؟ فضلت أفكر لحد ما عيني راحت في النوم، وصحيت على صوت رنة الموبايل، قلبي اتقبض، وكنت خايف أشوف الرقم لتطلع هي.. بس طلع كريم صاحبي اللي قتلته ييجي امبارح وكان عنده شغل...

- أيوة يا كريم.

= خير يا معزز؟ رنيت عليا مش شوية.

- أنا رنيت عليك! كنت نايم يا بني.

= لا رنيت عليا من شوية، إنت بقيت تنسى ولا ايه؟

سبته يتكلم ورحت أشوف اتصلت بيه ولا لا مالقيتش حاجة عندي..

- لا يا كريم مارنتش عليك أنا، اتأكد إنت من اللي كلمك.

= خلاص ماشي.. بس إنت رنيت وأنا فتحت، وكنت سامع صوت واحدة بتتكلم، وقعدت أنه عليك ماردتش قمت قافل.

سمعت كلمة واحدة وماعرفتش أتكلم، ازاي الكلام دا يعني!

- لو مسجل المكالمة ابعتها لي يا كريم.

= ماشي.

بعد تردد فتحت الريكورد اللي كريم بعته على الواتس و لقيته صوتها، بنفس الهمهمة، بعد كدا صوت صريخ والسكة قفلت.. اتصلت بكريم

سألته في صريخ حصل في آخر المكالمة قالي لا، فطلبت منه إنه يجيلي البيت بسرعة.

- يابني مافيش صوت صريخ، همهمة مش مفهومة بس، ممكن يكون إنت فتحت عليا وإنت نايم، وقعدت تخرف وناسي.

= لا يا كريم لا، أنا مش فاكراً أى حاجة من اللي إنت بتقولها دي، المشكلة إن مش ظاهر أي اتصال صدر مني ليك عندي على الموبايل، وإزاي مش سامع الصرخة اللي في آخر المكالمة!

- والله يا معتر ما في صريخ ولا حاجة، إنت ممكن تكون تعبان شوية ارتاح بس..

ماكنتش مقتنع وبحاول أخليه يصدقني، وعشان يقنعني إن دا من خيالي، قال إنه هياخدني عند الشقة دي تاني بالليل، ويثبتي إن مافيش حاجة اسمها روح بتسكن المكان.. كنت خايف ومش عايز أروح، بس هو أصراً ولازم يأكدلي كلامه، وعلى المغرب أخذني بالعربية وروحنا الشقة ووقفنا عند الباب، وعشان أثبتله إن في حد جوا، طلعت موبايلي ورنيت على الرقم لقيته مغلق، رنيت أكثر من مرة وطلع مغلق برضو، بصلي كريم ورفع حاجبه...

= ها يا سيدي شفت؟ مافيش حاجة من الل...

وقبل ما يكمل كلامه باب الشقة انفتح فجأة، وظهرت إيدين لست طويلة جدا من الضلمة، وشدته لجوا والباب اترزع جامد.. فضلت أخبط وأنده عليه وأحاول أفتح الباب ماعرفتش، لحد ما سمعت صوته وهو بيصرخ جوا، وصوت حاجات بتتكسر، خفت ونزلت ركبت العربية وروحت البيت على طول..

النهاردا عدا ٣ أيام على فقدان كريم، وأهله قالين عليه الدنيا، وأنا حابس نفسي في الأوضة وخايف أخرج، وكل ما أحاول أفصل موبايلي ألاقيه اشتغل، وبقي مشحون مع نفسه.. وبعد فترة لما ابتديت أهدأ وأحس بالأمان، لقيت رقم

غريب يرن، عشان أرد وألاقي صوت كريم، ووراه صوت همهمة وضحكة بنت،
وهو بيقول...
"ايه يا معتز.. كدا تسيبني لوحدي وتمشي؟ إنت وحشتنا أوي"

تمت.

٨- ناقص واحد

- ألو.. أيوة يا مروان بقولك ... في إعلان كدا لقيته على الفيس..

= إعلان ايه يا علي؟

- عارف بيوت الرعب اللي بنسمع عنها دي، أنا نفسي أروحها أوي، وماكنتش عارف ايه أكثر مكان حلو ويكون مجمع كل حاجة، فنزلت بوست على جروب وسألت فيه، وواحد رد عليا، وبعثلي العنوان والصور وكل حاجة تخص المكان، وقالي إنه حاجة جديدة ومختلفة عن البيوت الثانية، وهنتبسط أوي فوافقت، والنفر الواحد بـ ٢٠٠ ج، ولو كسبنا اللعبة هناخد ٨٠٠ ج هدية.

= ودا مالفتش نظرك لحاجة يا علي؟

- لا، ايه المشكلة؟ تعالي نجرب وناخد الفلوس.

= لا يا عم، الحاجات دي بتبقى ضحك على الناس، أنا مش رايح.

- دا إنت أكثر واحد بتحب الحاجات دي يا مروان، وبعدين أنا خلاص كلمت أسامة، وقررت هنروح النهاردا بالليل.

= أسامة مين يا علي اللي بيخاف من خياله دا، إنت عايز تموت الواد؟ لا يا علي كنسل الموضوع دا، أنا مش مرتاحله.

- بقولك ايه أنا قررت خلاص، وكلمت الراجل كمان، يلا مستنيك النهاردا الساعة ١١ ونص في المكان اللي هبعتهولك، يلا سلام.

علي كان متشوق يروح المكان جدا، وبالذات إن كان فيه حاجات تشد أي حد بيحب بيوت الرعب والمغامرات، بس الغريب إن أي مكان زي دا

بيقفل الساعة ١٠ أو ١١ بالكثير، واحنا هنبتي لعب الساعة ١٢!
ماركزتش في تفاصيل أوي، بس ماكنتش مرتاح..

وصلنا المكان الساعة ١١ ونص بالليل زي ما كنا مخططين، كنا ٣ أنا
وأسامة وعلي.. لقينا شاب واقف قدام المكان مستنينا، ولابس إسود
وسلاسل وخواتم كثير، وشعره فيه أكثر من لون، ووشم على دراعه
ورقبته.. شكله ماكنش مريح للعين بس كملنا، ادانا مفاتيح الأوض، وورق
عشان نعرف الطريق، وكشافات، وكل اللي عرفته من أسامة وإن دا بيت
خاص بيه مساحته ٣٠٠ م، وهو عامله للتسلية ويكسب منه فلوس كل
يوم.. المهم فهمنا إن في ألغاز لازم نحلها عشان نكمل بقية الأدوار اللي
في اللعبة والباب يتفتح، وهو هيقعد يراقبنا من الكاميرات اللي في كل
حطة، ويبتدي يشغل الحاجات اللي جوا باللابتوب بتاعه..

= إنتو هتفضلو جوا لحد الساعة ٣ الفجر وبعد كدا هتخرجوا، هنا
المكان مختلف عن أي مكان تاني وإنتمو هتحسوا بكدا، ومش هتكون آخر
مرة.

كان بيتكلم وهو فرحان أوي مش عارف ليه، المهم دخلنا البيت وهو كان
معاه شمعة، لقيته بيقولنا احنا هنعمل حاجة مختلفة عشان أحسسكم
إنكو في مغامرة فعلا.. جاب ورقة وكتب عليها أسماءنا، وشك صوابنا
بالدبوس ونقط دم على الورقة وخرجها برا البيت وحط عليها شمعة،
وقفل الباب وخبط ١٢ خبطة عليه مع دقائق الساعة اللي بتعلن
منتصف الليل.. ماحدث فينا كان فاهم حاجة وكنا فاكرين إن دي مجرد
لعبة عادي، وبعدين فتح الباب طفى الشمعة، وقالنا لازم نتحرك في
البيت كله، وماينفعش نقف في مكان معين أكثر من ٣ دقائق.. واحنا
واقفنا على كلامه، وبعدين خرج وقفل الباب، وابتدت مغامرتنا...

البيت من جوا كان على الطراز الأمريكي القديم، وفي لوح متعلقة على الجدران وكانت عبارة عن ناس تحسها محبوسة جوا الصورة بالإكراه، ومرميات متعلقة في كل حطة، المكان كان ريحته تراب، والعفن مالميه.. مشينا شوية لحد ما وصلنا لأول لأوضة وكان شكلها زي المصحة النفسية، ومكتوب على الحيطه بتاعتها كلام كثير وفيها رسومات بدائية لأشخاص وعلى وشهم من فوق خط إسود، وآخر الأوضة من الجنب باب مقفول.. واحنا بنتفرج على الأوضة لقينا ورقة وقعت من السقف..

"أهلا بيكم في العالم بتاعي، أنا أنوبيس خاطف أرواح البشر، واللي هيحدد مصيركم بعد الموت.. في كتاب في الصندوق اللي ورا الدولاب.. استعدوا لزيارة ماهيتا."

ماكناش فاهمين حاجة من الكلام.. مين ماهيتا؟ روحنا ورا الدولاب ولاقينا صندوق مكتوب عليه بخط منعكش... "ماهيتا.. أم العقارب"، مسافة ما مسكنا الكتاب لقينا عقارب سودا كثير طالعة علينا من الصندوق، وصوت ضحك ست جاي من ورا.. من أول ما شفنا شكلها اتأكدنا إن دي مش لعبة عادية؛ ست لونها إسود جدا، وعينيها على شكل عقرب بارز لبرا، وشعرها ديل عقرب كبير. كانت قاعدة على كرسي وفاتحة دراعتها الاتنين وكل حطة حطة في جسمها بيطلع منها عقرب.. أخذت الكتاب من أسامة اللي كان اتجمد من الرعب وفتحته.. الكلام فيه مش مفهوم ومنعكش والجمل غريبة.. فضلت أدور فيه بسرعة لحد ما عيني وقعت على كلمة ماهيتا، بصيت لعلي اللي كان بيضرب العقارب بخشبة كبيرة..

- أعمل ايه؟ مش فاهم حاجة من الكتاب.

= العقارب دي حقيقية دي كلت الخشبة.. اقرا الكلام يا مروان، يا رب ما يكون اللي في دماغى صح .

كنت بقرا بصعوبة لأن الكلام مش واضح والدنيا مش نور أوي، وكل ما بقراكل ما صراخ الست يعلى والعقارب تكتر حوالينا.. بصلي أسامة وقالي اوعى توقف قراية.. فضلت أقرأ اللي في الكتاب لمدة ٥ دقائق، لحد ما كل حاجة اختفت في ثانية، والدنيا هديت ولا إكأن حصل حاجة، بصينا لبعض بخوف، لقيت أسامة مسك الكتاب وقال...

- إنتو عارفين عملتوا ايه؟ إنت عارف هيحصلنا ايه بسببك يا علي؟ دا كتاب شمس المعارف يا علي، واللعبة عبارة عن أنواع جن بتظهر، واحنا المفروض نصرهم بشطارتنا.. أنا خارج من هنا.

لسه بنلف عشان نخرج من الأوضة، لقينا عقرب كبير واقف على باب الأوضة، واللي بيقرب عليه بيحاول يلدغه.. والباب الثاني اللي في آخر الأوضة اتفتح، والعقرب ابتدا يتحرك ناحيتنا.. جرينا بسرعة للأوضة الثانية، ومن أول ما دخلنا الباب اتقفل قبل ما العقرب يدخل.. الأوضة كانت أضيق من اللي فاتت شوية، وشكلها زي معامل التحاليل، والجدران مرسوم عليها ازايض فيها دم، وعلى طرابيزة صغيرة محطوط صندوق موسيقى....

- حسبي الله ونعم الوكيل فيك يا علي.

= أنا ماعرفش إن الموضوع هيكون بالطريقة دي أنا زي زيكم، المهم إننا نخرج من هنا على خير.

- أنا خايف..

= ماتخافش يا أسامة، هنفضل مع بعض لحد ما نخرج إن شاء الله.. الساعة كام معاكوا؟

بصيت في ساعتى لقيتها واقفة، وأسامه برضو ساعته واقفة عند الساعة ١٢.. طلعتنا موبايلتنا لقيناها مقفولة ومش عايزة تشتغل.. واحنا بنتكلم لقينا ورقة نزلت علينا من السقف برضو...

"أكواريل بيحب لون الدم.. خلوه يشبع"

قرأنا الورقة وحسينا بالرعب.. مين أكواريل؟ ونخليه يشبع ازاي؟ فجأة الأوضة كلها نورت، وجهاز الموسيقى اشتغل على أغنية حزينة، وظهر راجل في آخر الأوضة شكله وحش ومكشر والدم بينزل من جسمه.. طلع ٣ سكاكين كبار وحدهم علينا، ولما جت واحدة منهم في إيدي ضحك جدا، وحتة من جسمه اختفت، بعدين رجع مكشر تاني، والحتة الي اختفت من جسمه ابتدت ترجع تاني ببطاء.

- أنا مش فاهم ايه اللي المفروض نعمله؟

فضلنا ندور في الأوضة على أي ورقة أو كتاب عشان نصرفه بس مش لاقين حاجة.. فضلنا واقفين والرعب مالي قلوبنا ومش عارفين نعمل ايه، وأنا إيدي كانت وجعاني جدا مطرح ضربة السكينة، فكنت بدوس عليها عشان أخرج الدم الملوث منها و لقيت الراجل بيضحك ، وكل ما الدم ينزل على الأرض حتة من جسمه بتختفي..

"أكواريل بيحب لون الدم، خلوه يشبع".. الكلمة دارت في مخي وبصيت للسكاكين وفهمت.. طريقة صرفه إنه يشوف الدم، قلت لأسامة وعلي بس ماكانوش عايزين يعوروا نفسهم، كنت بحاول أقنع فيهم، وإن هي دي الطريقة الوحيدة عشان نخرج من هنا..

= وإنت ايش ضمنك إننا هنعيش في الأوضة الثالثة؟ أنا مش هقطع في نفسي.

- يا أسامة افهم، احنا لو ما عملناش كدا مانعرفش ايه اللي هيحصل، دي مش مجرد لعبة وعرايس بتتحرك من اللاب زي ما قالنا صاحب البيت، واللي قرأته في الكتاب بتاع ماهيتا إن الحركة اللي احنا عملناها قبل ما نبتدي لعب، اللي هو الدم اللي على الورقة و ١٢ خبطة مع دقائق الساعة،

فتحت بوابة بين العالم بتاعنا وعالم الشياطين، ومش هيتقفل غير الساعة ٣، لنخرج عايشين، لنخرج ناقص واحد.

واحنا بنتكلم الأوضة ابدتت تضلم واحدة واحدة، وجثث ناس ميتة ابدتت تظهر على جدران الأوضة ونازل منها دم، والراجل بدأ جسمه يكبر ويطلع منه سكاكين، ويقرب ناحيتنا.. وهيفضل يقرب لحد ما يزنقنا في الحيطه ونموت.. مسكنا السكاكين وابتدينا نعور نفسنا، وكل مرة ندوس على الجرح جامد عشان نازل منه دم، كل ما الراجل جسمه بيختفي، فضلنا نعور نفسنا لحد ما اختفى خالص، والأوضة ضلمت، والموسيقى وقفت، وفتح الباب.. دخلنا الأوضة الثالثة بسرعة اللي كانت بيضا خالص، وعلى الجدران صور لحيوانات مفترسة، والأرض رسمة تعبان كبير، ومكتوب في آخر الأوضة "الخروج.. لكن واجهني"، ولقينا ورقة مرمية على الأرض مكتوب عليها..

"كحلون.. آخر الملوك"

ما فهمناش حاجة من الورقة، بس فضلنا ندور في الأوضة على أي حاجة تفهمنا هنعمل ايه، واللي فهمناه إن دي آخر أوضة هندخلها بعد كدا هنخرج، مع إننا دورنا كويس ومالقيناش حاجة، بس ظهر كتاب فجأة في ركن من أركان الأوضة، رحت فتحته وأول جملة قرأتها الأرض اتهزت من تاحيتنا جامد والتعبان المرسوم ابتدا يتحرك، لحد ما ظهر حقيقي قدامنا.. كملت قراءة، ومع كل صفحة بتخلص حيوان من المرسومين يطلع من الحيطه، وصوت الحيوانات بيزيد حوالينا، وابتدينا نحس بوجع في جسمنا، ومن كتر الوجع أسامة اغمى عليه.. بصتله وأنا مش قادر أقف على رجلي وبكمل قراءة في الكتاب بس غصب عني سكت.. لقيت التعبان جاي ناحية أسامة ويبشده لعنده.. فأخذ علي مني الكتاب وكمل هو قراءة بسرعة بصوت عالي، وأنا كنت بحاول أسحب أسامة من

التعبان.. مش عارف قضينا وقت قد ايه واحنا على الحال دا، بعد كدا فقدت الوعي.

مش عارف احنا دخلنا المستشفى ازاي ومين لحقنا والناس عرفت ازاي مكانا؟! .. بس كنت شايف ناس بتجري بينا، وبيقولوا لقيناهم مرميين على الطريق العام.. وناس بيقولوا في واحد منهم ميت.. ماكنتش فاهم حاجة، بس اللي عرفته بعد كدا إننا كنا داخلين لعبة مع الشياطين، واللي بيدخل اللعبة معاهم مش بيخرج سليم، أسامة فقد الوعي من ساعتها، والدكاترة قالوا إن مافيش سبب طبي يدخله في غيبوبة الفترة دي كلها. وعلي قفل موبايله وحابس نفسه في الأوضة وماييتكلمش مع حد. وأنا فضلت أروح لمشايخ الدنيا كلها عشان أرجع أسامة تاني لوعيه.. تفتكروا بعد ما نطقنا أسامي الجن دي هيسيبونا عايشين بسلام تاني؟ "كحلون.. أكوارييل.. ماهيتا" رغم اللي شفناه منهم، بس كل المشايخ أكدولي إن دول أضعف الملوك، ورغم كدا ماخرجناش غير ناقص واحد.. ناقصين أسامة.

تمت.

۹- قربان

في يوم بابا جه قالي تعالى وصلني بالعربية عند واحد صاحبي عشان كنا بالليل وهو مابيعرفش يسوق في الضلمة، قتلته ماشي، وسبقته أنا على العربية عشان أسخنها قبل ما ييجي، ولما جه اتحركنا...

= تعرف يا أنس، عمك مسعود دا صعبان عليا أوي والله، تحسه اتخلق عشان يتعذب بس.

- أستغفر الله يا بابا، ليه بتقول كدا بس؟

= من ساعة الحادثة اللي حصلتلها وابنه مات قدام عينه، مابقاش زي الأول، دايمًا تلاقيه بيخرف كدا وبينده عليه على طول، وبيقول إنه قاعد معانا.

- طب ومراته فين؟

= الله يسهلها سابتله الواد من زمان ومشيت، كانت ست قادرة ومفترية، وعمرها ما عيشته يوم عدل، هو اللي كبر الواد وعلمه، وكانت روحهم في بعض لحد ما ربنا اختاره.. عشان كدا بقولك عمره ما ارتاح أبدا.

- طب احنا رايعين عنده ليه؟

= طلب مني آجي أقعد معاه شوية، ونشرب كوباية شاي سوا، ما قدرتش أرفض طلبه، هو مش ناقص.

وصلنا لشقة عم مسعود، ولما خبطنا فتحلنا راجل في الخمسينات من العمر، شعره مترتب، وباين عليه العقل والرشد، عكس ما تخيلت وصفه من بابا خالص.. سلم علينا بحرارة، ودخلنا الصالون...

= والله ليك واحشة يا بكر، كدا يا راجل، لازم أكلّمك عشان تيجي تقعد معايا شوية؟

- حَقك عليا يا مسعود، الشغل والله ما ملاحق أرتاح حتى.

بصلي عم مسعود وقال...

= الصلاة على النبي ابنك بقى طولك أهو، أنا فاكرك يا أنس من وإنت
لسه قاد كدا..

- الله يخليك يا عمي.

= تعرف لؤي ابني في سنك تقريبا، استنى لازم تشوفه، يا لؤي.. لؤي..
عمك بكر هنا تعالى سلم عليه.

الدنيا كانت هدوء خالص وما فيش أي صوت، وهو باصص ناحية الأوضة
ويينده عليه.. بابا بصلي ورفع حاجبه، اللي هو شفت زي ماقلتلك.. وعم
مسعود بينده عليه بابا قال...

= سيبه سيبه يا مسعود، ليكون نايم ولا حاجة تصحيه.

- لا يا عم هو صاحي، لسه كان قاعد معايا قبل ماتيجي.. المهم تشرىوا
ايه؟

= لا والله ما تتعب نفسك، احنا شوية وهنمشي عشان الشغل مالي
الورشة.

واحنا بنتكلم سمعنا خبط كوبايات في المطبخ، بصلنا عم مسعود وقال...

- أهو شفت مش قلتلك صاحي، بيحضرلكم العصير بنفسه أهو.

حسيت ابويا اتوتر، وبقي عايز يقوم يمشي بسرعة...

= لا لا مش هنشرب حاجة والله، احنا همنشي خلاص.

- إنت خايف مني إنت كمان يا بكر وفاكرني مجنون زيهم؟ يا بكر أنا ابني
عايش وقاعد معايا على طول كمان، وبناكل سوا وبنعمل كل حاجة سوا..
إنت ليه مش عايز تصدقني وخايف مني؟

= لا لا مصدقك يا مسعود طبعاً، بس أنا عندي شغل، والمدام طالبة
مني حاجات ماينفعش أتأخر عنها إنت عارف.. هجيلك يوم ثاني إن شاء
الله.

قام بابا بسرعة عشان يمشي، وخرج معنا عم مسعود وعلى وشه علامات
الحزن من ردة فعل بابا، وأنا خارج وقبل ما يقفل عم مسعود الباب،
لمحت شاب واقف ورا باب الأوضة ببص علينا وعينيه شكلها مرعب
جدا.. بعد ما ركبنا العربية بابا كان بينهج...

= عمري ما ارتحت لمسعود ولا لبيته دا، أنا حاسس إن روح ابنه ساكنة
البيت.. إنت سمعت الخبط اللي أنا سمعته؟

- ٥١ ..

مارضتش أقوله إني شفته وهو ببصلنا من ورا الباب عشان ما يخافش
أكثر.. وبعد ما هدي قالي يلا اطلع.. قعدنا ندور على مفتاح العربية
مالاقيناهوش..

- تلاقيني نسيته فوق يا بابا، هطلع أجيبه بسرعة وأجي.

= طب بسرعة وماتتأخرش.

طلعت أجيب المفتاح، وقبل ما اخبط على الباب سمعت صوت عم
مسعود وهو بيتكلم، وصوت حد خشن بيرد عليه، صوتهم كان عالي
أكنهم بيتخانقوا، وكنت سامعه بوضوح وأنا حاطط ودي على الباب،
فجأة لقيته اتفتح وعم مسعود واقف مكشردامي...

= المفتاح.. نسيت مفتاح العربية بس، ينفع تجيبهولي؟

- ادخل خده.

دخلت، وابتديت أحس بالرعب وأنا شايف خيال بيجري قدامي ومش عارف أحدد شكله.. بعد كذا باب أوضة بيترزع جامد، وأصوات حاجات بتقع.. دخلت الصالون بسرعة، وكنت بدور على المفتاح بس مش لاقية، فضلت ادور لحد ملقيت عم مسعود جاي عليا، وماسك سكينه وطشت كبير وحطه علي الأرض، وبيقولي أنا آسف، وابتدا يتهجم عليا وعايز يقتلني.. جريت برا الصالون فلقيت بابا قدامي طالع يشوفني إتأخرت ليه .. وقف عم مسعود لما شاف بابا ومابقاش عارف يخبي السكينة، أخذني والدي بسرعة ونزلنا على تحت، واحنا خارجين لاقيت مفتاح العربية على الكرسي، أخذته ونزلنا بسرعة ومشينا...

= ماكنتش مصدق كلام الحارة وأصحابي، لحد ما كنت هتضيع مني.. كنت بسمع كلام إن مسعود بيقتل عشان خاطر يجدد القربان، وابنه ييجي تاني، وإنه عمل صفقة مع الشيطان علشان روح ابنه ترجع تعيش معاه تاني، بس بشرط إنه يقدم أرواح ناس تانية للشيطان كل فترة، عشان ابنه يفضل معاه، وكان بيعمل كذا مع صحابي لما يجوا، بس ماكنش بيقدر يموتهم، فكانوا يجوا يحكولي، وماكنتش بصدقهم.. ورغم كذا عمر الشرطة ما مسكت عليه جريمة خالص، رغم إن الشارع كله شاكك فيه، والجيران دايمًا يشوفوه داخل بجواميس الشقة، ويدبجها جوا ويغرق الحيطان دم، لحد ما تخرج من باب الشقة كمان..

- دا مريض يا بابا، مافيش حاجة اسمها قربان والكلام دا، إنت لازم تتصل بالمصحة العقلية تيجي تاخده.

ماردش عليا وروحنا، وتاني يوم قمنا على صوت تليفون حد من صحاب بابا، وبيقوله إن الجيران لاقت دم كتير خارج من شقة عم مسعود الصبح، ولما فتحوا الشقة لاقوه مدبوح، ومافيش دم في جسمه خالص ومتصفي، ولما روحنا عند مسعود عشان نتأكد من الخبر، لقينا ميت فعلا؛ فعرفت إن مسعود فشل في إنه يجيب قرايين تاني، عشان روح ابنه

تفضل موجودة معاه.. بصيت على باب الأوضة، لقيت شاب في سني
واقف يببص علينا من ورا الباب وهو بيعيط، بعد كدا قفله ببطاء
وماظهرش تاني.

تمت.

١٠ - سحر القبر

أنا خايف أقوم من مكاني.. خايف أتحرك ليحصلني حاجة، مش عارف هفضل قاعد على السرير كدا لحد امتي، الموت بيقترب مني وأنا شايفه بعينيا ومش عارف أبعد عنه.. أتمنى حد يبجي يساعدي، هديله اللي هو عايزه بس يخرجني من اللي أنا فيه.. الحكاية بدأت في يوم مشؤوم، كنت راجع فيه من مصلحة خلصتها، وأخذت منها قرش كويس يعيشني مرتاح لسنين قدام، حطيت الفلوس في شنطتين ضهر، وخفت أمشي من الشارع العمومي اللي بيوصل لبيتنا على طول عشان ماحدث ياخد باله مني، فقررت إني أسلك شوارع وطرق تانية ضلمة ومافيهاش رجل كثير، لحد ماوصل للبيت.. كنت ماشي وحاسس إن في حاجة هتحصل، بس تجاهلت الموضوع، وطلعت نور الموبايل ينورلي الطريق.. كل حاجة كانت تمام لحد ما لقيت كذا واحد ظهري، حوالي ٦ أو ٧ أشخاص، وكان معاهم مطوة وسكاكين كبيرة وعايزين يسرقوني.. ومن أول ما شفتهم حسيت بالرعب، كنت خايف لياخدوا الفلوس مني، فضلت أجري وهما يجروا ورايا، وأنا مش شايف اللي قدامي غير بنور كشاف الموبايل، فضلت أجري لحد ما وصلت لحتة شبه المقابر بس مهجورة.. ماكنش هامني حاجة غير إن الفلوس تفضل معايا.. دخلت المقابر، وفضلت أجري منهم لحد ما وقعت في حفرة عميقة وقفلت الكشاف بسرعة قبل ما يعرفوا مكاني.. فجأة سمعتهم وهما بيصرخوا وبيسموا الله وصوتهم ابتدا يبيعد.. فضلت قاعد في الحفرة، وباخذ نفسي بالعافية من كتر الجري، وضربات قلبي كنت سامعها من علوها.. وبعد دقائق لما اتأكدت إنهم مشيوا، شغلت الكشاف علشان أشوف عمق الحفرة اللي أنا فيها وأعرف هطلع منها ازاى.. وبعد ما شغلت الكشاف لقيت جثة طفل صغير مرعي جنبي، وغرقان دم، وهدومي كلها اتبهذلت منه.. حسيت وقتها إن قلبي اتخلع من مكانه من الخضة ومن شكله الوحش، وكنت بحاول أطلع بسرعة بس ماعرفتش...

= ماتخافش يابني، اطلع مشيوا خلاص.

- مين! مين إنت؟

ظهري وش راجل عجوز من فوق، فضل باصصلي كام ثانية بعدين قال...
= ايه اللي جابك هنا الساعة دي يابني؟ مش خايف لقطاع الطرق دول يقتلوك؟

- طلعتي يا حاج الأول من هنا بس، في عيل مرمي.. طلعتي بسرعة.

رمالي سلم من الحبل طلعت عليه، لحد ما وصلت للسطح، وبعد ما قمت ونفضت هدومي، واثأكدت إن الدم ماوصلش للفلوس جوا، رفعت عيني عشان أشوفه.. كان راجل عجوز لابس عباية مقطعة شوية وفيها بقع، شعر راسه ودقنه كان غزير، وكثير من سنانه واقعة.. بصلته بقرف وشكرته، ولسه همشي قام أتكلم...

= مش هتبلغ عن الطفل المقتول تحت دا؟

- وأنا مالي بيه! أهم حاجة إني كويس.

بصلي كام ثانية كدا وقال...

= هات شنطة من دول.

- وإنت مين عشان أديلك حاجة؟

= أنا اللي أنقذت حياتك، وطلعتلك من قبر مفتوح كان ممكن تموت فيه وماحدش كان هيدري بيك.

- ماحدش ضهرك على إيدك عشان تطلعتي، وامشي بقى من قدامي.. مش ناقصك إنت كمان.

اديتله ضهري وكنت ماشي ناحية الطريق، فسمعتة بيقول...

= إنت اللي اخترت طريقك يا جابر، ماترجعش تقول عايز اللي يخرجني منه..

لما سمعته قال اسمي اتخضيت وبصيت ورايا عشان أسأله عرف اسمي ازاى بس مالمقيتش حد موجود، والحفرة اللي وقعت فيها مش موجودة.. حسيت بوجع رهيب في دماغي، ودوخة شديدة لدرجة إني وقعت على الأرض من كتر الوجع.. وبعد نص ساعة من العذاب، الوجع اختفى فجأة لكنه ماكنش موجود أصلاً.. قمت وأنا مش عارف أجري من كتر الخضة والرعب، وروحت على البيت على طول..

= فينك يا جابر كل دا؟ الساعة ٤ الفجر قلقتني عليك.. ايه دا مالك يا بني وشك مخطوف كدا ليه؟ وايه التراب والدم اللي على هدومك دا؟

- مافيش يا أمي، أنا كويس.. واحد عربية خبطته فالدم جه عليا لما كنت بنقذه.. المهم إنتي وإخواتي كويسين؟

= أه يا حبيبي.. أحضرك لقمة تاكلها بقي؟

- لا مش عايز، أنا هدخل أنا، تصبجي على خير..

دخلت الأوضة وقفلت الباب، كنت حاسس بوجع في جسمي رهيب بس كله يهون.. فتحت الشنطتين وفضلت أقلب في الفلوس، بعدين حطيتهم تحت السرير ونمت.

" ٢٥ أكتوبر.. بداية اللعنة"

كنت ماشي في الشارع رايح أقابل أعز صحابي وليد، كنا ماشيين أنا وهو بنتكلم عادي، لحد ما لقيت غراب ميت وقع على راسه.. شلناه بقرف

وكملنا مشي، وفجأة ظهرت عربية نقل كبيرة شايلة خشب جاية عكس الطريق وماشية سريع جدا وتدوس على وليد.. تدوس عليه هو بس، وأنا العربية فالمستنيش حتى، مع إني كنت واقف جنبه بالظبط! وبعد كذا الخشب يقع من العربية على وليد وهو نايم على الأرض، ويكسر بقيت العضم السليم الي في جسمه، والدم يتنطر على وشي...

صحيت من النوم مفزوع، العرق مغرق جسمي أكني طالع من البحر، ونفسي كنت باخده بصعوبة.. دا كابوس.. أسوأ كابوس شفته في حياتي، كل الأحداث كأنها حقيقية، ماكنتش حاسس إني بحلم أبدًا ... مسحت وشي وقمت شريت . بصيت في الموبايل لقيت الساعة ٤ الفجر، ففضلت صاحي مش عارف أنام من كتر التفكير في اللي شفته.. ولما عيني راحت في النوم تاني، شفت الخشب يقع على وليد، علشان يكسر الباقي اللي فاضل من عضمه، والدم يتنطر على وشي.. كنت بصرخ بأعلى صوتي وأنا بندة عليه، والإسعاف جاية تشيل الي باقي منه..

قمت من النوم مفزوع تاني وأنا مش فاهم.. ازاى نمت وكملت بقيت الحلم؟ وازاي حاسس إن الكلام دا كله حقيقة! بصيت في الساعة لقيتها ١٢ الظهر، وأنا ماسك الموبايل لقيت وليد بيرن عليا.. كنت متردد وخايف أرد عليه ، بس في الآخر كلمته ...

- أ.. ألو..

= ايه يا جابر فينك؟ برن عليك من بدري.

- كنت نايم، خير يا وليد في حاجة؟

= عيد ميلاد أخويا النهاردا، تعالى معايا أشتريه هدية.

قلبي اتقبض وماكنتش عارف أنكلم، كنت عايز أصرخ أقوله ماتخرجش يا وليد وماتتحركش من مكانك وأنا هجييلك المحلات لحد عندك.. بس لقيتني بتكلم لا إرادى، وبقوله ماشي انزل دلوقتي هنتقابل.. نزلت وأنا

بترعش، وبقنع نفسي إن دا مجرد حلم.. قابلته وكان بيضحك وفرحان إنه هيجيب هدية لأخوه، فضلنا ماشيين.. فجأة لقيت غراب ميت وقع على راسه، شاله بقرف وكملنا مشي، وأنا كنت بصرخ من جوايا مش عايز أكمل، بس زي ما يكون في حاجة بتحركني، حاجة هي اللي ممشياني.. وفجأة ظهرت عربية نقل كبيرة شايلة خشب، جاية عكس الطريق وماشية سريع جدا تدوس عليه.. تدوس عليه هو بس، وأنا العربية مالمستنيش حتى، مع إني كنت واقف جنبه بالظبط! وبعد كدا الخشب يقع من العربية على وليد وهو نايم على الأرض، ويكسر بقيت العضم السليم اللي في جسمه، والدم يتنطر على وشي..

وقعت على الأرض من المنظر، كنت بضرب راسي في الأسفلت عشان أصحى من الحلم، بس المرة دي دا ماكنش حلم.. جسمي كان بيترعش ومش قادر أقف على رجلي، الناس اتجمعت حولينا وبسرعة طلبوا الإسعاف وجم شالوا وليد وأخدوني معاه..

"بعد ٣ أيام"

- هو عامل ايه يا طنط؟

= أهو يا بنتي زي مانتي شايفة، لا بياكل ولا بيشرّب من ساعة اللي حصل، الدكتور قال إنه في حالة صدمة مؤقتة.

- طب ينفع أشوفه؟

= روجي يا حبيبتى يمكن يفوق شوية.. هو في أوضته ماخرجش منها من يومها.

طرقات خفيفة على الباب

دخلت وقعدت جنبي على السرير، كنت في حالة من اللاوعي، لحد ما إيديها الدافية لمست وشي بحنان.. كنت بتكلم ببطء، وشي باين عليه الإرهاق..

= نبيلة..

- إسحاق قالي على اللي حصل، دا قضاء ربنا يا جابر، ماينفعش تعمل في نفسك كدا.

بدأت أعيط بحرقة، كنت حاسس أكن في شاكوش بيدق على دماغي من كتر الوجع وخايف أنام من ساعة اللي حصل.. أخذتني في حضنها، وكانت بتحاول تهديني على قد ما تقدر، كنت حاسس بدموعها وهي نازلة على وشي من كتر حزنها عليا وعلى صاحبنا وليد.. بعد شوية قامت عشان تجيب الغدا من المطبخ وصممت إني آكل معاها، وبعد مخلصنا أكل ابتديت أحكيلها اللي حصل، والحلم اللي شفته قبل موت وليد.. كانت بتسمعني وهي مستغربة وخايفة في نفس الوقت...

- دي كانت مرة، وإن شاء الله مش هتتكرر تاني، عينك بقت لون الدم من قلة النوم يا جابر، إنت كدا هتأذي نفسك.

= أنا خايف يا نبيلة.. خايف أغمض عيني بس لاشوف حاجة تاني، مش فاهم ايه اللي بيحصل، أنا تعبان.. تعبان أوي..

أخذتني في حضنها وطبطبت عليا وهي بتكرر..

-اهدا.. مش هيحصل حاجة كله تمام.. إنت تعبان بس من ساعة اللي حصل، نام شوية يا جابر.. نام..

بعد يومين قمت من النوم جسمي كان مكسر ودماغي وجعاني، طبيعي أنام المدة دي كلها بعد ما فضلت صاحي ٣ أيام متواصل.. عدا شهر على

موت وليد وكانت كل حاجة طبيعية في الفترة دي ، وأنا رجعت أنام تاني بانتظام.

- أيوة يا جابر، إنت في البيت؟

= أه يا نبيلة، خير؟

- جياالك أنا وإسحاق في مصلحة كدا، عايزاك تخلصهالنا وكلنا هنتراضي فيها.

= لا يا نبيلة مش عايز حاجة تاني، خرجوني أنا من الموضوع دا.

- مش بمزاجك يا جابر، احنا في العربية أصلا قربنا نوصلك، يلا سلام.

وصلت لعندي هي وإسحاق، اتعرفت على إسحاق من ٣ سنين لما كنت في الجامعة، راجل محترم وعنده طموح، بس غامض شوية.. قعدنا في أوضتي وكنا بنتكلم في الشغل، لحد ما لقيت ماما داخله علينا، وهي ماسكة القميص اللي وقعت بيه في الحفرة وجه عليه دم الطفل، وبتقولي إنه مش عايز ينضف، وإنها كل مرة بتغسله البقع بتزيد فيه أكثر.. أخذته منها ورميته في الزبالة، وبعدين قامت نبيلة وهي بتتذمر من حرارة الجو، وشغلت المروحة على أعلى سرعة، عشان بعد دقائق المروحة تقع عليها وتفصل دماغها عن جسمها وراسها تيجي في حجري، والدم يملأ الحيطان.. بس برضو المروحة مالمستنيش ولا قربت مني، وفضلت تلف في الأوضة، لحد ما وقعت على ظهر إسحاق وهو مستخبي ورا الكنبة.. كنت بصرخ بكل قوتي بس صوتي مش طالع..

قمت من النوم مخضوض والعرق مالي كل جسمي، قلبي بيدق أكني كنت بجري في ماراثون ومش عارف آخذ نفسي، بصيت في الساعة لقيته نفس التوقيت اللي صحيت فيه من حلم وليد "الساعة ٤ الفجر".. خفت أنام

تاني، خفت أحط جسمي على السرير حتى.. عدا أسبوع على الحلم وأنا في حالة توتر وتعب.. وزني نزل من قلة الأكل، ووشي بان عليه الأرق والذبول.. وفي يوم كنت قاعد زي عادتي مش بعمل حاجة، قاعد باصص في الفراغ، لقيت موبايلي بيرن بصيت لقيتها نبيلة، قلبي اتقبض، ورميت الموبايل على الأرض ففصل، وبعد شوية لقيت أمي داخله الاوضة بتقولي نبيلة كلمتني وعازاك، موبايلك مغلق ليه؟ إيدي كانت بتترعش وأنا باخد الموبايل من أمي، ورديت بصوت واطي متقطع....

= أ.. ألو..

- أيوة يا جابر، إنت في البيت؟

= أه يا نبيلة، خ.. خير؟

- مال صوتك يابني؟ المهم، جايلك أنا وإسحاق في مصلحة كدا، عازاك تخلصهالنا وكلنا هنتراضي فيها.

= لا يا نبيلة مش عايز حاجة تاني، خرجوني أنا من الموضوع دا وماحدش ييجي.

- ايه دا في ايه؟ مش بمزاجك يا جابر، احنا في العربية أصلا قربنا نوصلك، يلا سلام..

وصلت عندي هي وإسحاق، قعدنا في أوضتي وكنا بنتكلم في الشغل، وأنا في حاجة بتصرخ من جوايا زي المرة اللي فاتت، بس مش عارف أتكلم ولا أتحرك أكني متكتف، فضلوا قاعدين لحد ما لقيت ماما داخله علينا، وهي ماسكة القميص اللي وقعت بيه في الحفرة وجه عليه دم الطفل، وبتقولي إنه مش عايز ينضف، وإنها كل مرة بتغسله البقع بتزيد فيه أكثر، أخذته منها ورميته في الزباله، وبعدين قامت نبيلة وهي بتتذمر من حرارة الجو، وشغلت المروحة على أعلى سرعة، عشان بعد دقائق المروحة تقع عليها وتفصل دماغها عن جسمها وراسها تيجي في حجري، والدم يملا

الحيطان.. بس برضو المروحة مالستنيش ولا قربت مني، وفضلت تلف في الأوضة، لحد ما وقعت على ضهر إسحاق وهو مستخبي ورا الكنبه.. روت بسرعة عشان أشوفه لقيته مات.. كنت بصرخ بكل قوتي بس المرة دي صوتي طالع، أي دخلت على صوتي واغمي عليها من المنظر.. وبعد أسبوع من الموقف دا قررت أروح لشيخ، وكلهم من أول ما بيشفوني يفضلوا يسموا الله، ويطلعوا من المكان اللي أنا فيه، لدرجة إني روت الكنيسة، وبرضو مافيش حد عايز يساعدي.. لحد في يوم كنت ماشي في الشارع، ولقيت راجل في الستين من عمره ماعرفهوش مسكني جامد من دراغي، وفضل باصص في عنيا، وبعدين قالي وهو بيزعق...

= إنت عملت ايه؟

جسمي اتنفض ومابقتش عارف أقف ووقعت على الأرض.. فضل معايا وسندي لحد ما وصلنا لبيتته، كنت ماشي بالعافية لحد ما وصلت واترميت على الأرض، قعد قدامي وبكل هدوء طلب مني أحكي.. حكيتله كل اللي حصل وهو كان قاعد ساكت، وكل اللي كان بيعمله إنه بيتتم بحاجات مش سامعها، بعد ما خلصت فضل ساكت شوية وبعدين قال...

= إنت معمولك سحر إسود مستحيل تنجى منه، القبر اللي وقعت فيه والدم اللي كان جواه، دا كان معمول عشان سحر، والراجل اللي شفته دا ساحر معروف ومشهور في العالم الثاني، هو في الوقت دا كان بيعمل طقوس وحاجات خاصة، وإنت جيت قاطعته لما دخلت المقابر المهجورة، واللي طلب منك الفلوس كان الجن من اللي معاه، ولما رفضت تديهم هما اللي أدوك، ومافيش حد بيقدر على سحره ولا قدراته، إنت اتعملك عمل بإنك تحلم بالحاجة ولازم تتحقق، حتى لو عدا عليها سنين، السنين اللي إنت مش هتلق تعيشها أصلا.

انهرت من العياط، ماكنتش عارف هعمل ايه ولا هتصرف ازاي.. طلبت منه يفك السحر لكن اعتذر، وقال لي إنه أقوى منه بكثير.. خرجت من عنده وماكنتش قادر أمشي، يا دوب وصلت البيت بالعافية واترمت على السرير.

النهاردا حلمت إن أمي داخلة عليا الأوضة وهي بتصوت وبتقولي الحق أخوك وقع عليه حاجات من السطح، قمت مخضوض ورحت أشوفه، وأنا بشيله عشان أجري بيه على المستشفى سمعت صوت أمي بتصرخ من ورائنا، علشان أبص وألاقي عمود النور اتكسر ونازل على دماغي..

دلوقتي صحيت من النوم مخضوض على صوت أمي وهي بتصوت، وبتقولي الحق أخوك.. أنا خايف أقوم من مكاني.

تمت.

١١ - لعنة بريانكا

بعد انتهاء امتحانات الترم الثاني، قررت أنا وصحابي نطلع مصيف علشان نفوق شوية من الضغط اللي كنا فيه، و بعد نقاش طويل قررنا نطلع الغردقة، باقتراح من صديقي عماد..

أنا هحكليك كل حاجة بالتفصيل عشان مايحصلش معاك نفس اللي حصل معنا...

يوم الاثنين الساعة ٤ الفجر اتصل بيا محمود عشان يصحيني، ونلحق الأوتوبيس.. كنا ٤ صحاب مسافرين، أنا ومحمود ويوسف وعماد.

- إنت لسه نايم يا إبراهيم؟ قوم يلا الأوتوبيس هيفوتنا بسببك.

= قول صباح الخير الأول.

- إنت عارف الساعة كام؟

فتحت عيني بثقل وبصيت في ساعة الموبايل...

= أيوة الساعة ٤ هقوم أهو، يلا سلام.

"الساعة ٥ الصبح في الأوتوبيس"

إبراهيم: عمال ترن ترن لحد ما صحيت اللي في البيت كله.

محمود: وإنت نايم طبعاً كالعادة، المهم هو البيت كبير بجديا عماد، ولا بيضحك علينا؟

عماد: يا بني دا كبير جداً، وبسعر ما حدش يتوقعه كمان.

محمود: ازاى بيت كبير زي دا مساحته معدية ١٠٠ متر، وإيجار ٥٠٠ جنيه في الشهر! لا وكمان في الغردقة!

بصيت لعماد وقتلته: متأكد يا عماد؟ لتكون سمعت غلط ولا حاجة، ونروح نندبس في البيت، أو نبات في الشارع.

عماد: يا بني ماتقلقش، أنا قعدت أدور في أحلى المناطق اللي في الغردقة، وأنا بسأل لقيت راجل جه عندي، وقالي أنا عندي بيت كبير وقريب من البحر كمان، وبسعر ممتاز، طبعا ماقدرتش أرفض.

يوسف: أما نشوف، بس أنا مش متطمئن.

بعد ٥ ساعات وصلنا أخيرا، ومشينا مع عم عمران صاحب البيت عشان يعرفنا الطريق.

- خلاص يا جماعة قربنا نوصل أهو.

محمود: احنا بقالنا ساعة بنسمع الكلمة دي يا عماد، فين البيت اللي قريب من البحر دا؟ احنا عدينا البحر، وقربنا نخرج من القرية ولسه ماوصلناش للبيت!

- خلاص يا محمود قربنا نوصل..

محمود: أنا مش عارف هو ليه مُصر إننا نمشي، كنا أخذنا أي تاكسي وخلاص ومش هنعاسبه عليه يعني.

عم عمران: خلاص يا شباب وصلنا أهو.

كلنا في صوت واحد: الحمد لله.

وقفنا قدام البيت نتفرج عليه من الخارج، كان كبير ومبني من الخشب والطراز المعماري بتاعه قديم ويميل لتصميم البيوت الأجنبية ... وقف عمران قبل ما ندخل يشرح لنا تصميم البيت من جوا، واللي كان بيتكون من دورين، الدور الأول فيه صالون كبير فيه مدخنة ومطبخ وحمام، والدور الثاني فيه ٤ غرف وحمام صغير، كلهم فيهم شباك ما عدا أوضة

واحدة بس الشباك بتعاها اتسد بالطوب، ولما يوسف سأله ليه مسدودة، تجاهل سؤاله أكنه ماسمعهوش.. سلمنا المفاتيح والابتسامه مافارقتش وشه.. هو راجل عجوز أه وشعره أبيض، وسنانه صفرة ومعظمها مش موجود، بس صحته كويسة، وكان أسرع واحد بيمشي فينا.. المهم سلمنا المفاتيح، مفتاح لباب البيت، ومفتاح لكل أوضة، حتى المطبخ والحمام ليهم مفاتيح خاصة بيهم.

بعد ما شفت المفاتيح قتلته: متأكد يا حاج عمران إن المفاتيح دي شغالة؟ دي مصدية وشكلها بايظ!

عمران: المفاتيح والبيت قدامكم أهو، في أوضة مقفولة بالقفل ماحدش يفتحها فاهمين؟ إيديكم بقى على فلوس الإيجار، خلوني أشوف بقيت يومي، ولو أي حاجة باظت إنتو اللي هتدفعوا تمناها، حتى لو ورد الفاظة.

عماد: أكيد طبعا يا عم عمران، البيت هيرجعلك صاغ سليم ماتقلقش، واتفضل فلوسك أهى، وبعد شهر إن شاء الله هنسلمك المفاتيح.

يوسف: أنا مش مرتاح للراجل دا.

محمود: إنت مش بترتاح لحد أبدا يا يوسف.

بعد ما عمران خد الفلوس ومشي، فتحنا البيت ولقيننا كوم تراب بيستقبلنا أكن ماحدش سكن فيه من سنين.. طلعت برا عشان أشوف عمران ازاي يسلم لينا البيت بالطريقة دي بس مالمقيتهوش، فدخلنا البيت بأعجوبة من ريحة التراب، وماكناش عارفين نمشي فيه من كتر الغبار..

محمود: أنا دلوقتي فهمت تصميمه إنه ياخذ الفلوس قبل ما ندخل، دا حتى ماصبرش نفتح البيت واختفى!

بصيت لعماد بلوم: إنت مش قلت يا عماد إنك روحت البيت ودخلته
من جوا؟

عماد: أنا قلت كدا بس علشان توافقوا، وبصراحة كدا أنا مادورتش على
بيوت أصلا، دا واحد معرفة كدا هو اللي دلني عليه، ولما لقيت السعر
والمكان كويس مارفضتتش.

محمود: يعني المفروض دلوقتي إني أنضف البيت دا كله، عشان أعرف
أعيش فيه زي البني آدمين، وأسيب البحر! أنا بكرهك يا عماد.

ضحكت أنا ويوسف، ووقفنا نتفرج على الخناقة الكوميديا اللي دارت ما
بينهم، محمود من النوع اللي مش بيشيل ورقة من على الأرض، ودلوقتي
مضطر ينضف عشان يفضل موجود معنا..

خلصنا الدور الأول وغرفتین من الدور الثاني، كنا تعبانين جدا من مشوار
السفر والتنظيف كمان، فخلينا الغرفتين التانيين لبكرة..

عماد: بس ايه البيت الغريب دا، أنا أول مرة أشوف مدخنة في حياتي،
مش الحاجات دي انقرضت من زمان؟

محمود: إنت بالذات ماتتكلمش خالص، مش ملاحظين يا جماعة كمية
الصور اللي متعلقة على الحيطان؟ لا وشكلها مرعب!

يوسف: الصور قديمة أوي، شكلها كدا لأجداد عمران ولا حاجة.. بس
وأنا بمسحهم حسيت بكهربا في إيدي مش عارف ازاي!

عماد: كهربا! دي لوحة هيوصلها كهربا ازاي؟

يوسف: ماعرفش بقى، أنا قلت اللي حسيت بيه.

سيبتهم ودخلت الحمام أستحمى من التراب اللي كنت فيه، وبعد ما خلصت حاولت أفتح الباب بس معرفتش، خبطت كتير وندهت عليهم بس ولا أكن في حد في البيت...

محمود: إبراهيم اتأخر أوي كل دا في الحمام ليه؟ أنا هروح أشوفه ليكون نام ولا حاجة، ساعتها مش هنعرف ندخل غير لما يصحى.

يوسف: دا لو صحي أصلا.

سمعت صوتهم وهما على الباب بيندهوا عليا، رديت بخنقة: إنتو فين كل دا! عمال أنده عليكم بقالي ربع ساعة، الباب علق ومش عايز يفتح من عندي.

محمود: إنت ندهت أصلا؟ احنا قاعدين في الصالة اللي جنبك دي ماحدث سمع حاجة.

إبراهيم: طب اخلص وافتح، اتخنقت من البخار والشباك مش عايز يفتح هو كمان.

حاول محمود يفتح الباب بس ماعرفش، فنده على عماد ويوسف بس برضو ماحدث فيهم عرف يفتحه.

عماد: إنت قفلت ازاي يابني؟ دا أكنه مقفول بالمفتاح!

يوسف: طب استنوا صحيح أجيب المفتاح يمكن يفتح.

محمود: مفتاح ايه! ماينفعش يكون مقفول بالمفتاح إلا إذا كان حد قفله من برا.

راح يوسف جاب المفاتيح وبيديها لمحمود...

محمود: يابني مش هيفتح، ماحدث قفله بمفتاح أصلا، احنا هنعمله بالسكينة ولا شوكة.

إبراهيم: يا جماعة اخلصوا أنا بتخفق جوا، جربوا المفتاح ولا أي حاجة، عايز أخرج مش قادر أتنفس.

يوسف وهو ييزق محمود: طب اتاخر كدا أجرب، عقبال ما تجيب الشوكة بتاعتك.

مجرد ما حط يوسف المفتاح في الباب وبيلفه فتح فعلا...

عماد: ازاي اتقفل بالمفتاح دا!

يوسف: مش عارف!

إبراهيم: إنتو بتهزروا يا جماعة؟ بتحبسوني في الحمام!

عماد: والله ما حبسناك يا إبراهيم، إنت من ساعة ما دخلت واحنا قاعدين في الصلاة، ماحدث اتحرك من مكانه غير لما محمود نده علينا.

إبراهيم: اومال العفريت هو اللي قفله يعني!

محمود: أنا مش عارف الباب اتقفل لوحده ازاي! وزى ما عماد قال كنا قاعدين في الصلاة من أول ما دخلت إنت.

يوسف: خلاص يا جماعة يمكن الباب اتقفل لوحده، إنتوا شايفينه يعني دا قديم أصلا ويقاله ١٠٠ سنة، أكيد علق أو اللسان طلع وإنت بتقفله يا إبراهيم.

إبراهيم: ماشي، هحاول أقتنع.

"تاني يوم"

يوسف: صباح الخير يا جماعة، إففف ايه الريحه المقرفة دا!

عماد: مش عارفين، احنا قمنا مستغربين زيك كدا بالظبط.

يوسف: دا أكن حاجة ميته في البيت، شوفوا إبراهيم طيب يا جماعة ليكون هو ولا حاجة.

محمود: الموقف مش ناقص سخافتك، أنا على آخري، قوموا دوروا معايا على مصدر الريحة دي علشان لو فضلت كدا أنا مش هعرف أقعد في البيت دا دقيقة كمان.

قعدوا يدوروا على مصدر الريحة، وماكنش في غير أوضة واحدة بس اللي مانتضفتش، وهي اللي مقفولة بقفل...

عماد: اسمع كدا.. في صوت طالع من الأوضة دي.

محمود: طب شوف كدا الميدالية اللي معاك، يمكن فيها مفتاح القفل دا.

عماد: لا مافيش، هو اداني مفاتيح الأوض كلها، والأوضة دي كمان بس مادانيش مفتاح للقفل، هو مش قال صحيح ماחדش يدخل الأوضة دي؟

خرج يوسف من الأوضة اللي كان منضفها الصبح: الأوضة اللي نضفتها مافيهاش أي حاجة، مالكوا واقفين كد ليه؟

عماد: اسمع كدا..

كانوا سامعين صوت حركة في الأوضة، مع صوت خبط خفيف جدا.

محمود: أنا عندي فكرة احنا...

(صوت خبط على الباب)

استنوا أشوف مين الأول...

= مفاجأة.. جبتلکوا ٤ كيلو سمک لسه شایله من علی الشواية حالا، یلا
تعالوا بسرعة قبل ماي.. ایف.. ایه دا! ایه الريحه دي!

عماد وهو نازل من علی السلم: إنت ماشميتهاش قبل ما تخرج الصبح؟
= لا ماکنتش موجودة.

عماد: أنا ومحمود خرجنا الصبح قبل ما تصحوا نتمشى شوية، وماکنتش
موجوده برضو.

محمود: لا ما أنا مش هضیع أول يوم فی التنضیف، والثانی أدور فیهِ علی
حاجة مية!

ردیت بسرعة: سيبکم من البيت دلوقتي، وتعالوا ناکل علی البحر قبل
السمک ما یبرد .

محمود: اقل البيت کویس یا عماد، بدل ما حاجة تتسرق ونتدبس فیها.

ردیت بسخرية: مین اللي هیجیله نفس یبص علی البيت أصلاً، دا حتی
شکله من برا معفن، یظهر إن صحابه كانوا شبهه برضو.

مجرد ما خلصت کلام، لقيت حاجة وقعت علی راسي من فوق، وفقدت
الوعي..

"بعد ساعة"

= اه دماغي.. هو ایه اللي حصل؟

محمود: قصرية الزرع وقعت علیک، إحمد ربنا إنها كانت فاضية
وما فیهاش طينة، وإلا كان زمانک بتتحاسب دلوقتي.

إبراهيم: قصرية! ودي جت منین دي! أنا ماشفتهاش قبل کدا..

ماكنش في أي قصاري زرع فعلا، وكلهم موافقين كلامي.. دخلنا البيت ودورنا تاني على مصدر الريحة في كل ركن، لحد ما وصلت للمدخنة...

= الريحة جاية من المدخنة يا جماعة، تعالوا نشيل الخشب اللي ساددها دا يمكن في حاجة واقعة جوا.

وبعد محاولات فكينا الخشب بصعوبة مع إنه قديم بس كان متركب جامد.. وبعد ماخلعناه بص يوسف جواها فاتخض ورجع ورا، وعماد لما شاف المنظر خرج برا البيت خالص، أما أنا ومحمود كان على وشنا علامات الاستغراب أكثر من الاشمتزاز...

- قطة! ودي دخلت ازاي؟

= شكلها ميت من زمان أصلا، نص لحمها مش موجود، اشمعني ريحتها طلعت دلوقتي!

رميناها برا البيت، وقعدنا كنا في الصالة ساكتين، قاطع سكوتنا يوسف وهو بيقول بحماس: البيت دا غريب أوي وقديم كمان، بقولكم ايه أنا عندي فضول أشوف ايه اللي في الأوضة المقفولة دي، وبالذات بعد كل اللي حصل دا.

عماد: لا يا عم، دي شكلها حاجات عمران، واحنا مش ناقصين مشاكل معاه لما يبجي ويلاقي القفل مكسور.

يوسف: هو مش هيعرف، احنا نشتري قفل جديد ونسيبله المفتاح في أي حثة في البيت، وهو مش هيشوفنا تاني أصلا.

رديت أنا ومحمود بالموافقة وطلعنا الأوضة، ويوسف جاب الشاكوش وكسر القفل، وبمجرد ما الباب اتفتح حسينا بحاجة غريبة، بس ما حدش قال للتاني ومثلنا الشجاعة....

محمود: أوضة عادية جدا مليانة كراكيب، بس ايه الصور دي كلها! دا كان استديو ولا ايه؟

عماد كان بيتفرج على الصور بتركيز، وفجأة ضحك وقال بسخرية: ايه دا، بصوا البنات اللي بشنب دي، دي شكلها أم عمران، شبهه أوي..

كنت بدور بعيني في الأوضة بتركيز، لحد ما لقيت هدوم مرمية في الأوضة شكلها غريب، ولما مسكتها لاقيتها كلها دم، لسه هعلق عليها أنا ومحمود.. لقينا عماد بيصرخ بقوة والباب مقفول على صوابع إيده..

- آآه.. افتحوا الباب بسرعة.. صوابعي هتقطع.

= اهدا ماتصرخش في ودني.. مش عايز يتفتح يا جماعة!

محمود: استنوا لقيت مفك.

وبصعوبة وبعد محاولات فتحنا الباب...

يوسف: أنا أول مرة أشوف باب بيتقفل على حد بالطريقة دي!

أخذنا عماد ودخلنا المطبخ على طول، وحطينا تلج على إيده..

= آآه.. بالراحة يا إبراهيم بالراحة.. شيله شيله مش قادر..

- استحمل يا عماد، إيدك زرقا ووارمة، لازم التلج يفضل عليها شوية..

وبعدين ايه اللي وداك عنده كدا أصلا؟

= لقيت حاجة بتلمع عند الباب، بمد إيدي أشوف ايه دا لقيته اتقفل عليها.

بصيت لمحمود باستفسار: خدت بالك من الدم اللي علي الهدوم دا؟

محمود: اه شفته..

يوسف: وأنا كمان برضو لقيت صندوق خشب صغير فيه ذهب وخواتم وغوايش، حاجات من اللي البنات بتلبسها دي، وشعر لواحدة ست، وتمثال شبه تماثيل القدماء المصريين، الصندوق كان كبير مالحتش أشوفه كله.

عماد: ودا معنا ايه؟

محمود: ماعرفش.. أنا داخل أنا، تصبحوا على خير.

عماد: إبراهيم.. خدني معاك في الأوضة مش عايز أنام لوحدي.. ولا أقولك خلاص، هاخذ محمود ينام معايا؛ مش هعرف أنام من صوت شخريك طول الليل.

إبراهيم: مين قال إني هاخذك معايا، أنا مش طايقك أساسا من ساعة ما دخلنا البيت دا.

البيت كان فيه أربع أوض، واحدة ليا، وواحدة لعماد، وواحدة محمود ويوسف بيناموا فيها سوا، وبعد اللي حصل محمود راح يبات مع عماد في أوضته. في اليوم دا كنا تعبانين جدا ولما الساعة جت ١٠ كنا نايمين، وعلى الساعة ١٢ بالليل يوسف قام علشان يشرب، وفجأة خبط على أوضة عماد جامد ودخل وهو مخضوض، وبعد صعوبة محمود فهم منه إنه قام يشرب ولما رجع لاقى حاجة نايمة على سريره..

عماد وهو نايم: ايه اللي هينام على سريرك يعني يا يوسف، تلاقي الغطا محطوط على بعضه وبيتهيا لك.. روح نام يا حبيبي يلا واتغطى كويس.

يوسف بعصبية: ماتعصبنيش.. بقولك في حد نايم على سريري وبيتحرك.. ومش إبراهيم، وأنا راجع من المطبخ بصيت عليه لقيته نايم. صحيت على صوت يوسف روحت الأوضة وفهمت منهم اللي حصل...

إبراهيم: يمكن حرامي؟

يوسف: وهو الحرامي هيبجي ينام عندنا ليه يا إبراهيم؟

عماد: خلاص يا يوسف يبقى عفريت، روح نام بقي وماتصدعناش..

محمود: عفريت ايه مافيش الكلام دا.

مجرد ما محمود خلص كلام لقي اللي بيشده من دراعه فاتخض جامد..

بصيتله وكنت بضحك: ايه يا بني اتخضيت كدا ليه، مش لسه بتقول مافيش حاجة اسمها عفاريت، يلا بقي يا بطل عشان تمشي قدامنا.

وصلنا الأوضة وكانت الدنيا ضلمة لإن لمبة الطرقة محروقة، فعماد جه من ورانا وزعق بصوت عالي: ما تشغل النور يا محمود مستني ايه؟

محمود بعصبية وهو مخضوض من صوت عماد وبيحاول يقيد النور: مش عايز يقيد يا عماد، مش عايز يقيد.. كل واحد يطلع موبايله.

طلعنا الموبيلات ودورنا في الأوضة كويس مالقيناش حاجة، ومافيش حاجة تدل على إن حد دخل الأوضة أصلا..

محمود: مافيش حاجة يا يوسف، إنت كان بيتهيألك بس.

يوسف: والله العظيم كان في حاجة عمالة تتحرك على السرير هنا.

رديت: إنت بيتهيألك بس يا يوسف من التعب ولا حاجة، ماتخافش.

كلنا كنا بنداري خوفنا ما عدا يوسف هو اللي كان ميت من الخوف، وجه نام معايا في الأوضة..

وعلى الساعة ٣ بالليل صحي عماد وفضل يهز في محمود علشان يصحيه وكان بيتكلم بصوت واطي: محمود.. محمود... إنت يا بني قوم بقي

محمود: في ايه يا عماد؟ ايه يا حبيبي شفت ايه إنت كمان؟
عماد بصوت واطي: اسمع كدا.. في صوت حد بيعيط برا..
محمود: تلاقي يوسف ولا حاجة لسه متأثر من اللي حصل، اتغطى ونام
يا عماد.

عماد: قوم يا محمود معايا، أنا مش عارف أنا من الخوف.
في اللحظة دي موبايل محمود رن، ففتح عينيه بصعوبة علشان يشوف
مين اللي بيتصل...

محمود: إبراهيم! ليه بيرن عليا وهو في الأوضة اللي جنبنا! ألو..

.... -

محمود برق وبص لعماد ولسه حاطط الموبايل على ودنه...

عماد: ايه بيقولك ايه؟

محمود لسه حاطط الموبايل على ودنه ومش بيرد، كان بيسمع صوت
همهمة ووش وكلمة "ممممم" بصوت مرعب جدا...

عماد: ايه يابني في ايه ما تنطق!

فجأة محمود سمع صوت صريخ ست ومن الخضة رمى الموبايل من
إيده وهو مصدوم، ولما هدي حكى لعماد...

محمود: عارف لو طلع مقلب من إبراهيم..

عماد: لا إبراهيم نايم أنا متأكد..

دخلوا الأوضة عندي ولقوني صاحي أنا ويوسف...

عماد: ايه اللي صحاكم؟

إبراهيم: قمت مخضوض من النوم على حد بيشد رجلي، ويوسف يقول إنه سمع صوت واحدة بتصرخ.

محمود: أنا كمان سمعته لما اتصلت بيا.

إبراهيم: أنا ما اتصلت بيا، وموبالي مافيهوش رصيد أصلا وماينفعلش أستلف.

يوسف: أعوذ بالله من الشيطان الرجيم.. بسم الله الرحمن الرحيم «الله لا إله إلا هو الحي القيوم....».

وهما بيتكلموا سمعوا صوت خبط براء، وصوت الكراسي بتتحرك في الصلاة تحت أكن حد بيزقها من مكانها...

محمود: لا إله إلا الله، حد يشغل قرآن يا جماعة خلي الليلة دي تعدي على خير، وبكرة الصبح نكون ماشيين من هنا.

اتفقنا إننا نمشي من أول ما النهار يطلع علشان الموضوع ماكنش محتاج أي نقاش في الوقت دا.. شغلنا قرآن فعلا و الدنيا هديت شوية حوالينا، ونمنا كلنا في نفس الأوضة على سرير واحد!

الساعة ٩ ص صحانا محمود من النوم، عشان نقوم نحضر الشنط ونخرج برا البيت...

عماد وهو بيمسح على وشه: طول الليل بحلم أحلام وحشة، احنا نمنا كلنا على نفس السرير ازاى؟

محمود: الخوف بيعمل أكثر من كدا، أنا ماعرفتش أنام أصلا.. إبراهيم.. يوسف.. يلا قوموا حضروا الشنط علشان نروح السوق نجيب شوية حاجات ونمشي على طول.

عماد: حاجات ايه يا محمود اللي لازم تجيبها! أنا مش عايز أقعد ثانية هنا تاني، كفاية اللي شفته امبارح.

محمود: لا ما أنا ماتبهدلش البهدلة دي كلها، وأمشي في الآخر من غير مااشترى لبانة حتى! هنروح نجيب الحاجات ونعدي ناخذ الشنط ونمشي على طول.

كنت سامع حديثهم وأنا نايم فرديت: أنا معاك يا محمود، هروح الحمام وآجي معاك.

كلهم كانوا لسه فوق، فنزلت الدور الأرضي علشان أدخل الحمام، وبعد ما خلصت وقبل ما أفتح الباب، ببص في المرايا فلقيت واحدة ست شعرها منكوش، ولابسة البلوزة اللي لقيتها في الأوضة المقفولة، وكانت بتبصلي جامد وبتضحك.. انفزعت جدا من اللي شفته، وفي ثانية طلعت إيدها برا المرايا ومسكت راسي بإيديها الاتنين وخبطتها في المراية جامد.. المراية ما تكسرتش ولا أنا اتجرحت كانت بس مجرد كدمة.. طلعت من الحمام وأنا مخضوض وماسك دماغى، وجريت عليهم وحكيتلهم اللي حصل، ظهر الخوف عليهم وماكناش عارفين نتصرف ازاي وبالذات عماد اللي ما استحملش يقعد في البيت أكثر من كدا وطلع حجة علشان يخرج منه بأي شكل حتى لو مؤقتا...

= عقبال ما تحضروا الشنط هروح أجيب فطار وآجي، سلام..

وخرج بسرعة البرق، وفضلت أنا ومحمود ويوسف قاعدين مكانا ساكتين، لحد ما محمود اتكلم: ايه يا رجالة، هنفضل قاعدين كدا في الأوضة خايفين نخرج برا؟ تعالوا على المطبخ نحضر أي حاجة عقبال ما عماد ييجي.

نزلنا المطبخ وبعد شوية الباب خبط...

يوسف: أنا هروح أفتح.. ايه يا عماد إنت لحتت تيجي، وفين الأكل اللي جبتة؟

دخل عماد من غير ما يتكلم وقعد على الكرسي، بصله يوسف باستغراب، وجري على المطبخ ينده عليا أنا ومحمود بصوت واطي، وعينه ماتشالتش من على عماد: محمود.. إبراهيم.. تعالوا بسرعة. رد محمود: في ايه؟

بصله يوسف وهو بيقول: عماد جه وشكله غريب.

وبمجرد ما خلص كلام مع محمود، وبص على عماد تاني مالاقهوش...

محمود: يوسف الموضوع مش ناقص سخافة بالله عليك..

يوسف: والله العظيم دخل وقعد هنا كمان، وأنا عيني كانت عليه لحد ما بصتلك، ولما بصيت عليه تاني مالقيتهوش، مش إنتو سمعتوا الباب بيخبط برضو؟

إبراهيم: أه أنا سمعته برضو.. عماد لو إنت مستخبي ورا الكرسي اطلع بالله عليك، بلاش هزار.

راح محمود وبص ورا الكراسي: مافيش حاجة.

فجأة ظهرت حاجة سودا ونطت على وشه مع صوت نونوة جامد، وبعد ما خربشته طلعت من الشباك.. كانت قطة سودا، فجريت أنا ويوسف عليه وكنا مخضوضين من الموقف، ومحمود بيقنع نفسه إنها دخلت من الشباك مش أكثر، وبعد شوية الباب خبط، والمرة دي جه صوت عماد وهو بيقولنا: افتحوا بسرعة مش قادر أقف.

= ايه دا مالك.. بتعرج كدا ليه؟

عماد: عربية خبطتني بس جت سلمية الحمد لله.. ايه مالكو قاعدين
كدا ليه! وايه اللي خربش وشك كدا يا محمود؟

حكته اللي حصل، وصمم إننا لازم نمشي دلوقتي.. حضرنا الشنط فعلا
وحطيناها على باب البيت عقبال ما نشترى حاجات من السوق ونرجع
ناخدها على طول ونمشي .

* في محل لبيع الملابس..

محمود: كانت أجازة متعبة، وكله بسببك يا عماد.

عماد: بقولكم ايه إنتو هتجيبوها فيا، أنا زبي زيكم بالظبط.

محمود: لو كنت دورت كويس ماكناش أخذنا البيت دا، وكان زمانا لسه
قاعدين ومستمتعين بالرحلة.

واحنا بنشترى الهدوم كل واحد كان بيحكي ايه اللي حس بيه بس
ماقالهوش قدامنا قبل كدا، كنا مستغربين ازاي الباب قفل بالمفتاح
لوحدته، والقصرية اللي وقعت على راسي، دا غير الباب اللي قفل على إيد
عماد بطريقة غريبة، وغيره كتير.. كنا بنحاول نلاقي أي تفسير للي حصل
بس كنا بنرجع لنفس النقطة تاني ومافيش غيرها، أكيد البيت دا
مسكون.. في الوقت دا كان صاحب المحل واقف ومركز معانا جدا واحنا
بنتكلم، ولما عماد حكى عن حادثة العربية اللي حصلته وإن العربية
ماخبطتوش من نفسها وإنما أكن حد زقه من ضهره بقوة على الطريق،
اتدخل الراجل في الحوار وقال: اعذرني يا بني لو اتدخلت في الحديث،
بس ممكن أعرف ايه الموضوع كامل؟

محمود: لا يا حاج اتفضل، احنا من القاهرة أصلا وجينا هنا علشان
نصيف..

وحكى محمود للراجل العجوز كل حاجة، أكنه كان عايز أي حد يحكيه
عشان ييرله اللي بيحصل، وكان قاعد بيسمع بانتباه شديد...

- بص يابني، إنتو من الآخر اتضحك عليكم، أولا البيت دا مهجور بقاله
٣٠ سنة.

يوسف: أه أنا قلت كدا برضو، دا مش شكل بيت حد بيسكن فيه كل شهر
حتى، دا التراب كنا بنشيله بالجاروف.. ما تعرفناش بحضرتك؟

رد وهو بيضحك: محمد.. الشيخ محمد.

محمود: شكلك عارف قصة البيت دي يا عم محمد، يا ريت نعرفها احنا
كمان لإن اللي حصلنا فيه مش قليل.

الشيخ محمد: من ٤٥ سنة جت أسرة أجنبية استقرت في مصر، واشتروا
الأرض اللي هيبنوا عليها البيت، ساعتها الدنيا ما كنتش عمار زي دلوقتي
وماكنش في مباني كتير، ولما اشتروا الأرض احتفظوا بجزء من أصلهم
بانهم يبنوا البيت على الطراز الأجنبي.. واللي سمعته إنهم اتجوزوا عن
حب لدرجة إن السكان المجاورين ليهم في الوقت دا كانوا بيضربوا بيهم
المثل في الاحترام والحب.. بس مافيش حاجة بتستمر على حالها، بعد
جوازهم ب ١٥ سنة ابتدت معاملة الراجل تتغير مع مراته، وبعدين
حصلت مجزرة في البيت...

محمود: مجزرة! دا بيفسر الهدوم اللي فيها دم.

الشيخ محمد: ممكن.. في قصص وإشاعات كتير هتسمعها من الناس
بس مافيش ولا واحدة فيهم صح، أنا هقولك ايه اللي حصل بالظبط
لإني كنت ساكن قريب منهم في الوقت دا..

يتابع الحاج محمد: أه لسه فاكر اسمه كويس.. أولفير.. ودا مش اسمه
الحقيقي، هو أطلق اللقب دا لنفسه على وزن اسم لوسفير، وماحدث

يعرف اسمه الحقيقي ايه.. أولفير كان من الأجانب اللي بتتاجر في الآثار المصرية في الوقت دا، واللي دخله في المجال دا جده من أمه وكان مصري الجنسية.. المهم وقع في إيده مخطوطات وكتب خطيرة جدا لسحر إسود وتعاويد مصرية قديمة، وطبعاً أولفير ماكنتش نيته خير، وكان ناوي يستخدمهم بطرق تانية.. ابتدا يقرا في الكتب ويحضر منهم، بس ماكنش متمكن لسه، وفي يوم طلب مني إني آجي أساعده في نقل العفش من أوضة لأوضة بما إننا جيران، ولما كان بيشرحلي أحط الحاجة ازاي لقينا باب البيت خبط، فسابني وراح فتح، ولقى راجل كبير شوية في السن، ومعه اتنين شباب كدا، كنت واقف في المطبخ ببص عليهم من غير ما أولفير ياخذ باله، ودا الحوار اللي دار بينهم بالملي....

= أيوة.. إنت مين؟

بيبتسم العجوز ابتسامة خبث، مع سنان صفرا معظمها مش موجود:
عندي عرض ليك جايلك على طبق من ذهب، نتكلم جوا؟

ظهرت علامات اندهاش على وجه أولفير، وبتردد وسع الطريق وشاور بإيده عشان يدخل العجوز والشابين اللي معاه، وبعد دقيقة من تفحص كل طرف لوجه الآخر، اتكلم العجوز بصوت تخين: أنا سمعت عن اللي معاك.. أنا عايزه.

= ايه اللي معايا؟

- الكتاب، المخطوطات.. هنديك اللي إنت عايزه، ذهب، فلوس، صحة، كل حاجة متخيلها، واللي مش متخيلها هتاخذها برضو.

= وايه اللي يخليك تدفع دا كله عشان شوية ورق قديم!

ضحك العجوز: أنا وإنت عارفين كويس إن دا مش مجرد ورق قديم.. ها قلت ايه؟

بعد دقيقتين من السكوت قام أولفير وهو بيتجه لباب البيت وبيفتحه:
شرفت بيتي، الزيارة انتهت، انفضل.

ودا كان غباء منه، لأنه ما حاولش يعرف مين دول، وعرفوا مينين اللي
معاه..

قام الراجل العجوز وعلى وشه نفس الابتسامة وعينه على أولفير
مابتتحركش، ولما خرج العجوز وقفل أولفير الباب وراه وبيلف عشان
يدخل البيت، لاقاه قاعد على نفس الكرسي أكنه ما قامش من مكانه ،
بس المرة دي كان معاها ٤ شباب، اتخض أولفير واتخضت أنا كمان،
وحسيت إن في حاجة هتحصل دلوقتي مش طبيعية، بس خفت أخرج
برا البيت عشان ما حدش ياخذ باله مني ففضلت واقف براقب تفاصيل
الموقف، وتقريباً أولفير عرف إنه مش بني آدم طبيعي فبدأ يقعد ويتفاهم
معاها، بس للأسف ما كنتش سامع ولا عارف ايه اللي بيحصل برا.. وفجأة
العفش ابتدا يتهز، وملامح وشهم هما الاتنين ابتدت تتغير، وسمعنا
صوت صريخ جاي من الأوض اللي فوق.. كانت زوجة أولفير وبنته،
فبصيت عليهم لقيت الزوجة طالعة من الأوضة والنار ماسكة فيها ومش
مبظلة صريخ، والطفلة كانت بتبص على أمها وتعيط بهستيريا، وصوت
صريخها مش طبيعي.. أولفير اتجنن بعد ما شاف مراته بالمنظر دا وابتدا
يقول كلمات وحاجات مش فاهمها، لحد ما ظهر شخص من العدم فجأة
وأخذ بنته وطلع برا البيت.. أنا شفت دا كله، وحاولت أفتح شباك
المطبخ لحد ما فتح وخرجت وجريت قعدت بعيد عن البيت، وفجأة
النار مسكت في البيت كله، والناس اتلمت وحاولوا يطفوا الحريق، وأنا
كنت واقف مذهول ومش عارف أتكلم من اللي شفته جوا.. وبعد ٤
ساعات من محاولتهم لإخماد النار فشلوا، وبعد شوية النار اتطففت فجأة
مع نفسها، ولما الشرطة جت ودخلت البيت كان سليم من جوا
ومافيهوش أي أثر لحريقة كانت قايمة فيه، ولما دوروا على سكان البيت
ماكنش في أي أثر ليهم، غير شوية هدم عليها دم، وأثار حرق وبقايا من

جلد.. فخرجت الشرطة من البيت في ذهول منهم ومن الأهالي، ومن ساعتها طلعت الإشاعات عن البيت.

عماد: طب والبنات حد عرف يوصلها؟

الحاج محمد: بعد أيام الأهالي لقيتها قاعدة على الشط قصاد البيت، ولما بلغوا الشرطة جت علطول وحققت معاها حوالين الموضوع، وهي كل اللي بتقوله "ماعرفش حاجة.. ماكنتش موجودة.."، بريانكا ماكنتش جميلة زي بقيت البنات لدرجة إن أي حد بيشفها بيحسبها ولد ، فكانت معقدة نفسيا، وبعد اللي حصل لأهلها وخروجها الشارع، الناس ابتدت تنعتها بنت الساحر، والأولاد والبنات الي في سنها ابتدوا يخافوا منها ويتنمروا على شكلها.. حالتها اتطورت فراحت البيت وقصت شعرها كله، وحطته في صندوق مع هدموم أمها اللي فيها آثار دم وحرق وبقايا من جلدها، وكتبت اللي حصل كله في ورقة، وكانت بتلوم أبوها وبتقول إن هو السبب في كل اللي حصلهم، وبعد كذا شنقت نفسها وماتت في البيت برضو، بس بعد ما كتبت بدمها على ورقة إنها هتموت أي حد هيسخر من شكلها أو يتريق على بيتها وأهلها، واللي ساعدها على كذا إن أبوها اتعمق في مجال السحر، وهي كمان كانت بتتعلم منه.. وبعد الحادثة اللي حصلت لأهلها والتنمر اللي اتعرضت ليه من سكان المنطقة، الشرزاد جواها وعرفت تخلي روحها في البيت وهتنتقم من أي حد يسخر منها أو من بيتها.. ودا بيفسر إنك كنت هتموت النهاردا يا عماد بسبب إنك اتريقت عليها وقلت إنها بشنب.. وإنت يا إبراهيم القصرية اللي وقعت على دماغك لما اتريقت على البيت وقلت إنه وحش زي صحابه، واللي طلعت من المرايا وضربتك دي كانت بريانكا.. وهي مش هتسيبكم لحد ما تموتكم.

في ذهول مننا كلنا اتكلم عماد وعلى وجهه علامات الخوف والصدمة في نفس الوقت: إنت قصدك ايه! يعني أنا كدا صابتنى لعنة؟

الحاج محمد: ماتخافش.. ما حدش يخاف، أنا هقولكم تعملوا ايه قبل ما تنفذ وعدها وتموتكم زي الناس اللي قبلكم، بس أهم حاجة تنفذوا اللي هقوله دا بالحرف ومن غير خوف.. ركزوا معايا..

"بعد ساعتين في البيت"

إبراهيم: إنت متأكد يا حاج محمد إن الشيخ دا هينقذني أنا وعماد من الروح اللي بتطاردنا دي؟

الشيخ محمد: أيوة يابني، الشيخ إسماعيل عارف في الأرواح وازاي يتخلص من السحر والكلام دا.

عماد: أنا جبت الحاجات اللي قلتلي عليها يا شيخ إسماعيل، هي ايه الحاجات دي لازمها ايه أصلاً؟

الشيخ إسماعيل: دا بخور أرجواني مر، بيساعد إننا نعرف نتحدث للروح، ودا ماء مبارك مقروء عليه بعض آيات القرآن الخاصة للموضوع دا.

عماد: واحنا هنكلمها كمان؟

إسماعيل: اه، احنا هنكلمها ونصرفها بعيد عنك إنت وإبراهيم، دا كله بالقرآن طبعاً.

إبراهيم: أولع الشمع دلوقتي؟

إسماعيل: لا استنى.. خدوا اقرأوا دا الأول، دي آيات قرآنية علشان تحميننا، ومحمود ويوسف لو بتخافوا اطلعوا برا علشان هبدأ دلوقتي.

إبراهيم بيحكي: بعد ما حصنا نفسنا بدأ الشيخ يقول بعض الكلام، وبعدين طلب من الروح إنها تظهر نفسها من غير أذية، وتعرف عن نفسها أو تدي دليل إنها موجودة.. فجأة البيت اتزه جامد أوي، وصوت صريخ بيخرج من كل ركن في البيت، وبدأنا نشوف أطياف بتتحرك

قدامنا، ويظهر إنهم أرواح شريرة.. بس دول ماكانوش هدفنا، احنا عايزين شخص واحد بس هو اللي يظهر، وهي بريانكا اللي حطت لعنة على البيت وعلى نفسها.. وأخيرا بعد ربع ساعة من القراءة ظهرت، كانت بنت مش جميلة زي بقيت البنات، هدومها مليانة دم وفي صباغ في إيديها اليمين مش موجود ومكانه عمال ينزل دم غزير، يظهر إن هو دا الصباغ اللي قطعته علشان تكتب بيه لعنتها.. شعرها كان قصير ومنكوش، وبتبص عليا أنا وعماد بحقد وهي بتشاور على عماد، وبتتكلم أكن لسانها ثقيل: إنت.. هتموت..

وقبل ما تعمل أي حركة، الشيخ ابتدا يقرا، وهي كانت بتصرخ والمكان من حوالينا ابتدا يتغير للون الأحمر، وبالتحديد لون النار، وأي حاجة مصنوعة من القماش كانت بتتحرق، وابتدت الصور بتاعتها هي وأهلها تطلع نار.. كل دا بيحصل والشيخ مستمر في القراءة والصريخ مستمر.. لحد ما فجأة اختفت، والنار اتطففت.. ففرحنا كلنا، وفكرنا إن الموضوع خلص خلاص لكن...

الشيخ إسماعيل: خدوا بالكم..

ادانا ماء مبارك، وكل واحد مسك شوية في إيده.. فجأة لاقينا عماد بيصرخ وبيقول ظهري، فالشيخ رش عليه مياه بسرعة، وبصينا على ظهره لقينا عليه خربشة كتير أكن حد بيجرحه بسكينة، وظهرت بريانكا تاني، بس المرة دي كان صوت الصريخ أعلى، والنار ظهرت تاني واشتدت من حوالينا، لحد ما الشيخ قال كلام معين من القرآن والأدعية، وقعد يحذرنا لو مابعدتش عننا هيحرقها ويوديها الجحيم، وفي الآخر رش عليها ماء مبارك، وفضل يقرا ويرمي لحد ما اختفت خالص.. بعد كدا خد شعرها اللي كان في الصندوق ووصيتها اللي مكتوبة بالدم وحرقتهم، وبقي يرش على النار مياه وعلى عماد كمان.. وأنا كنت في أمان، ماكنتش عايزة تأذييني زي عماد..

وبعد ساعتين من المعاناة...

الشيخ إسماعيل: الحمد لله، أنت في أمان يا عماد، ماتقدرش تعملك حاجة خلاص لإنها اختفت.

كلنا ماكناش قادرين نتكلم من أثر الموقف كان صعب جدا وبالذات على عماد لإن جسمه يعتبر كان متخربش كله.. الشيخ كان بيهديه وفضل يقرأ عليه آيات من القرآن والرقية لحد ما تحسن.. وشكرنا الحاج محمد والشيخ إسماعيل، ولميّنا شنتنا ومشينا على طول من البيت.

"في العربية"

إبراهيم: احنا ما ديناش عمران المفاتيح.

عماد: مش عايز أسمع اسم الراجل دا تاني في حياتي.

إبراهيم: الحمد لله إننا خرجنا عايشين وبعقلنا.

محمود: أنا رميتله المفاتيح عند عتبة الباب، يبقى ياخذها بقي.. أنا عمري ما هطلع مصيف تاني في حياتي.

عماد: لا طبعاً.. قال مصيف قال.

تمت.

